

kovara hunerî, çandî û lêkolînî ya kurdên anatoliyê

bîrnebûn

hejmar 73 | 2019



Tidskriften utkommer 3 nummer per år.

Çar mehan carekê derdikeve.

Utgas av Apec Förlag AB

hejmar 73 | 2019

Ansvârig utgivare: Ali Çiftçi

Editor: Ali Çiftçi, Seyfi Doğan, Muzaffer Özgür

Koma hevkârên vê hejmarê

Ali Çiftçi, Arvin Berçemi, İbrahim Korkmaz, Xizan Şilan,
Nuh Ateş, Seyfi Doğan, Mem Xelikan, Mehtap İdeli,
Muzaffer Özgür, Ecevit Yıldırım, Hesen Huseyin Deniz,
Rohat Alakom, Memê Mala Hine, Mistoyê Heco,
Hozan Chia

Adress

Navnişana li Swêdê

Box: 8121,

SE 163 08 Spånga/Sverige

E-post

info@apectryck.se

Internet:

www.birnebun.eu

Belavkirin / Distribution:

Ewrupa: Muzaffer Özgür

Birnebûn

Postfach 900348, 51113 Köln / Almanya

Tfn: 0049-172 298 24 51

Türkiye

İstanbul

Selahattin Bulut/Medya Kitapevi

İstiklal Caddesi, Elhamra Pasaj No: 130/6, Beyoğlu

Biha/Pris:

Europa: 5 Euro

Türkiye: 5 TL

Abone ji bo du salan

Swêd: 400 SEK - Almanya 50 Euro

Welatên din ên Ewrupayê: 50 Euro

Numra kontoya li Swêdê:

(Birnebûn) bankgiro: 402-2224

Ji bo aboneyên li derveyî Swêde

APEC, "Birnebûn"Bankgiro-Stockholm/Sweden

BIC/SWIFT: DABASESX

IBAN: SE23 1200 0000 0123 5020 6874

Çap / Baskı: Apec-Tryck AB



Bûkika ku Zara Hacı İwiş bi hunera xwe çekiriye.

Wêneyên bergê:

Şerî li ser caw I, 110 x 90 cm, teknika tevlîhev a li ser caw
ji firça Hasan Hüseyin Devecî

Her niviskar berpîrsê nivisa xwe ye.

Mafê redaksiyonê heye ku nivisên ji Birnebûnê re têن,
serrast û kurt bike. Ger nivis çap nebin ji, li xwedîyan
nayênen vegerandin.

Waqfa Kurdên Anatoliya Navîn li Swêdê û
Komela Ziman li Almanyayê piştgirên kovarê ne.

Naverok

Ji bîrnebûnê 4 Ali Çiftçi	56	Ew bê min nake Mem Xelikan
Malmîme dîsa li bajarê Kolnê çalakî li dar xist 7 Muzaffer Özgür	64	Pîrika Merxûr Mistoyê Heco
Nameyek ji Xorasanê 8 Hozan Chia	67	Bîranîyek ji lîseya Cîhanbeylîyê Ibrahim Korkmaz
Di kurdî-kurmancî de girîngiya ziman 9 Hesen Huseyîn Deniz	69	Dekleresyonâ kurdên êzdi Rohat Alakom
Kurdên Çorumê 13 Muzaffer Özgür	73	Westandom Xizan Şilan
Li vir jî hene 23 Arvin Berçemî	74	Hevpeyvînek bi Zara Hacî Îwiş va Memê Mala Hine
Koçberiya kurdan berbi Swêdê 26 Rohat Alakom	82	Helbest Seyfi Doğan
Gotinên çê û nêçê-1 40 Nuh Ateş	84	Reşo-II- Ecevit Yıldırım
Kilama şînê 55 Mehtab Îdelî	88	Kurtenasandina romana <i>Li benda keskesorê</i> Nuh Ateş

Ji bîrnebûnê

Sala 2019an bixêr hatî!

Ez tu cara heta niha ji salên nû re bi qasî ûsal bi hêvî nebûme. Ez vê li ser navê xwe û her wiha ji bo kovara Bîrnebûnê jî weng dibînim.

Sala 2018an bi bûyerên xweş û nexweş me li paş xwe hişt! Bi hêvî û kelecaneka nû em ketin sala 2019an. Her bûyeraka nexweş bi xwe re yeka xweş jî tîne.

Li ser axa welatê me, sala borî pir tişt bi xweşî û nexweşî qevimîn. A ku em bikin, ji yên nebaş ders û tercuban werbigrêñ û yên xweş jî li her derê bi kar bînin. Îro, piştî ku li Rojava û Başûrê welatê me kurdan li hember DAIŞê ji bo însanetîyê berxwedaneka pir erêni dan, zora DAIŞê birin û li cîhanê sempatiyeka erêniya rind wergirtin.

Erka ku niha li ser milê me ye, em vê sempatiyeka li cihanê bo mîletê me peyda bûye rind bi kar bînin. Ev jî dikeve ser milê her kurdekî ku li derveyî welêt dimê, xwe wek "diplomatekî" welatê xwe bibîne û ji lobîya kurda ya li derveyî welet re bibe alîkar. Ji ber vê ez li neslê me yê nû pir bi hêvî me ku dê bi hev re li xwedîtiya vê sempatiyê derkevin û di qada navnetewî de

em ê bi hev re nirxên xwe yên netewî biparêzin û nasnama xwe bi pêşde bibin.

Dibe ku hemû hêvîyên ku em li sala 2019an dikin ne rast bin. Lê, bêhêvî û daxwez ti karûbar bi ser-nakevin.

Tiştê ku bi rastî ez hêvî dikim danûstendineka bi hêz bi we xwendevanê birumet ên dilpak re ye. Sebeba ku me bi hêz dike her hûn in. Rexneyên we, dilxweziyên we her me dilşad û pêşve dibin. Bi xwedîderketîna we em wek koma hevkarên Bîrnebûnê piştî 21 salan her bi hêz û berfireh bûne.

Xwendewana/ê me yên doh iro hinek ji wan bûne hevkarê kovarê, nivîsa dinivisînin û bi karê perwerdê û xwedî li nasnama xwe derdikevîn. Kar û xebatê pîroz dane ber xwe û kar dikin. Em ji van û hîn ji yên din bi hêvî ne ku dê ev tradîsyon û helwesta kovarê xwedî derkevin û bi hêviya ku hejmara van kesan hîn zêde û berfireh bibe, sala 2019an li we pîroz dikin.

Bi hêviya ku ev hejmar jî wek yên din li gor dilê we be, bimînin di xêr û xweşiyê de heta hejmara bê!

Ali çîftçî

**Em, kurdêñ Anatoliyayê li Swêdê dixwazin
li hemû baxçeyêñ zarokan û mekteban bi
zimanê dîya xwe dersa heynin.**

Çima bangeka bo îmzayê?

Me wekî Weqfa Kurdêñ Anatoliyayê, dest bi bangeka îmzayê kiriye. Xwasteka me ji vê bangê ev e; li bexçeyêñ zarokan û mekteban dixwazin hînbûna zîmanê dayîkê li hemû bajar û şaredariyêñ li Swêdê bê dayîn.

Daxwaza me ne ku em ê zimanekî nû biafirînin. Zimanê kurdî, zimanekî kevn î qedîm e! Lêbelê, rastiyeka me jî heye ku ev zimanê me yê ku rojane li malê tê dengkirin, li bexçeyêñ zarokan û mekteban jî vere dayîn.

Ji bo ferqa zimanê rojane û perwerdê da dê û bav zahmetî dikşînin. Loma jî ew nikarin alikariya zarokên xwe bikin. Ev jî dibe sebeba ku zarok bi sernakevin.

Ji ber heta niha bi sedan sal in kurdêñ me perwerdeya bi zimanê kurmancî nedîtine. Ji bo vê yekî jî ferqa kurmancîya herêmî gelek pêşda çûye.

Ji bo ku ev ferqa devokên herêmî ji ortê rabin divê em siftê zimanê xwe yê herêmî baş hîn bibin ku ji kurmancîya gelem-perîya nivisînê re bingeh be.

Jîyana xerîbîyê ji aliyê ziman û kultur de ji bo kurdêñ me pir bi zehmet e. Xerîbêñ xwedî dewlet gelek îmkanêñ xwe hene. Ew xwedîyê medya ne; bi sedan televizyon û medyayêñ wan hene.

Rojane ji bo ku ji ziman û kultura xwe bi dûr nekevin dikarin bi rêya îmkanêñ nû bişopînin. Ji ber kurdêñ me ji îmkanêñ weng bêbar in rûbirûyê têkçûn û helandinê ne! Ji ber vê rastîyê em wek waqif ketin tewgerekâ veng.

Daxwazêن şaredariyan çi ne?

Dema me wek waqif daxwaza ku *li hemû baxçeyên zarokan û mekteban bi zimanî dîya xwe hînbûna zimanê kurdî* li şaredarîya kir; ji bo ku ev kar bi rêk û pêk bê kirin hinek daxwazêن wan ji me hebûn. Divê em sebebê vê daxwazê pêşkeşî wan bikin. Ka çiqas kes, malbat perwerdeya zimanê dayîkê dixwaziye. Taleb çiqas e? Ku ew jî li gor vê talebê bikaribin pêdiviyêن ku bêñ kirin amade bikin. Eger daxwazeka /talebekâ mezin hebe ew ê di komisyonekê de bikaribin biryarekê bigrên û bi me ra têkevin têkilîyê. Bo wê jî ev banga me ya îmzeyê karê şaredarîya hêsan dike ku biryarê bigrên û bo vê jî ev banga îmzeya lazim e.

Perwerdeyeka çing?

Sîstema perwerdeya Swêdê wexta daxwaza hînbûna dersa zikmakî hebe li her şaredariyê qanûnî ye ku ev daxwaza bi cîh bê. Ji şes salîya, ji sinifa amadeyiye de ji bo hînbûna zimanê dayîkê heftê de saetek divê perwerdeya bi zimanê dê bê dayîn. Em wek waqif ji şaredarîya dixwazin ku ev perwerdeya zimanê dê ji aliyê mamosteyêن ku kurmanciya herêmê jî dizanin ve bêñ dayîn. Ev perwerde ji sinifa amadayî heta sinifa çaran divê bi kurmanciya heremê be. Dema zarokan zimanê rojane bi rihetî dengkirin û xwendin û nivisandin rind hînbûn bi şûnda yanê ji sinifa çaran bi şunda ku dibin 10 salî, hêdî dikarin normal zimanê nivîsê pêşde bibin û perwerdeya kurdî bi gelem-perî werbigrên.

Weqfa Kurdêن Anatoliya Navîn li Swêdê

**Hunermendê me yê ji Anatoliya Navîn
Malmîme dîsa li bajarê Kolnê çalakî li dar xist.**

Muzaffer Özgür

Malmîme
(Hasan Hüseyin Deveci) û
John Herman
(Foto: M. Özgür)

„Krieg auf Leinwand
Şer li ser Tûal ê”



Wênekarê me yê hêja Malmîme (H. Hüseyin Deveci) di roja 15.11.2018an de li bajarê kolnê di atolyê xwe de pêşengehek bi navkirina „*Krieg auf Leinwand*” li dar xist.

Yek John Herman (Hunermendê Performansê) şerwanekî kevn û xaziyê çiyayên Kurdistanê. Yek jî Malmîme ji ber şer cîhûwarê xwe berdayê û hatiyê li Almanyayê dijî. Du hunermend hatine ba hev û ji

bo rexnekirina pîsesazîya (endustrî) çekan bernama xwe amade kirine.

Bêşa yekemîn di roja 24 guilan 2018an de hatiye li dar xistin. Bêşa duyemîn de nezikî 40 dost û hezkirên hunerê hatin ba hev.

Muzîkwanê belçikî besdarvan bi coşeka mezin silav kirin. Rûdaw TV jî wek bername kişand.

John Herman bi almanî û ìngilizî, Malmîme jî kurdî û tirkî xeber da. Serkeftin berdewam e.

Nameyek ji Xorasanê Tolhildan

hozanchia100@gmail.com

De sêrî da xebata we a hêja pîroz dekim. Ez kurdekî bakûrê Xorasanê me. Koka toperê(eşîr) me je Semsûrê ye. Mixabin em pansed salan e je Kurdistana xwe da sewa zilma tirkên hov dûrketinê. Lê her ku çax û dem radevire eleqeya min pirtir min berve Kurdistanê va dekişîne.

Çaxa ez le bûyerên ku de ser toper /eşîr û bajarên kurdan ra derbaz kirine fikir dekim nikam pêşîya hêstiran bigirm. Heta van salên dawî komkujîyen wek Meraş û Melet, Dersim, Agirî, Zilan, Koçgirî û ... ku tê da zarok dehatin goruyandin û mezin dehatin qelişandin û kelandin bû para xweng û birayên me.

Gelê me xwedî dîroka herî kevnare û herî kêm je panzde hezar salan berê pêva le ser axa Kurdistanê jîyaye. Lê heta nika jî tu mafê me yê jîyanê tineye. Gelê me yê Bakûr û Rojhelat sewa parîyek nêñ yan gere dev je welêt berdin yan biwin caş û koley dagîrkeran yan wek parsek û hejar bijîn. Yê Rojava ku ta astek giştine mafê xwe yê mirovatî tûşê komkujî û gefen tirkan û ereban dewin. Min je kovara we ya hêja hêvûsî ku bajarek wek Reqa warê eşîren me yênen resen bûye ku nika le Xorasanê jî hene. Min zanîbû ku rejîma Sûrî gelek cihuwarên me rês kirine û ereb şandine şûna kurdan. Lê ev destkeftîya mezin a Rojava we xwîna gelê me ra hat damezirandin û nika le ber hêrêşê van tirkên hov û cehadî ne.

Bapîrên me çarsed salan zimanê me yê resen kêm û zêde parastin. Lê mixabin çel pênce salên dawî zimanê me ro we ro rût û tazîtir dewe û berve qirbûnê

va tere. Mixabin le Kurdistanê jî ta astek rewş werganî ye. Levira wer bûye ku kesî le şûna peyvîn farisî ku têketine zimanê me bixaze ên kurmancî biwêje zare wî dekin û pê dekenin. Wek mînak êdî de nav xelkê me nûsîkn bûye çespîn hêvirîn bûye *texrib* bûn şemîtin yan qêj bûn bûye *sur xwarin* û gelek peyvîn din şûna xwe we yênen farisî ra guherandine. Eger hewin jî de hinek dêwerên biçûk da têñ gotin û de kûranîya bîra bavêne me da mane û we mirina wan je bîr dewin. Loma kovara we pir sewa birayên me yê Anatolîya Navîn hêja ye.

Eger ziman qirbiwe gişt hest û nirxên me yênen netewatî jî pêra binax dewin. Dûra xebata me ya sîyasî û mafxwazî girîng e. Dewletên tirk, erreb û ecem berê em pêjîqandinê û em guhas-tinê Xorasan, Qeqaqistan, Qırqızistan, Efqanistan, Misir, Anatolîya Navîn û herderê. Lê em bi hêvî ne rokê vegeerinê nav hemêza Kurdistanê û heta ku je dest me tê gere alîkarîya kurdêñ welêt bikinê ta welatê me serxwe biwe.

Nika tirk, erreb û ecem je Kurdistanê gaz, petro, zêr, zîv û her tiştê deguhêzin nav bêrika xwe. Eger em şe nekin teknolojîya xwe be pêş va biwin û we şe nekin de her mijarê jîyanê da xweser biwin û we şe nekin çek sewa parastina xwe çê kin tu car je koletîya kujerên xeng û birêne xwe naflitinê. Ez hertim kovara we deşopînim û dexwînim. Pir pêra şa dewim. Hêvidar im xebat û lêkolîn û hay kirina we her ku dem radebare zêde biwe û bandora xwe pirtir de ser gelê me ra raxine. Sipas je we ra!

Di kurdî-kurmancî de girîngiya ziman

Hesen Huseyîn Denîz

Zimanê peyvkî

Zimanê peyvkî ji devê mirov di nava lêvan re bi guherandina hilma ji kezebê tê, derdikeve. Ji nava heyîneyan tenê mirov dikarin zimanê peyvkî bi kar bînin. Mirov ji bo hest, raman, daxwaz û armancê xwe bikaribin ji yekî/ê din re bînin ser ziman, zimanê peyvkî bi kar tînin. Bêguman ev ziman bi hêsanî derneketiye holê; di nava kar, xebat û jiyana civakî ya hezarên salan de saz bûye. Mirov berê dikarîbû deng derxe, lê nikarîbû bipeyive. Ji bo peyvandinê, çêkirina peyvan û ji bo vê ji derxistina dengêna cuda cuda tê xwes-tin. Divîbû ev deng tev jî ji aliyê mirovên wê civakê -ango wê girseyê ve- bi awayekî hevpar hatiban pejirandin û bikaranîn. Mirov her ku fêrî axaftinê bûn, ji bo her liv, kar û tevgera xwe dengekî cuda derxistin. Mînak; ji bo karê çûyinê, gotin; ‘diçim’, ji bo karê hatinê, gotin; ‘têm’ û hwd.

Bêguman ji bo bikaribin van peyvan ji dev derxin, pêdivî bi dengan hebû û her dengek wek tîpekkê hat diyarkirin. Ev tîp destpêkê tenê bi awayê dengdar (bêdeng) dihatin bikaranîn lê bi pêşveçûna ziman re tîp an dengêna dengdêr jî lê hatin zêdekirin.

Mirovahî her ku li pêş ket peyvandina xwe dewlemenditir û zelaltir kir. Di dema şaristaniya sumerian de gihişt qada bikaranîna nivîsandinê. Bêguman di pêşveçûna zimanê peyvkî de derbasbûna nivîsandinê pêngaveke pir grîng e. Mirovahî heta roja me li ser vê pêngavê bûye xwediyê çand, wêje û dîrokeke mîratemayî.

Bi dîtinâ nivîsandinê êdî mirovahî ji zimanê peyvkî derbasî zimanê nivîskî dibe.

Zimanê nivîskî

Zimanê nivîskî ji ber ku bi çav dikare were dîtin, di ziman de rastkirin, rêzikdanîn û xemilandineke rêzimanî bi xwe re derdixe holê.

Zimanê peyvkî çawa were bihîstin, wiha tê axaftin, lê zimanê nivîskî ne wiha ye; bi çav tê dîtin û bi rêka fêrbûnê mirov li gor armancê dikare bîne ser ziman. Dîsa zimanê peyvkî bi rêka dev û guhan çiqasî dirêj bijî jî herdem dikare winda bibe û li qayî hilweşînekê were. Lê zimanê nivîskî bi sed salan jî dikare li ser parçeyeke çerm, li ser berekî yan li ser rûpelekê wek xwe bimîne, qet winda nabe. Zimanê peyvkî jî, zimanê

nivîskî ji, ji bo vegetina mirovan bi awayekî berfireh têن bikaranîn. Mirov tenê bi vegotinê dikare hest, raman, daxwaz û armancêن xwe ji mirovên din re diyar bike. Ci bi rêka nîşaneyan be, ci bi rêka peyvan be û ci bi rêka nivîsandinê be, mirov bi rêka xwevegotinê bûye mirov. Vegotina nivîskî û ya peyvkî bi rêka ziman pêk têن lê divê ev vegotin bi ramanê werin stiran û bi armancû wateyeke li gorî rîzîk û planekî werin hûnandin. Ger ne wiha be, her axaftin an her rîzkirina peyvan li pey hev nabe vegotin. Vegotineke baş bingehê xwe ji nivîsandin û peyvandineke rast digre. Mirovekî şas bipeyive, nikare xwe rast vebêje. Dîsa mirovekî daxwazeke xwe şas nivîsandibe, nikare gazindan ji xwendevanan bike, bêje ‘hûn şas têdighêjin mebesta min’.

Zimanê kurdî ji zimanekî herî kevn ji yên mirovahiyê ye. Ji sedema negihiştina jiyanekî azad a li ser erdnîgariyeke serbixwe, zimanê kurdî ji her di bin bandora zimanêñ din ên li derdorê de maye. Bi dîtin û bikaranîna nivîsandinê ji, ji ber van sedeman zimanê kurdî derfeta vegotina nivîskî nedîtiye û demeke dirêj tenê xwe bi awayê vegotina peyvkî jiyandiye. Ji ber vê yekê ziman ew derfeta gihiştina rîzîkên rîzmanî yên ji aliyê herkesî ve werin pejirandin û

bikaranîn bi dest nexistiye. Bêguman her zimanek di nava xwe de xwedîyê rîzîkên rîzmanî ye, lê gava ev neyên nivîsandin û bi rêka fêrkirin û fêrbûnê derbasî nifşen bêñ nebin, di navbera dev û guh de wê hilweşandin û çewtkirinekê bijîn. Ger zimanê kurdî ne zimanekî zêde bi bingeh ba, niha ji mêt ve wê ji holê rabûba. Lê zimanê kurdî ji sedema xurtbûna xwe, tevî hemû astengiyan, xwe daye ji-yandin û bi taybetmendiyêñ xwe yên li gorî xwe, ev sedemên çewtkirin û hilweşandinê ji bo xwe kiriye navgîna xwenuhkirinê.

Di kurdî-kurmancî de hilandina peyvan a pev ve

Ji ber vê yekê zimanzan dibêjin, ‘Peyv li ser ziman çawa hêsanter werin, ziman li gorî wê xwe nuh dike. Ji bo vê ji gelek tîp ji nava peyvan dikevin an hildiweşin. Lê kurdî bi vê hilweşînê ji cewherê xwe dernakeve, bêhtir xwe nuh û dewlemend dike. Mînak; peyva ‘ev roj’ bi demê re bûye ‘iroj.’ Her du tîpêñ ‘e’ û ‘v’ ketine, tîpa ‘î’ hatiye şûna wan. Bi vê yekê him peyvandin siviktir bûye, him peyveke nû ya kurdî li xurçika zimanê kurdî zêde bûye û him ji di gotina peyvê de xwenuhkirinek çêbûye. Ger ji bo vê xalê em çend mînakêñ din bidin, em dikarin wiha rêz bikin:

Ev sal: Îsal
Nuh: Nû
Ev şev: Îşev
Destpêk: Despêk
Sîtêrik: Stêrk
û hwd.

Wek zimanê kurdî, malbata ku di navê de cih digre ji xwedîyê xurtbûn û dewlemendiyekê ye. Zimanê kurdî di nava malbata zimanên hind-ewropî de cih digre û zimanekî bingehîn ê ji vê malbatê ye. Malbata zimanên hind-ewropî iroj li ser erdnîgariyeye berfireh, ji Rojhilata Navîn heta Ewropa û Amarîka û gelek deverên din tê bikaranîn.

Di kurdî-kurmancî de zayend

Zimanê kurdî-kurmancî xwedîyê rîzîk û taybetmendiyêni li gorî xwe ye. Ji vana yek jê, bikaranîna zayendan e. Di zimanê kurdî de her navek û peyvek li gorî sazbûn û bikaranîna xwe yan zayenda nêr, yan zayenda mî, yan ji zayenda nêrûmî (notr) diyar dike. Kesên piştre fêrî zimanê kurdî dîbin di bikaranîna zayendê de zahmetiyê dikşînin û pirayî şaş bikar tînin, lê yekî ji dayika xwe fêrî ziman bûbe zayendan rast bikar tîne. Mînak; peyva ‘sêv’ navê fêkiyekî ye. Dema bi tenê serê xwe be bi awayê nêrûmî wek ‘sêv’ tê nivîsandin. Lê gava di nava hevokê de were

bikaranîn, divê nêr an mîbûna xwe diyar bike. ‘sêva min.’, ‘sêva bi darê ve.’, ‘sêva di selikê de.’,...û hwd.

Di vê derê de tîpa ‘a’ ya hatiye dawiya peyva ‘sêv’ zayenda mî diyar dike. Di zimanê kurdî de tîpa ‘a’ zayenda mî, tîpa ‘e’ zayenda nêr dide diyarkirin. Ev ji bo kitbûna peyv an navan wiha ye, lê dema bibe kom, nêrbûn û mîbûn ji holê radibe û wekhevî çêdibe. Mînak;

Mî: *sêv / sêva sor / sêvên sor*

Nêr: *dest / destê min / destên min.*

Ji vî awayê tewandinê re **veqe-tandek** tê gotin. Wek di van mînakan de ji tê dîtin ev rîzik û taybetmendiyâ zayendî hevsazî û dewlemendiyekê dide zimanê kurdî.

Zayenda di vegetandekê de gava navdêrek û navdêrek, navdêrek û rengdêrek, navdêrek û cînavkeke xwedîtiyê, yan navdêrek û hokerek bi hev re werin bikaranîn xwe nîşan didin.

Ger em hinek mînak bidin:

Navdêrek û navdêrek:

Sêva Şîlanê

Navdêrek û rengdêrek: Sêva sor
navdêrek û cînavkeke xwedîtiyê: Sêva wê

Navdêrek û hokerek: Sêva li vir

Gava em li van bikaranînan dinîrin, em dibînin li dawiya Şîlanê ji tîpa ê li ser navê Şîlan hatiye zê-

dekirin. Di vê rewşê de êdî tewang derdikeve pêşberî me.

Tewang jî berûvajî veqetandekê gava navek bi tena xwe be û bi navdêr, rengdêr, cînavk an hokerekê re girêdana xwe tine be, yan bi pey de lêkerek were derdikeve holê. Em mînakekê ji bo tewangê jî bidin:

Sêva Şilanê: ê ya dawî tewanga mîbûnê ye. Mirov vê tewangê ji cînavka xwedîtiyê ya kesa mê nas dike.

Sêva wê: ev ê ya dawî û ê ya li dawiya Şilan heman zayendê didin diyarkirin.

Sêva Siloyî: î ya dawî tewanga nîrbûnê ye. Mirov vê tewangê ji cînavka xwedîtiyê ya kesê nîr nas dike.

Sêva wî: î ya li dawiyê û î ya li dawiya Silo heman zayendê didin diyarkirin.

Li hinek herêman zayenda nîr hatiye avêtin û li hinek herêman jî her du zayendan wek zayendekê bi kar tînin. Lê ev kêmûkurtiyên herêmî ne û bi awayê rêzimanî divê zayend werin parastin.

Di kurdî-kurmancî de tewandina cînavkan

Di kişandina lêkeran de, cînavkên lêkeran ji bo dema niha û dema bê bi awayekî û ji bo dema borî bi du

awayan têbikaranîn. Di dema borî de li gorî gerguhêzbûn û negerguhêzbûna lêkeran cînavk jî têbikar hertin.

Mînak; dema mirov lêkeren gerguhêz (transitive) bikar tîne, ji bo dema derbasbûyî mirov nikare cînavêni di Dema Niha û Dema Bê de têbikaranîn, bi kar bîne:

Ez dibînim. -Dema niha

Ezê bibînim. -Dema bê

Min dît. -Dema derbasbûyî.

Di vir de mirov li şûna hevoka 'Min dît', nikare hevoka 'Ez dît' bi kar bîne, ji ber ku li gorî taybetmendiya tewandinê ya zimanê kurdî cînava 'ez' ditewe, dibe 'min.'

Bêguman tewandin jî hêsanî, hevsazî (aheng) û dewlemendiyekê dide zimanê kurdî.

Cînavkên di dema borî de bi lêkeren gerguhêz re têbikaranîn, di dema niha û bê de erka cînavkên xwedîtiyê digrin ser xwe.

Cînavkên kesane

Ji bo dema borî Ji bo dema niha ji bo dema bê

Lêkeren gerguhêz hemû lêker hemû lêker

Min ez ez ê

Te tu tu yê - tê

Wî, wê ew ew ê

Me em em ê

We hûn hûn ê

Wan ew ew ê

Kurdên Çorumê

Muzaffer Özgür



Xerîta bajar û bâjerokên Çorumê¹


Tê zanîn ku kurdên Anatolîyê li gelek bajaran belavbûne. Lê wek kolonî li du heremên Anatolîyê dijîn. Me di kovara bîrnebûnê de, di gelek nivîsanda behsa kurdên Anatolîyê kir. Ezê di vê nivisa xwe de li ser kurdên li cografya/bajarê Çorumê hene/dijîn de çend agahdarîyan binivsînim.

Dîrok û jîyana kurdên Çorumê jî ji kurdên din yê heremê ne dûr e. Di çavkanîyê dîrokî de hatiyê eşkerekirin ku kurd ji welatê xwe bi rêya koçbûnê û surgûnkirinê hatine derxistin. Ew rastîya dîrokê heta sedsala 11-12an diçe. Dema em kurdên Çorumê bînin ziman dibe ku em behsa kurdên zêde li ber çerxa asimîlasyonê de helîyan û zimanê xwe bîrkirî dikin.

Di dîroka erdnîgarîya Çorumê de Şarîstanîya Hattî (BZ. 2500-BZ. 2000/1700) hebûye û dû re jî Hitît (BZ.1680-BZ. 1178) hatinê li wan deran cîhûwar girtine. Paytaxta wan jî Hattûşas (Boğazköy) e. Di herdû şaristanîyan de şopêن gelên Aryan hene. Zanistîya dîrokê de gelek le-kolînwan dibejîn koka wan ji aryana têن. Ew ne mijara me ye. Lê eger herdu şaristanîyan koka xwe ne arî bin, kesekî arî/kurd hebûyê û şopa

¹ www.google.de


xwe di dîroka Hitîta de hatiyê dîtin. Arkeologa li ser tabletan li Hattûşâşê hatin ditin de ev tespîtkirine û veng jî nivîsandine. Li paytaxta hitîta de li qesra kral seyîsekî bi navûdeng hebûye, navê xwe jî Kîkûlî bûye.



Hîndeknameya Kîkûlî

Bi we nivîsê re telîmnameya (hîndekarname) Kîkûlî te gotin. Kîkûlî li ser du tableta de ji bo hesp timarkirin/Perwerdekirin û tenduristîya wan agahdarî nivisandine(BZ.1500). Tableta wî 1080 rêz in û bi zimanê Hitîta nivîsandîye. Ew tespît hîn jî di dema niha de aktuel in. Li jêrenotê de ji bo kesê ew nivisandî jî du agahdarîyên balkêş hene. 1-Seyîsê hespan Kîkûlî, 2-Ew ji welatê Mîtanîya ye. Ji wan agahdarîyan te fehmkirin ku li Çorumê kurdê yekemîn Kîkûlîyê kurê Mîtanîya ye!²

Îzady di pirtûka xwe ya bi navê „Kürtler“ da nivîsandîyê ku; Kurdên Anatolîyê li du cîhûwar an bi hejmarên pir nîstecih bûne. Ew jî Anatolîya Navîn û Bakûrê Anatolîya Navîn e. Nivîskar xerîtek (li jêr e) jî di pirtûka xwe de belavkiriyyê. Dema behsa bajarêv Kurd lê dijîn yên li Bakûrê Anatolîyê dike, bajarêv wek Kırşehir, Yozgat, Çorum, Tokat, Amasya, li nezikî wan jî bajarêv Kastamonu, Sinop û Samsunê dinivsîne.



Du heremên kurdên Anatolîyê³

2 www.dirokakurdistan.com / Ali Husein Kerim

3 Îzady, Mehrdad R., *Kürtler*, Weşanên Doz, 2004-İstanbul

Tê zanîn ku eşîra reşîyan di dîroka Osmanîyan de li Kurdîstanê wek rêvabir roleka mezin lîstîye. Reşîya di dawîya sedsala XVII. de heta dawîya sedsala XIXan li Meletî, Mereş, Edene, Sewas û Çorumê desthilatî kirine. Osmanîya ji bo kurdên koçber kontrol bikin di dema desthilatîya Reşwanzade Mehmet Paşa de (Boybegê Mereşê bûyê) idarekirina bajarê Çorumê dane lawê wî yê bi navê Reşwanzade Omer Paşayê 1.(yekemîn) (6 Nîsan 1722).⁴

Di dema tanzîmatê de li Çorumê 16 Eşîrên niştecihkîrin hatine tespîtkirin. Piranîya wan ji kurd in. Dedeslî, Cihanbeylî, Kuyumcu, Araplu, Kavîlî, Cecelü, Hatal, Alamaslı, Kutlu, Çorum Ekradî, Lêk, Cayan Yörüğani-Ballı Yörüğani, ïnallu, Çakallî, Şeyhbîzinli û Kutluca.⁵

Nivîskarê me birêz Nuh Ateş di nivisa xwe ya bi navê „*Batı Kürtleri Gerçekliği ve Çözüm Perspektifleri üzerine sesli düşünceler*“ de ji pirtûka Cevdet Türkay (Başbakanlık Belgelerine göre Osmanlı İmparatorluğunda Oymak, Aşiretler ve Cemaatler) lîstek amadekiriye li gor vê lîstê Eşîrên li bajarê Çorumê ji evin. Alçul, Aliçul, Ballı, Kavîlî, Lek, Milli, Milli Karili, Muslihli, Seyyid Vend, Şeyhan, Zeyve(Zeyveli), Badilli, Bozgeyikli, Eğer Kürdü, Kîran(Kîranlı), Salar, Tayilar(Dayılar), Velili⁶

Dema behsa Çorumê bû bajaroka Îskîlîpê roleka xwe ya taybet hebûye. Îskîlîp heta sala 1900î giredayî bajarê Kastamonuyê bûye. Paşê derbasî ser bajarê Çorumê kirine. Nivîskar birêz Rohat Alakom di lêkolîneka xwe de ji pirtûka Dîroknaşê Kurd M. Emin Zekî Beg (Kürt ve Kurdistan Ünlülerî, Apec, 1998-Stockholm) agahdarî nivîsandine. M. Emin Zekî Beg di pirtûka xwe de behsa Kurdên Îskîlîpê dike. Dînişsîne ku gelek Kurd li wir dijîn, ew ji Kurdistana Başûr ji bajarê Îmadîyê koç kirine û hatine li wir bi cîh bûne. Sebeba we ji bi dergeha îskîlîplî va girêdide. Birêz Alakom; Dîsa dînişsîne ku Îskîlîp navenda kurda bûye. Dema Osmanîyan de li Çorumê ji bo pîrsîn di navbera kurdan de bêñ zelalkirin Qadîtiya Kurdish hatiyê avakirin (ji Eröz, Mehmet).⁷

Li Tirkîyê di sala 1927an de ji bo nîfîsa xwe eşkere bibe serjimariya gelempêri çebûyê. Li Çorumê 247.926 kes hatine nivîsandin. Kesên

4 Söylemez, Faruk, Osmanlı Devletinde Aşiret Yönetimi (Rişvan Aşireti Örneği), Weşanîn Kitabevi, 2007-İstanbul

5 Ji teza Doktoraya Korkmaz, Şerif, Çorum İdari, Sosyal ve Ekonomik Yapısı Tanzimat-II.Mesrutiyet -Gazi Univ.-2003

6 Birnebûn, hejmar 1, 1997, rûpel 13 -21


7 Alakom, Rohat, Orta Anadolu Kürtleri, Weşanxana Apec, 2003-Stockholm

zimanê dayîka xwe kurdî hatin nivisandin jî; jin: 6.687, mîr: 5.624, Tevûhev: 12.311 kes (% 5) Kurdbûne.⁸

Birêz Rohat Alakom di pirtûka xwe de agahdarîyê li ser hejmara kurdên Çorumê berfireh dike.

ÇORUM	MER	JİN
Merkez û gund	1.140	1.379
Hüseyinabat (Alaca)	260	315
İskilip	851	1.080
Mecitözü	3.054	3.675
Osmancık	19	19
Sungurlu	300	219

Di dema Dewleta nû ya tîrkan de jî kurdên li dor aliyê Çorumê hatine desteserkirin. Li gor belgenameya li jîr agahdarî hene.⁹



TC. Başbakanlık, Cumhuriyet Arşivi (1932)

Di salêن 1960an de li gundêن kurdên Çorumê dibistan hatine vekirin. Bi dibistanan re jî asimîlekirina kurdan destpêkiriyyê. Di salêن 1970an de kurda dev dane metropolên mezin, piraniya wan li Ankara û İstanbulê cîhûwar girtine. Li welatên Avrupa jî gelek Kurdên Çorumê dijîn. Di dema 27 Gulan-10 Tîrmeh 1980 de li Çorumê li ser kesên bawerîya xwe

8 TC. İçişleri Bakanlığı, *Nüfus ve Vatandaşlık Genel Müdürlüğü İstatistikleri, 1927 Nüfus sayımı*

9 Ji arşiva komela KOMKURD-AN/Ankara, (Di sala 2017an de li gor qanûna Rewşa Awerte -2935

OHAL madde 11, benda o- Dewletê dest da ser û qedexê kir.



Elevî lîstikêن dewletê çebûne û qetlüyameka mezin hatiyê kirin. Nasyonalistên tirk bi piştgirîya dewletê erişî ser mehelleya Mîlönû ya bajêr kirin û 57 kes hatin kuştin û bi sedan jî birindarbûn. Li dawîya erişê gelek kurd bûn koçber ketin rêya welatên Avrûpayê. Piranîya wan jî li Almanya, Fransa û Danîmarkayê dijîn.

Kurdêñ li Çorumê yên bi bawerîya elewî bi du rêyan hatine wir. Komek di dema Osmanîyan de (1813) li dawîya serhildana Velî Paşa ji Meletîyê, komek jî ji Dersîmê hatine sûrgûnkirin. Ji derwayî wan jî di dema serhildana hemberî Biyikli Mehmet Paşa de kurd di şer de biserneketin û ji Amedê hatine surgûnî doralîyê Çorumê bûn. Kurdêñ elewî dibêjin em ji Horasanê hatinî, ji ber ku îmkanêñ min tunen ez lêkolînekê bikim ji vê mijarê dur dikevîm. Ji bo kurdêñ Elewî ocaxê Şîx Çoban, ji bo kurdêñ sunnî jî dergaha îskîlîplî cîhekî taybet bûye.



Li aliyê çepê ji bajeroka Alaca, gundê Büyük Keşlik (Nesimi Keşlik) Ocaxê Şîx Çoban Tirba Pîr Nesimî Dede û li keleka wê jî mezelekî dîrokî heye. Li aliyê rastê jî Cemxana Ocêx.¹⁰

10 www.alevinet.com

Kultur û jîyana kurdên li Çorumê ji kurdên aliyê Ankara û Konyayê pir ne cûdaye. Ji aliyê zimande pir cûdatî tuneye. Lê ziman li wan deran de gelek asîmîlebûye. Çend taybetmendîya jî binivsînim. Di nav Reşîyên û Canbegên Çorumê de ji aliyê bawermendîyê de elewî hene. Çima? Gerek bê lêkolandin. Li wir jî Reşî, Şexbizeynî, Canbek, Millî hene.

Ji bo tekilîya kurdên Çorumê û kurdên alîyê Ankara û Konyayê jî meriv dikane çend gotina bêje. Malbatêni ji alîyê Çorumê hatin hene û li nav gundan de belavbûne. Te gotin ku nîvê gundê Hacimusa (Polatlı) ji Çorumê hatina. Hatina wan li ber yasaya paşnav girtinê bûye û paşnavê malbatê jî Çorum e. Ew malbatêni hatinî canbeg û hanefî ne. Li gundê Yüzükbaşı (Polatlı) malbatek heye û ji gundê Bekaroğlu (Çorum) hatine, canbeg û berê elewî bûne. Ew malbat hîro jî bi navê Bekaroğlu te nasîn.¹¹

Serjimarîya gelempêriya 1990î de jî hejmara kurdên bajarê Çorumê 23.700 kes hatine tespit kirin.

BAJAR	NIFÜS	
	2017	2015
MERKEZ	294.050	274.990
ALACA	31.594	32.581
BAYAT	16.509	17.726
İSKİLIP	32.248	33.806
KARGI	15.195	15.432
MECİTÖZÜ	14.937	15.710
ORTAKÖY	6.848	8.368
OSMANCIK	42.922	43.439
SUNGURLU	48.554	50.162
BOĞAZKALE	3.686	3.866
UĞURLUDAĞ	6.074	6.738
DODURGA	5.904	6.061
LAÇIN	4.602	4.817
OĞUZLAR	5.299	5.628

Li gor istatistikên dewletê nifûsa Çorumê di sala 2017an de 528.422 kes in. 261.605 (%49,51) mer û 266.817 (%50,49) jî jin in.

11 Di sohbeta bi nivîkarê me Memê mala Hine re eşkere bûn.



Dîmenek ji gundê Dûdûklük

Straneka kurdên Çorumê

Lo Lo Xwodê¹²

Lê lê min go ezê herim pe serî zevîyan de

pe serî baxan de, pe serî maxan de

Valla min got ezî hîro pir dertlime

Ezê vexwûm, ezê serxoş bibim bi serî van derdan da

Valla min îşev dîsa rinda xwe dî di xewnan de oyy oyyyyyy

Lê lê min lo Xwodê lo lo Xwodê

Valla ezî li te şîkatçîme lo lo Xwodê

Valla te rinda xelkê gîşko lê ra yazmîşkiriye

Te çima rinda min ve min nedayêê ax

(DİSGOTİN / NAQARAT)

Lê lê min got pe min navê te ge Elîfê ge

Valla bejn zirave, teng zayıfe

Valla ezê herim rinda xwe bibînim

De hevayî sar e baran, berfe

(DİSGOTİN)

Lê lê min go besê walî dirêj meke

Valla serê derdê birîna vemeke

Lê lê min got va yaziya Xwodê yê ge

Xwodê hakî yazmîşkiriye ge

Valle em ci bikin jî fayde nake, fayde nake

(DİSGOTİN)

12 Çavkanî: Stranbêjê heremî Ali Cemdali

Dema meriv li gotinê strana birêz Alî Cemdali mezedike, ji alîyê ziman de di navbera Kurdên herema Ankara-Konya-Kırşehir-Aksarayê de pir cûda tî tuneyê. Rewşa asimîlasyonê gelek pêşta çûyê û zimanê tirkî gelek ketiyê nav ziman. Stranbêjên heremî wek mînak Alî Cemdali, Selahattin Toprakçı, Hasan Yavuz, Baran Alp, Metin İstanbullu, Gopsenlî Ayhan û Grup Mesin li dawet û şahîya bi kurdî strana dibêjin û ziman didin jîyandin.

Lîsta gundêñ kurdêñ Çorumê

Bajar	Bajarok	Gund û Agahdarî
ÇORUM	Merkez (25)	
	GÖKÇEPINAR	
	SARAYLI	
	SARIKAYA	
	SARILIK	
	AKSUNGUR (MICIKLAR), Kurmanc, Hanefî, Canbeg	
	MEMİŞLER, Kurmanc, Hanefî, Canbeg	
	MUSTAFA ÇELEBÎ, Kurmanc, Elewi	
	DÜDÜKLÜK, Kurmanc, Elewi, Kavli /Pilva /Dirêjan	
	BEKAROĞLU, Kurmanc, Elewi, Kavli /Pilva /Dirêjan	
	SANLI OSMAN (Kanlıosman), Kurmanc, Elewi, Kavli	
	KADIDERESİ, Kurmanc, Elewi , Kavli	
	KOZULCA, Kurmanc, Elewi , Kavli	
	MOLLAHASAN (Milhesen), Kurmanc, Elewi , Kavli	
	SOYCAK, Kurmanc, Elewi	
	SIRIKLI, Kurmanc, Elewi , Canbeg	
	ASAĞI SALLIK, Kurmanc, Hanefî	
	YUKARI SALLIK , Kurmanc, Hanefî	
	BEKTAŞOĞLU, Kurmanc, Elewi	
	ASAĞI ÜÇDAM, Kurmanc, Elewi	
	YUKARI ÜÇDAM., Kurmanc, Elewi	
	SARIYER, Kurmanc, Elewi	
	PEDERLER , Kurmanc, Elewi	
	MORSÜMBÜL, Kurmanc, Elewi	
	KİRAZLIPINAR(haydutoğlu), Kurmanc, Elewi, Kavli	
	KARAKEÇİLÎ, Kurmanc, Elewi	
Alaca (23)		
	AĞUÇAN	
	AKÇASOKU (Ağcasoku), Elewi, kavli, hatiyê terkkirin.	
	BÜYÜKDONA	
	BÜYÜKHIRKA	
	BÜYÜKEŞLİK,(Navê kevn: Nesimi Keşlik) Elewi, Kavli Bêşka Ocaxê Şêx Çoban li vi gundiye. Eşîra Kavli girêdayî Ocaxê Şêx Çoban e. Merkeza oçêx li Dersim/ Mazzirtê yê.	
	ÇEVRELİ	
	ÇIKHASAN, (Bazarlı)	
	ÇIRÇIR, Kurmanc	
	ÇOMAR, Kurmanc, Elewi, Reşî	
	ÇOPRAŞIK	
	DEGİRMEÑÖNÜ (Dibareş), Kurmanc, Elewi, Kavli	
	GAZIPAŞA	
	GÖPSEN	
	HARHAR	
	HAYDAR, Elewi	
	KABİLKIŞLA, Elewi-girêdayî Ocaxê Şêx Çobane, kavli	
	KARGIN	

	KOYUNOĞLU, Kurmanc, Elewi
	MAZİBAŞI, Kurmanc, Elewi
	NESMİ KEŞLİK, Kurmanc, Elewi
	SOĞUCUK, Kurmanc, Elewi
	ŞİHÇOBAN
	YÜKSEKYAYLA
Bayat (12)	
	AKSEKİ, (% 50, Kurd)
	AŞAĞIEMİRHALİL
	AYVALICA, (Zurnacilar)
	BEYDİLİ
	ÇAMLIGÜNEY (Kişla)
	EMİRHALİL
	İŞHAKLI, (% 50 Kurd)
	KÖPÜKLÜ, (% 50 Kurd)
	KURUÇAY,(Kürtköy) (% 25 Kurd)
	SARAYKÖY, (% 50 Kurd)
	YUKARISARAY, Kurmanc, Bazıkî û Canbeg
	AŞAĞISARAY, Kurmanc, Bazıkî û Canbeg
İskilip (8)	
	AKKAYA
	AVHATYAKASI, (% 25 Kurd)
	ÇUKURKÖY, (% 25 Kurd)
	KARLIK
	KARINCALI, Kurmanc, Elewi
	KILIÇDERE, (Asimile bûne, gündê dayika politikwan Naci BOSTANCIye)
	SUHİLAN
	YERLİKÖY, sunnî
Laçin (4)	
	ÇEMBERLİPINAR, Şexbizni, Hanefî
	GEMET, Şexbizni, Hanefî
	KARASOKU, Şexbizni, Hanefî
	SITMA, Şexbizni, Hanefî
Mecitözü (6)	
	FINDIKLI, Kurmanc, Elewi, kavli
	Günögmez
	KARACUMA, Kurmanc, Elewi
	KAYI, Kurmanc, Elewi
	KOYUNAĞILI, Kurmanc, Elewi
	Kurbağalı, Kurmanc, sunni
	TOTALI, Kurmanc, Elewi
	YEŞİLOVA (Bedan), Kurmanc, Elewi
	Sungurlu
Uğurludağ (6)	
	KARAKISIK
	RESULOĞLU
	SAZKÖY
	ÜÇDAM, (% 25 Kurd)
	YARIMCA, (% 25 Kurd)
	YENİYAPAN, (% 25 Kurd)
Ortaköy (16)	
	ASARKAVAK Kurmanc, Elewi
	BÜYÜKKİŞLA Kurmanc, Elewi
	CEVİZLİ, Kurmanc, Elewi
	ESENTEPE, Kurmanc, Elewi
	FINDIKLI, Kurmanc, Elewi
	İNCESU, (% 50 Kurd)
	KARAHAÇİP, Sunni
	KAVAKALAN, Kurmanc, Elewi

	KIZILHAMZA, Sunni
	ORUÇPINAR, Sunni
	SALBAŞ, Kurmanc, Elewi
	SENEMOĞLU, Kurmanc, Elewi
	YAYLACIK (Göpsen), Kurmanc, Elewi
	YUKARIKUYUCAK, Kurmanc, Elewi, Canbeg
	ASAGIKUYUCAK, Kurmanc, Elewi, Canbeg
	İMAT
Sungurlu (12)	
	AŞAĞİBEŞPINAR
	ASAYİŞKARAHACI
	BEŞDAM
	BEŞKIZ, Kurmanc, Elewi
	DEMİRŞEHÝ (KALEHİSARI-TEMURLU)
	DEREKİSLA
	HACIOSMAN
	KALENDEROĞLU, Kurmanc, Sunni
	KULA
	MEHMETALİÇİFTLİĞİ
	SARICALAR
	YEŞİLOVA (Kızılbeşik, Büyükkızıl) Elewi
Osmancık (1)	
	BALTACİMEHMETPAŞA, (Karaağaç), Eşra Çakallı, 29/Za/1266 (Hicri): Di navbera Qeza Zeytun û Osmancıkê de li zozana bi navé Karaağaç de ji Eşra Çakallî meriveki bi navé Topizoxli Kurd Bekir hebûyê û li vi gundi hatiyé nişecihkirin.

116 Gund

Gotina dawîyê; bawerim ew nivîsa min amadekirî bibe bingeha lekolî-neka berfireh. Dibe ku li ser lîsta gundan kemasî hebin. Ji bo kemasî û şasitîya leborîna xwe daxwazdikim.



Dimenek ji Gundê Molla Hasan

Çend çavkanîyên din:

Nişanyan, www.nisanyanmap.com, İbrahim Satılmış, Barikatlar Düserken, Ozan Yayıncılık-Anı, 2013
Facebook; Çorum Kürtleri, TC. İçişleri Bakanlığı, Nüfus ve Vatandaşlık Genel Müdürlüğü İstatistikleri
Wikipedia, Google.com

Li vir jî hene

Arvîn Berçemî

Germahîyeke wiha hebû ku mîna ji erdê agir bilind bibe solên di lingan de nerm bûbûn. Binê lingan dişewitiyan. Xwêdan bênavber diherikî û beriya bikeve erdê difirûya. Her havînê di dema esrê de wiha dibû. Mirovênu ku neçar diman biçin derekê yan jî karekî bikin xwe didan ber wê germahiyê. Belê bi salan wiha bû û hîn bûbûn, lê her cara ku ji siyekê yan jî ji derekê hênik derdiketin bêhna wan mirovan teng dibû bi qasî kêliyekê. Bêguman piştî wê kêliyê ji bîr jî dikirin. Rêzwan jî ji wan yek bû ku îcar bêhna wî ne kêliyek, demekê teng bûbû. Tûrê li ser milê wî û çenteyê di destê wî de dikir ku germahîya ji erdê hîn zêde hîs bike û zêdetir xwê bide.

Demalî otogarê li ber siyekê sekinî mîna ku ji malê heta wir henaseya xwe girtibe bi carekê de henaseya xwe berda û bi tiliya beranekê dilopên xwêdanê yên li eniya xwe berhev kir û bi bêhn tengê reşand ser betona germ. Bîst deqe mabû ku otobus bi rê keve. Tiştên xwe da alîkarê ajokar ku tiştên rîwiyan di bin otobusê de bi cih dikir. Kêliyekê li derdora xwe nihêrt, mirovênu ku di nav lezgîniyekê

de bûn şopand û herî zêde guhdariya wan kir. Pir baş dizanibû ku dê heta demekê dengêni wiha nebihîsta û difikirî ku dê qet dengê zimanê xwe nebihîze. Bi dengê alîkarê ajokar cara dawî li derdorê nihêrt û siwarê otobusê bû.

Hundirê otobusê hênik bû û mîna ku cemidî be hinekî bêtevger ma û paşê xwe vezeland. Di cama mezin re derdor temaşe dikir û zanîngeha xwe dianî bîra xwe. Li bajarê ku cîranê bajarê wî bû dixwend û ew havîna yekem bû. Fêm nekiribû ku ew sal çawa derbas bûbû. Havîn hatibû û xwe di nav kar de dîtibû. Neçar bû bixebite. Her havînê di karê avahiyê de dixebeitî û bi wî awayî xwendina xwe didomand. Vê havînê hosteyê wî li bajarê ku bi qasî deh saetan dûr bû kar girtibû. Qet ew qas dûr neçûbû û bajarên ku jê re xerîb dihatin nedîtibû... Cihê xwe xweş kir û xwest rakeve. Çavênu xwe girtibû ku ji paş dengek bihîst. Pîrekê bi dengekî nerm digot ku ew rê naqede. Lê ne xema Rêzwan bû, wî dixwest ku di wê hênikahiyê de rakeve. Lê nekaribû, heta demekê çavênu wî nehatibûn girtin. Piştî bêhnvedana

nîvsætê, gava ku roj diçû ava xewê ew kiribû paşila xwe.

Dema Rêzwan çavêن xwe vekirin rojê ronahiyêن xwe yên pêşin li ser serê darêن li derdora rêtê belav dikirin. Bajarê mezin ji dûr ve xuya dibû. Paytexta tirkan bû û hinek tişt bi wî nas dihatin. Mîna ku berê dîtibe hin avahî gelek nas bûn. Di demeke kin de ketin nava bajêr. Li ber ronahiyekê sor sekînîbûn ku dengê pîran li paş xwe bihîst: “Dîsa neviyêن min dê ji min dûr bisekinin û bi min re neaxifin.” Dengekî din lê zivirand: “Çima tu wisa dibêjî?” Rêzwan di navbera paldankan re bi dizîka li wan nihêrt û gava serê xwe zivirand dengê pîrê yên bixemgîn bihîst: “Ez bi tenê çend peyvên tirkî dizanim û neviyêن me jî kurmancî nizanin. Loma em ji hev fêm nakin.” Kalo bi armanca dilminîkirinê got: “Ma ew ê çawa hîn bibin ku derdora wan hemû tirk in û dê û bavê wan jî bi tirkî diaxifin. Bi awirêن te ji tê fêm dîkin, ziman ne girîng e.” Rêzwan li pêşıya xwe dinihêrt û li ser tiştên ku wan digotin difikirî. Ci zehmet bû ku nevî û pîr ji hev fêm nedikirin û ci xemgînî bû ku pîrê bi zimanê xwe ji neviyêن xwe hez dikir û neviyan fêm nedikir. Xwe bisûd dihesiband ku her du ziman jî baş dizanibû.

Bi axaftinê wan re di nav fikirînê de bû ku bi carekê de dît ku otobus ketibû nava avahiyekê. Bi hişyariya alikarê ajokar re fêm kir ku hatibûn. Çawa daket li hosteyê xwe geriya. Hosteyê wî jê xwest ku ew derkeve qata sêyemîn. Bi matmayî derdor dişopand, otogareke mîna avahîyan çêkiribûn û di her qatê de otobus hebûn. Dicirifiya. Pêşî fêm nekir ji ber xwe xerîb hîs dikir an na. Dûre tê gîhîst ku hewa sar bû. Ji dibistanê dizanibû û hat bîrê ku bişev û serê sibehê sar bû wir... Piştî demeke ku li derdorê geriya hosteyê xwe û çar hevalên xwe yên gelek caran bi hev re xebitîbûn dît. Wan tiştên xwe danîbûn ser hev û li berojê rûniştibûn. Li benda otobusê bûn. Ew jî çû tev li wan bû. Di wê navberê de Rêzwan bajar temaşe kir. Ji qeleha bajarê wî jî bajarê wî wisa xuya dibû. Lê avahiyêن li wî bajarî hîn mezin û pir bûn. Piştî bîskekê otobuseke pir kevn hat û ew siwar bûn. Şaş mabû; li paytexta xwe otobuseke ew qas kevn bi kar dianîn. Nêzî du saetan bi rê de çûn û li gundekî ku mîna ji demêن pir kevn mabû peya bûn. Xaniyêن li derdora rê wiha bûn, lê yên dûr nûjen û gelek xweşik bûn. Li kèleka rê qehwexaneyek û dikanek jî hebû. Li ber qehwexaneyê sekinîn û

hosteyê wî telefona yekî kir û got ku di nava nîv saetê de dê erebeyek were û wan bibe.

Gundiyan bala Rêzwan kişandibû. Pir dışibiya gundiyan bajarê wî; cilên wan, tevgerên wan. Wê gavê pir dixwest dengê wan bibihîze û bi wan re biaxife. Di wê kêliyê de mîrekî navsere di ber wan re derbas bû û silav da wan. Rêzwan bi matmayî li wî nihêrt. Rû, por, simbel û şelwarê wî ew qas nas bû ku wê kêliyê fikirî ku ji bajarê wî hatiye. Nediket serê wî û bawer nedikir ku ew qas bişibin hev. Hîna di nava wê tevliheviyê de bû ku hosteyî wî got ku li qehwexaneyê rûnin û çayê vexwin.

Qehwexaneyeke biçûk bû. Li ber maseyekê çar ciwan rûniştibûn û okey dilîstin, li maseyekê jî çend mîrên navsere çay vedixwarin. Maseya li kîleka ciwanan vala bû. Ew jî çûn li wir rûniştin û çay xwestin. Her kesî bi awayê veşartî li wan dinihêrt û wan jî ne mîna wan lê bi dizikî li wan dinihêrt. Bi hatina wan re bêdengiyek çêbûbû. Gava çayger çay danî pêşıya wan dîsa deng bilind bû di nava qehwexaneyê de.

Rêzwan ji hevalê xwe li kîleka xwe re digot ku ew gund û gundî bi wî nas têن, dengek li ber guhê wî ket.

Bi carekê de sekinî. Li rûyê hevalê xwe nihêrt, hevalê wî bi pistepist pirsî ku ci bûye. Rêzwan tiliya xwe ya şanîdanê bir ber lêvên xwe û bi baldarî guhdarî kir. Îcar dengekî zelal hat û her duyan jîbihist: "EZ niha okeyê li serê te xim tu bibîne." Dengekî din jî bersiv da: "Bavê te jî were nikare okeyê lê xe." Keneke zirav derdor dagir kiribû ku Rêzwan li wan ciwanan nihêrt û rastî awirên xortekî bi bejn û bal hat. Bi qasî kêliyekê li hev nihêrtibûn ku Rêzwan pirsî:

"Hûn kurmanc in?" Xort bi rehetiyeke aşkere got:

"Erê."

"Ji ku ne?"

"Ji vir in." Rêzwan bişirî û bi tatêl pirsî ku ji eslê xwe jî ku ne. Wî xortî bi bişirîn got ku ew ji wir in û kurdên Enqereyê ne. Rêzwan bawer nedikir ku li paytexta tirkan kurd hebin û kurmancî biaxifin. Di rê de gazinca pîrekê guhdar kiribû. Ji maseya kîleka mîrekî navsere şewqeyê di serê xwe de danî ser maseyê. Bi tiliyên quşiyayî porê xwe yê zivîn xurand û di nav simbelan re got: "Li vir jî hene. Li vir jî kurd hene." Rêzwan bi matmayî yek bi yek li wan nihêrt û bi fedokî qultek ji çaya xwe vexwar.

Koçberiya kurdan berbi Swêdê

Rohat Alakom

Kurd berê xwe didin Ewrûpayê

Angorî yek ji wan efsaneyên ku di derbarê Silêman de tê gotin qiral Silêman qasî 500 rihan sîrgûn dike û wan dişîne serê Çiyayê Zagrosê. Paşê ev ev rihên esrarengîz û bisir ku wek cin têñ nasandin berê xwe didin Ewrûpayê bona her yek ji xwe re bedewekê hilbijêre û bi xwe re bîne. Di dawiya van zewacêñ balkêş de kurd peyda dîbin.¹ Angorî şaxeke din Silêman qasî 40 dêwan dişîne Ewrûpayê bona wî 40 jinêñ xweşik bînin. Dema vegerê dibînin ku Silêman miriye. Ew jinêñ Ewrûpayê dîbin yên wan.² Angorî şaxeke vê destanê Silêman bona haremâ xwe nû bike, jinêñ xweşik ji xwe re bîne 500 şervanêñ xwe dişîne Ewrûpayê. Lê belê dema ew vedigerin têñ, mîze dîkin ku Silêman miriye. Ew vê carê van jinan ji xwe re dîbin serê çîyan. Zar û newiyêñ wan li hev zêde dîbin, di dawiya van zewacêñ

bi kîtelevî de bavik û kalikêñ kurdan peyda dîbin.³

Di derbara vê mijarê de nivîskareke emerîkayî E. A. Nolan pirtûkeke zarokan bi forma çîrokan nivîsi. Pirtûk berî du salan bi zaravayê kurmancî û zazakî der çû. Di vê pirtûkê de nivîskar berê 500 kurdan dide Îrlandayê. Kurd bi xalîçeyêñ xwe yên efsûnkirî difirin diçîn Ewrûpayê. Keçen xaman yên îrlandî van kurdan bi dilgermî pêşwazî dîkin. Paşê xortêñ kurd û keçen îrlandî gotinêñ xwe dîkin yek û bi dilşahî vedigerin Kurdistanê.⁴ Di dema seferêñ vîking û xaçperestan de têkiliyêñ gelêñ ewrûpî û kurdan ji mimkûn e bi forma zewac û mîrkirinê pêşta çûne, rîyêñ hin kurdan li Ewrûpayê ketibin. Di dîrokê de çawa em dibînin ji ber sedemêñ cihê gelek kurdan berê xwe dane Rojavayê û çûne derketine Ewrûpayê. Angorî lêkoleran van têkiliyan gelek şop li pey xwe hîstine. Tipêñ porzerîn û

1 Margaret Kahn, *Cinlerin Çocukları*, Avesta, 2002, rûp.11.

2 Ingmar Karlsson, *Inga vänner utom bergen*, 2017, rûp.27.

3 Kurderna, *Aftonbladet*, 2/7 1959.

4 E. A. Nolan, *Hêstirêñ Graniyê*, Apec, 2016. Bona danasîna pirtûkê binêre: Rohat Alakom, Hêstirêñ Graniyê, *Bîrnebûn*, nr 64/2016, rûp.65-67.

çavşîn ku li hin deverên Kurdistanê têr dîtin di dawiya encamên van têkiliyan de pêkhatine. Ev tîpê nordic (bakûrî) gelek bala lêkoleran dikşîne. Çawa tê zanîn zimanê kurdî yek ji wan zimanan e ku di nav zimanên Îndo-ewrûpî de cih digre. Têkiliyên zimanî û çandî yên hevbeş di nav komên neteweyî de bala gelek lêkoleran kişandiye. Kurdîstan û Ewrûpa dîsa nêzîkî hev dibin.

Di encamên şer, pevçûn, lêdan û sîrgûnê de gelek kurd mecbûr mane welatê xwe hîştine çûne gelek herêmên dûr û biyanî. Van bûyeran şopa xwe di folklorâ kurdî ji hiştiye.⁵ Herêmên ku di dîrokê de wek Trakya, Rumelî û Balkan hatine navandin gelek caran bûne mekanên kurdan. Wek mînak di sedsalâ 15an de perçeyê Stembolê yê Ewrûpayê sê gundêن kurd saz bûne. Bi sîrgûn çûne wir. Ji ber êrişen moxolan kurdan berê xwe dane Rumeliyê. Hebûna kurdan li Balkanê bûye mijara lêkolînekê.⁶ Ji çavkaniyên dîrokî em fêr dibin ku Bedirxan Paşa xwestiye xwendekaran bişîne Ewrûpayê. Di dawiya vê serhildanê de dewlet gelek

kurdan dişine sîrgûnê, hinek ji wan wek mînak têr Nîvgrava Balkanê. Jineke kurd ji herêma Maraşê bi navê Fata Reş di sala 1854an de bi 300 sîyarêن xwe ve tevayî diçe Stembolê û li ser Bûlgarîstanê re diçe tevî Şerê Qirimê dibe. Angorî rojnameyekê dema vegerê tenê ji wan 300 sîyariyan 12 kes li bal hebûne.⁷ Gelo ci hate serê wan 288 kesen din? Hin kurd tek tek di demên cihê de hatine Ewrûpayê. Sîyarekî kurd di manevreya leskerî ku di sala 1835an de ji aliyê Prusya û Rusyayê de li Polonyayê çêdîbe bi tevgerên xwe yên akrobatik serketineke mezin nîşan dide. Ev kurdê ji aliyê Surmeliyê paşê tê Berlinê.⁸ Belkî jî ev kes kurdê yekem e ku vî bajarî ziyaret dike. Di sedsalâ 19 û 20an de çend kurd wek ìnformator û alîkarân rohilatnas û kurdologan hatine Ewrûpayê. Wek Ehmet Xan ji eşîra Baban ku di sala 1853an de hatiye Parîsê ligel Chodzko Alexander di derbarê zavarayên kurdî de kar kirine.

Di sedsalâ 20an de êdî kurd rêya Ewrûpayê baş fêr dibin. Gelek kurd li welatên Ewrûpayê cîwar dibin,

5 Rohat Alakom, "Kambaxa vê sîrgûnê" - Di Folklorâ Kurdi De Stranen Xeribiyê, *Bîrnebûn*, nr 29/2006, rûp.36-45.

6 Ali Husein Kerim, *Balkan Yarımadası'nda Kürtler*, Evrensel, 2011.

7 Turkiet, *Göteborgs Handels- och Sjöfartstidning*, 28/10 1854.

8 Rohat Alakom, Kurd li Polonyayê (1835), <http://krd.riataza.com/2017/06/10/kurd-li-polonyaye-1835/> (Reya Teze, 10/6 2017).



Kurdên Swêdê di meşke Yekê Gulanê de (1966)
“Aşitî ji kurdan re- Aşitî ji Rohilata Navîn re”

dixwînin û dixebeitin. Kurdên ku di nav Cemîyeta Îttîhat û Terakkiyê de cîh girtibûn bona textê Siltan Evdilhemîd bînin xarê li gelek wela-tê Ewrûpayê belav bûbûn, wek Abdullah Cevdet û Îshak Sukutî. Di sala 1913an de li bajarê Lozanê xwendekarên kurd besa Lozanê ya *Komeleya Xwendekarên Kurd-Hêvî* saz dikan. Xwendekarên kurd ku li hemû Ewrûpayê dimînin di sala 1956an de li bajarê Almanyayê, Wiesbadenê bi navê *Komeleya Xwendekarên Kurd li Ewrûpa* saz dakin. Cara yekem e ku rêxistineke kurd peyva Ewrûpayê li navê xwe zêde dike. Ev rêxistina heta salêن

1976 qasî bîst salan hebûna xwe her berdewam dike. Hejmara endamên wê dighêje 600 kesan. Ev komeleya bi salan bi navê xwe yê îngîlizî ve hatiye nasîn: *Kurdish Students Society in Europe* (KSSE).⁹ Di nîvê yekem ê sedsala 20an de kurdên wek Şerîf Paşa, Leyla Bedirxan û Silêmanê Kurd piraniya salêن xwe li Ewrûpayê derbas kirine. Di salên 1960î de bi sedan kurd wek kar-ker koçberî Ewrûpayê dikan. Îro hejmara wan gîhiştiye mîlyon û nîvekî. Tenê li Almanyayê ji herçar perçeyên Kurdistanê qasî ji nîv mîlyonî zêdetir kurd dijîn. Li jêr jî em ê bi hûralî bibînin ku li wenatekî

9 Rohat Alakom, Kurd ketin defteran – Pêncî saliya sazbûna KSSEyê (1956), *Malpera Nefelé* (21/11 2006).

piçûk wek Swêdê ûro qasî 100 hezar kurd dimînin.

Kurdên Swêdê 50 saliya xwe tijî kirin

Sala (2015) Kurdên Swêdê 50 saliya xwe tijî kirin. Ji ber vê bûyerê li Pirtûkxaneya Kurd li Stockholmê çend çalakî hatin pêşkêş kirin.¹⁰ Di van çalakiyan de herwiha kurdên ku pêşiyê hatine Swêdê peyivîn. Ev 50 sal in ji her never, herêm û besên Kurdistanê mirov hatine/tên Swêdê. Ûro hejmara wan li dora 100 hezarî tên hesibîn. Sala 2015an dema Kurdên Swêdê 50 saliya hatina xwe ya Swêdê pîroz dikirin zêdetir nûçeyeke nebixêr bala wan kişand. Alan Kurdî, ew zarokê 3 salî ku pêlên Behra Spî bedena wî a piçûk daqurtand û anî avîte ber reşahiya Rojavaya Tirkîyê bona mirovahiyê bû ibreteke mezin. Angorî agahiyên rojnameyan Alan ligel malbata xwe berê xwe dabû welatê Swêdê, lê belê pê re negîhand û ew fîrsend nedît wekî gava xwe bavêje vî welatê Bakûrî.¹¹ Piştî vî wêneyî dinya wek tê zanîn rabû ser

pêyan, dilê bi mîlyonan mirov bona Alan lêda! Kurdên Swêdê serpêhatiya Alan jî kirin perçeyekî dîroka xwe, dan ser seran, ser çavan!

Penaberê pêşîn li Swêdê: Silêmanê Kurd (1911-1981)

Berî ku kurd di sala 1965an de li Swêdê komekê pêk bînin çawa em dibînin tek tek hin kurd hatine Swêdê, ji wan çend heban jîyana xwe li wir derbas kirine, wek Silêmanê Kurd û Selahaddîn Rastgeldî. Ji van kesan Silêmanê Kurd ku di sala 1929an de hatiye Swêdê wek yekem kurd, yekem koçber û penaberê kurd tê hesibîn. Silêmanê Kurd di dawiya Şerê Cihanê yê Yekem de (1918) hemû endamên malbata xwe winda dike. Berê xwe dide Tiflisê. Ji wir jî diçe çend gundênen alman, rûs û swêdiyan ku li Ukranyayê hebûne kar dike. Li gundê swêdî malbatek li vî zarokê kurd xweyî derdikeve û di sala 1922an dike ewladê xwe. Silêmanê Kurd êdî di nav swêdiyan de wek Alexander Knutas tê nasîn.¹² Sela-

10 Bi hevbendiya Pêncî Saliya Kurdên Swêdê di sala 2015an de li Pirtûkxaneya kurdî de hin çalakî hatin çêkirin wek semînera bi navê 50-saliya Kurdên Swêdê (9/5 2015) û paneleke bi navê 50 sal li Swêdê: Kurdên pêşîn dipeyivîn (10/10 2016). Kesên wek Cemal Alemdar, Omer Şêxmûs û Reşo Zilan tevî vê panelê bûn.

11 Drunknade treâringen Alan var på väg till Sverige, *Dagens Nyheter*, 9/4 2015. <https://www.dn.se/nyheter/varlden/drunknade-trearingen-alan-var-pa-vag-till-sverige/> (DN 4/9 2015)

12 Rohat Alakom, *Silêmanê Kurd li Swêdê*, Apec, 2018.

haddîn Rastgeldî ku di sala 1947an de hatiye Swêdê wek xwendekarê kurd yê yekem li Swêdê derbasî dîrokê bûye.¹³ Silêmanê Kurd di sala 1981an de û Selahaddîn Rastgeldî di sala 1986an de li Swêdê çûye dilovaniya xwe. Çawa em dibînin berî sala 1965an, deh salan, bîst salan carê kurdek li Swêdê peyda bûye û têkiliyên wan ligel hev çênebûne. Ji ber vê yekê mirov nikare qala Kurdêن Swêdê bike. Berî van koçberan çend kurdêن din jî di salêن gelek kevn de hatine Swêdê, lê belê ew kesan bi jîyanake demî li Swêdê mane, paşê ve geriyane çûne welatêن din hêwirîne, wek Şerîf Paşa¹⁴ û Leyla Bedirxan.¹⁵ Seredan û hatina van kesan bêgûman dîroka têkiliyên swêdî-kurdî yên beri koçberiya Kurdêن Swêdê rengîn dike.

Koma kurdêن Swêdê pêk tê (1965)

Kurdêن ku cara pêşin di sala 1965an de hatine Swêdê û koma Kurdêن Swêdê pêk anîne ev kes bûne: Cemal Alemdar, Îbrahîm Mamxidir, Seîd

Evdilrehman, Seîd Dizeyî. Ji van kesan Cemal Alemdar heta niha jî li Swêdê dijî. Cemal Alemdar di sala 1968an de wek nûnerê kurdan li Îskandînavyyayê tê hilbijartîn û dibe yek ji wan aktîvistên kurdan. Hemû ev kesan ji Kurdistana Iraqê bûne. Ji wan hin kesan ji Tirkîyê dixwendin. Çend kes ji wan di sala 1963an de li Tirkîyê tên girtin. Angorî agahiyêن rojnameyêن van salan ji ber çalakiyên kurdewariyê û kurdîtiyê dozgerê tirk di dadgehê de îdama van kesan daxwaz kiriye.¹⁶ Dema serbest têن berdan di sala 1965an têن Swêdê. Bi hatina van kurdan êdî cara pêşin li eyî cîhî ji du kesan zêdetir kurd li Stockholmê dijîn. Ji ber vê yekê dîroka Kurdêن Swêdê bi sala 1965an dest pê dike. Piştî çend mehan çawa em dibînin di çapemeniya swêdî de êdî cara pêşin nûçe derdi Kevin ku bi sergirtî qala Kurdêن Swêdê dijîn, dikin. Mirov di van nûçeyên jêrîn de jî dibîne ku di demêن pêşin de van kurdan - ji ber telûkaya tolhilda-na dewletêن wek Iraqê- navêن xwe bi vekirî ji rojnamevanêن swêdî re

13 Rohat Alakom, *Xatirê Te Stockholm! Selahaddin Rastgeldî*, Apec, 2016.

14 Rohat Alakom, General Şerîf Paşa li Stockholmê, *Nûdem*, nr 16/1995, rûp.13-26.

15 Rohat Alakom, Prensesa Kurdistânê Leyla Bedirxan li Stockholmê (1925), di nav pirtûka: *Jinêن Kurd di Çavkaniyêن Swêdî de*, Apec, 2016. rûp.61-69. Herwiha vê nivîsa bi tirkî binêre: Leyla Bedirhan Stockholmâda (1925), *Toplumsal Tarîh*, nr 259/2015, rûp.86-88.

16 Gizli Teşkilat Kuran 8 Kürt Tevkif Edildi, *Milliyet*, 15/8 1963. 23 Kürtçü Sanığın Duruşması Başladı, *Milliyet*, 18/12 1963.

eskere nekirine. Wek mînak di sala 1965an de rojnameya swêdî Aftonbladetê di derbarê Kurdistana Başûr de nûçeyekê belav dike. Nûçe û şirove ji aliyê rojnamevan Anders Johansson de amade bûye. Di beşeke vê nûçeyê de wiha tê gotin: “Înformatorê min îdîa dike ku “Tiştên ku li welatê min didome ji demên berê gelek xirabtir e”. Ew kesekî penaber e ku naxwaze navê xwe eskere bike. Ajanê Bexdayê li herderê hene, dibêje. *Ew li Swêdê benda rojên xweş li Kurdiştanê ye. Ew, yek ji wan sedan xwendekaran e ku li derweyî welêt dimînin*”.¹⁷ Mirov ji vê nûçeyê dikare fam bike ku ev xwendekar ji Kurdistana Başûr e. Bi saya vê nûçeyê mirov zane ku li Stockholmê kurd hene ku doza kurdî angorî îmkanê xwe yên piçûk û sînorkirî didin nasandin. Di destpêka sala 1966an vê carê rojnameya *Svenska Dagbladet* nûçeyeke bi vê sernivîsê diweşîne: “*Kurdeki li Swêdê qala tekoşîna azadiyê ya 5 salan dike*”. Rojname herwisa dînivîse ku vî xwendekarê kurd ev agahiyan li Dêra S:ta Clara li Stockholmê

pêşkêşî wî kiriye.¹⁸ Ev rojname jî navê vî kurdî nadî û mirov nizane gelo ev herdu xwendekarênu ku di van nûçeyan de qala wan tê kirin, eynî kes e yan jî du kesen cihê ne. Rojnameya *Expressenê* di nûçeyeke xwe de qala “koçberêkî kurd li Stockholmê” dike.¹⁹ Di sala 1966an de rojnameya *Dagens Nyheter* cara pêşin navê penaberekî kurd dide ku ev saleke e li Stockholmê dimîne, rojname navê wî wek Seîd Evdilrehman pêşkêş dike.²⁰

Jimareke rojnameya Aftonbladetê ku di sala 1974an de weşiyaye dîyar dike ku kesekî bi navê Seîd Dizeyî ku berî salan li Swêdê xwendîye vê gavê li Iraqê di radiyoya kurdî de kar dike.²¹ Wek li jor jî xuya dike rojnameyê swêdî wek çavkanî tek tek qala kurdan dîkin ku di salên 1960î de hatine Swêdê.

Di sala 1965an de cara pêşin ji du kurdan zêdetir kurd di eynî salê li Swêdê hêwirîne, jîyane, komeke piçûk pêk anîne. Koçberiya kurdan ji 1965an şunda bi navbirêne gelek kurt heta niha her berdewam her kiriye, nesekiniye. Belê, mirov

17 Så här berättar en flykting om ett ”glömt” krig, *Aftonbladet*, 14/7 1965.

18 Kurd i Sverige berättar om 5-årig frihetskamp, *Svenska Dagbladet*, 6/3 1966.

19 Nödrop, *Expressen*, 26/5 1966.

20 Svenska kurdkommittén begär FN: aktion av UD, *Dagens Nyheter*, 17/5 1966.

21 ”Kurdistan röst” talar svenska, *Aftonbladet*, 4/7 1974.

bi rehetî dikare bêje ku Swêd di sala 1965an de bûye welatê kurdan. 1966an de nûçeyeke gelek balkêş û giring di rojnameya *Dagens Nyheter* de hatiye weşandin. Ev nivîsa li ser pîrozkirina Cejna Yekê Gulanê ye. Nûçehîganê rojnameyê bi dûr û dirêj qala pîrozkirina vê cejnê dike. Di cîhekî vê nivîsê de rojnameyan bi sernivîseke piçûk dîyar dike ku di meşa Yekê Gulanê de koma here balkêş ew koma kurdan a piçûk bûye ku di vê meşê de beşdar bûye. Navê vê koma kurdan “**Ekîpa kurdan**” (*Kurdisk patrull*) hatiye dayîn. Di vê nûçeyê de tê gotin ku li Stockholmê ev şes penaberên kurd ji Kurdistana Iraqê ne û penaberên politîk in. Du keçen swêdî ku cil û berg, kincên kurdî li xwe kirine û xwe dane pêşiyê jî sempatîzanên kurdan bûne.²² Ev nûçeya dawî wek dokument nîşan dide ku hejmara kurdan ji du kesan zêdetir e û kurdan piçûk be jî êdî komek li Swêdê pêk anîne. Çavkaniyêñ devkî jî van zanyariyan piştrast dikan. Êdî em bi saya çavkaniyêñ nivîskî û devkî bi rehetî dikarin qala Kurdêñ Swêdê bikin. Piraniya van kurdêñ ku di salêñ 1965 û ji wir şunda

hatine ligel swêdiyan zewicîne, zarak û newiyêñ wan ên swêdî-kurdî iro êdî mezin bûne. Ji bo nivîsîna dîroka Kurdêñ Swêdê (1965-2015) divê ew salêñ pêşîn, bi taybetî ew salêñ destpêkê (1965-1970) baş bêñ zanîn ku dîroka Kurdêñ Swêdê li ser hîm û bingehêñ xurt bi kronolojîk bê ava kirin.

Yek ji wan kesên ku di sala 1966an de ji Kurdistana Tirkîyê hatiye Swêdê Bedirxan Anter e ku di nav kurdan de zêdetir wek Bedo Anter hatiye nasîn. Di hevpeyvîneke sala 1967an li ser rewşa Kurdistana Tirkîyê agahîyan dide rojnameya *Aftonbladetê*. Bedo Anterê ku wê demê 26 sal bûye li Uppsala'yê beşa matematîkê xwendîye. Ew dîyar dike ku sefereta Tirkîyê naxwaze pasaporta wî dirêj bike. Sedemê vê yekê jî kurdbûna wî û li ser kurdan dayîna sê semîneran bûye. Bedirxan Anter yek ji wan kesan e ku cara pêşîn hatiye Swêdê, bajarê xwendekaran Uppsala'yê.²³ Di sala 1967an de nivîseke Bedirxan Anter vê carê di rojnameya *Uppsala Nya Tidning* de tê weşandin. Tiştekî gelek balkêş jî di binê vê nûçeya dirêj de “*Komeleya*

22 Kurdisk patrull, *Dagens Nyheter*, 2/5 1966.

23 Hans regering vill tvinga honom lämna Sverige..., *Aftonbladet*, 29/3 1967.

Xwendekarên kurd li Europa-Beşa Swêdê” (Kurdiska Studenternas Förening i Europa, Sveriges Gren) hatiye nivîsin.²⁴ Ev nûçeya nîşan dide ku kurd ji der Stockholmê herwisa hatine bajarê xwendekaran, bajarê Uppsalayê. Weşandina vê nûçeyê dîroka bajarê Uppsalayê jî dixemilîne. Paşê çend kesên din jî ji malbata Anteran koçberî Swêdê kirine. Koça kurdan berbi Swêdê yek bi yek, kêm be jî her berdewam kiriye. Wek mînak di sala 1967 Omer Şêxmûs û di sala 1969an de Memo Yetkîn li ser Îngilterê û Polonyayê re têr Swêdê. Omer Şêxmûs di bîranînên xwe de dîyar dike ku di van salan de 6 kurd li Swêdê hebûne, çar heb ji Kurdistana Başûr û du kes ji Kurdistana Tirkiyê.²⁵

Komîteya Kurdî ya Swêd (Svenska kurdkommittén)

Ji aliyê rîexistinî de di sala 1966an de bûyereke gelek êrînî cara pêşîn li Swêdê diqewime. Ev kurdên pêşîn ku di sala 1965an de hatine (Cemal Alemdar, İbrahim Mamxidir, Seîd

Evdilrehman, Seîd Dizeyî) ligel Dr. Selahaddîn Rastgeldî ku beri wan hatibû Swêdê (1947) û bi hevkariya çend swêdiyan roja 28/3 1966an de Komîteya Kurdî ya Swêd (Svenska kurdkommittén) saz dîkin.²⁶ Di civîna sazkirina komîteyê de wek kurd Selahaddîn Rastgeldî, Cemal Alemdar, Seîd Dizeyî û qasî deh swêdî, dostêr kurdan beşdar bûne.²⁷ Xanimeke swêdî Märta Hansson dibe serekâ wê. Di sala 1967an de vefat dike, li cîhê wê Olof G Tandberg dibe serekê komîteyê.²⁸ Doxtorê kurd Selahaddîn Rastgeldî bi navê komiteyê diçe Kurdistana başûr û piştî vegera xwe pirtûkeke swêdî “Şerê Jibîrkirî” (Det glömda kriget) daye weşandin.²⁹ Him sazbûna vê komîteyê û him jî weşandina vê pirtûkê gelek deng vedaye, swêdî di derbarê kurdan de zêdetir bûne xweyê agahî û zanyariyan. Komîteya kurd çalakiyên xwe berdewam dike heta ku kurd di sala 1970yî de dighêjin mafê otonomiyyê. Selahaddîn Rastgeldî dema vê gera xwe de qelemekê dîyarî Barzanî dike ku

24 Hot och terror mot kurderna, *Uppsala nya tidning*, 24/11 1967.


25 *Invandring, forskning, politik* -En vänbok till Tomas Hammar, CEIFO, 1993, rûp.151.

26 Svenska kurdkommittén begär FN: aktion av UD, *Dagens Nyheter*, 17/5 1966.

27 Protokola sazbûna komîteyê (28/3 1966). Nîmûneyeke vê dokumentê di arşîva nivîskar de ye.

28 Märta Hansson-In Memoriam, *Svenska Dagbladet*, 7/9 1967.

29 *Det glömda kriget-Rapport från Irakiska Kurdistan*, Natur och Kultur, 1967. Utgiven av Svenska kurdkommittén.



Dersêñ zimanê kurdî li Swêdê ku di sala 1970yî de ji aliyê
Kamuran Bedirxan de hatine dayîn

Märta Hanssonê bi navê komîteyê jê re şandiye.³⁰ Kurdên Swêdê bi xurtî piştgirtiya Tevgera Kurdên Başûr dikan. Herman Lindqvist rojnamevanê ku paşê li Swêdê dibe dîrokzanekî navdar jî di bîranînê xwe de qala bûyereke balkêş dike. Dema çûye Kurdistanê li wir rastî Barzanî hatiye. Dem sohbetê xencereke ku li bal Barzanî hebûye ba-la wî dikşîne. Lindqvist dema dibêje “Çi xencereke xweş e” Barzanî tavilê wê ji nav kembera xwe derdixe, dîyarî vî rojnamevanê swêdî dike. Lind-

qvist dîyar dike ku heta niha jî wî ev xençer parastiye, di dîwarê oda wî ya xebatê de wisa dardakirî maye.³¹

“Sefîrê kurd”

Di sala 1966an de ronakbîrê kurd Îsmet Şerîf Vanlı seredana Swêdê dike û ligel swêdiyan gelek têkiliyan pêk tîne. Rojnameya Expressen wî wek “sefirê kurd” (kurdiske ambassadören) dinavîne.³² Eynî rojname rojtira din qala “sefirê kurd ê gerok” (den resande kurdiske ambassadören) dike.³³ Ev seredana

30 *Det glömda kriget-Rapport från Irakiska Kurdistan*, 1967. Utgiven av Svenska Kurdkommittén, rûp.16.

31 Herman Lindqvist, *Mitt i allt*, 2012, rûp.143.

32 *Expressen*, 27/5 1966.

33 TV igår, *Expressen*, 28/5 1966.

ji bo koma Kurdên Swêdê jî dibe piştgirtî û alîkariyeke mezin.³⁴ Di sala 1970yî de Kamuran Bedirxan seredana Swêdê dike, têkiliyên xwe ligel Kurdên Swêdê pêsta dibe. Ev seredanan nîşan didin ku êdî pêwenî û têkiliyên kurdên ku li her welatê Ewrûpayê dijîn heta Swêdê berfireh dibin.

Kurd êdî wek komekê têñ navandin

Kurd di salên berê de wek “*Pena-berên Kurd li Swêdê*” (Kurdiska flyktingar i Sverige) hatine navandin.³⁵ Di sala 1967an de em ïfadeya “*Kurdên nefîbûyî li Stockholmê*” (Ex-ilkurder i Stockholm) jî di rojnameyan de dibînin.³⁶ Tiştekî balkêş jî em cara pêşin di medya swêdî de rastî ïfadeya “*Koloniya kurd li Stockholmê*” (Den kurdiska kolonin i Stockholm) têñ. Di sala 1970yî de koloniya kurd cara yekem cejna Newrozê li Swêdê pîroz dike. Di rojnameya Dagens Nyheter de peyva Newroz wek “Nouroz” derbaz dibe.³⁷ Di sala

1970yî de *Komela Xwendekarêñ Kyrd li Ewrûpa* li Stockholmê kongra xwe ya çardemîn pêk anije. Qasî 150 xwendekarêñ kurd ji 14 welatê Ewrûpayê, di sala 1970yî de li Swêdê civiyane. Ev cara pêşin bû evqas zêde kurd li Swêdê dihatin bal hev. Ji beşa Swêdê qasî 17 kes di vê kongrê de besdar bûne û kongrê pênc rojan ajoitiye. Eynî rojname dîyar dike ku li Ewrûpayê qasî 600 xwendekarêñ kurd hene.³⁸ Ji van xwendekaran hin kes paşê venegeriyane, li Swêdê mane, wek Mihemmed Kamil, Ebdulhamid Deqori û Kemal Cengiz. Ev civîna wek *Kongra Stockholmê* derbasî dîroka Komela Xwendekarêñ Kurd li Ewrûpa bû. Wek em li jor jî dibînin hejmara xwendekarêñ kurd di sala 1970yî de gîhiştiye 17 kesan. Herwisa kurdine din Selahaddîn Rastgeldî û birayê wî Kemal Rastgeldî wek karmend li Swêdê kar diki-rin. Selahaddîn Rastgeldî (1927-1986) kurdê pêşin e ku wek xwendekar di sala 1947an de hatiye Swêdê.³⁹

34 Kurder begär FN-aktion för att stoppa gaskriget, *Svenska Dagbladet*, 28/5 1966.

35 Protokola sazbûna komîteyê (28/3 1966). Nimûneyeke vê dokumentê di arşîva niviskar de heye.

36 Turkiska regeringen anklagas för förtryck av kurdisk minoritet, *Dagens Nyheter*, 3/7 1967.

37 Kurdiskt nyårsfirande under veckohelgen, *Dagens Nyheter*, 21/3 1970.

38 Kurder möts i Stockholm: Vi kämpar för självstyre, *Svenska Dagbladet*, 2/8 1970.

39 Rohat Alakom. Urfa Tarihine Hayran Bir Kürt Selahaddin Rastgeldi, *Kürt Taribi Dergisi*, nr 21/2015, rûp.4-13. Kurdeki heyranê dîroka Rihayê, *Nûbihar*, nr 133 /2015, rûp.10-21. *Xatirê Te Stockholm!*

Selahaddin Rastgeldi, Apec, 2016.

Koçberiya kurdên Anatoliyê
Îro bi deh hezaran kurdên ji Anatoliyê li Swêdê dijîn. Piraniya wan di salêن 1960î de ji wan gundêن derdorê Qoniya û Enqereyê hatine. Beşek ji wan bi hemû şeniyê gundêن xwe koçberî Swêdê kirine wek gundêن Omera û Celeb. Kesê ku ca-ra pêşin Swêd wek welitekî pêşketî li Tirkiyê daye nasandin û ji koçberiya karkerêن tirk û kurd re rê veki-riye berçavksazekî (optiker) bi navê Abdullah Arihan bûye ku li paytextê Tirkiyê dima û kar dikir. Gelek kesên bêkar di van salan de dixwa-zin herin Swêdê, li wir kar bikin bona hine pere bidin hev û careke din vegeerin welatê xwe. Ev koçberiya heta niha jî berdewam e. Dema hej-mara wan li Swêdê zêde dibe vê carê ev yeka bala rojnameyên swêdî jî dikşîne û rojname nûçegîhanên xwe dişînin vê herêma Quliyê (Kulu) bi-zanibin ka sedemên vê koçberiya mezin ci ye.⁴⁰ Dema mamosteyek ji şagirtê xwe dipirse: “*Tu mezin bibî tu ê bibî ci?*”, şagirt wiha bersîva wî dide: “*Ez ê herim Swêdê*”.⁴¹

Kurdên ku di sala 1966an de ji Anatoliya Navîn wek karker

hatibûn xwe hê wek kurd nedidan nasandin.⁴² Navêن wan bi kurdan re girêdayî, bi hevahengî nedihate behs kirin, hin caran ev kurdan wek mînak “hemwelatiyê Tirkiyê” dihatin bi nav kirin. Lê belê hêdî hêdî haya wan ji kurdbûna wan çêdibe û zanava xwe ya kurdî (nasnameya) derdixin pêş. Wek mînak Rifkî Celeplî ku di 1967an de ji Anatoliya Navîn hatiye Swêdê dibêje ku dema di sala 1969an de çûye bal doxtorê kurd Selahaddîn Rastgeldî ji bo raporekê bistîne wî jê re qala kurdbûna xwe kiriye.⁴³

Di sala 1966an de rojnamey-ekê tirkî dinivise ku kurd li Swêdê propagandaya kurditiyê dikan. Piştî mehekê Rastgeldî li hemberî van dî-tinan nivîsekê ji rojnameyê re dişîne û van dîtinan di cîh de nabîne. Roj-namevanekî bi navê Orhan Türel ji Stockholmê dinivise ku Rastgeldî hin xwendekarêن ku bi rêya veşartî hatine Swêdê, li wir dide xwendin û karkerêن ku hatine Swêdê jî ji swêdiyan re wek “*Kurdên ji Tirkiyê sîrgûnbûyi*” bi çavekî negatîf dide nasîn. Wî bi van peyvîn “*Kurdên ji Tirkiyê sîrgûnbûyi*” xwestiye bêje

40 Utpekat nekar till bondfångeri, *Dagens Nyheter*, 26/10 1966.

41 Utvandrarstaden, *Svenska Dagbladet*, 22/10 2006.

42 *Invandring, forskning, politik* -En vänbok till Tomas Hammar, CEIFO, 1993, rûp.151.

43 Hevpeyvîn ligel Rifkî Celeplî, Stockholm (22/9 2015).



Komeke Kurdên Anatoliyê ku koçberî Swêdê kirine

ku Rastgeldî bi kurdên Anatoliyê re têkilî daniye û li wan xweyî derketiye. Angorî Rifkî Celeplî çend kesen ku cara pêşîn ji Anatoliya Navîn hatine Swêdê ev kes in: Yusuf Ulusoy (1965), Cemal Balci (1965), Hüseyin Uludax (1965), Haci Suvakçî (1965), Fevzi Sutci (1965), Kadir Sutci (1964) û Mehmet Suvakçî (1964). Ji van kesan Mehmet Suvakçî ku di sala 1964an de hatibû hinekî swêdî zanibû û ji kesen din re carina wergerî jî dikir.⁴⁴ Wergêrê wan tirkekî bi navê Ergun Esrek, navê jina wî ya swêdî Gunilla Esrek

bûye. Di sala 1951an de zewicîne. Ev yeka tê wê wateyê ku hin tirk berî salan hatine Swêdê. Di rojnameya Svenska Dagbladet de tê gotin sendikayêñ swêdî kesekî bi navê Ahmet Ergîn Day anîne ser kar wekî alîkariya kesen ku ji Tirkiyê, Irak û Îranê têni bike.⁴⁵ Ahmet Ergîn Day di navbera salên 1966-1969an de dibe serekê *Komelaya Karkerên Tirk li Swêdê*.⁴⁶ Di sala 1966an rojname dinivîsin ku qasî 3000 kes hene ku ji Tirkiyê hatine Swêdê. Di nav wan de kurd jî hebûne.

44 Hevpeyvin ligel Rifki Celeplî, Stockholm (22/9 2015).

45 Delegation till Turkiet, Grekland för att hejda spontan invandring, *Svenska Dagbladet*, 20/11 1965.

Rojname dinivîse ku navê vê komelê yê fermî bi swêdî wiha bûye: Turkiska arbetarnas förening i Sverige.

46 Turkiska arbetarförening har bildats i Stockholm, *Svenska Dagbladet*, 25/4 1966.

Karkerêñ kurd rêxistina xwe saz dikan

Di sala 1976an de komeleya kurdî ya pêşin bi navê *Komeleya Karkeran a Kurdî-Swêdî* saz dibe. Piraniya kurdên ji Anatoliya Navîn hatine di nav refêن vê komeleyê de cih dignin. Paşê hejmara komele û saziyên kurdî her diçin zêdetir dibin. Di sala 1981an de çend komele dighêjîn hev û *Federasyona Kurd* (Kurdiska Riksförbundet) saz dikan. Salekê şunda kovara kurdî *Berbang* ji aliyê Federasyona Kurd de derdikeve. Îro ji sedî zedetir komeleyên kurd li Swêdê hene. Ne tenê komele, gelek saziyên din jî ava dibin.

Kurd bûne perçeyekî dîroka swêdî

Ev dîroka koçberiya kurdan qasî lêkolerên kurd dîrokzanêñ swêdî jî eleqedar dike. Bi pêşengiya dîroknas û lêkolerên swêdî berhemekê ku ji heyşt cildan pêkhatî berî demeke nêzik bi navê *Dîroka Swêdî* (Sveriges historia) hat weşandin. Nivîsa vê dîroka Swêdê wek proje di sala 2009an de destpêkir heta sala 2013an berde-wam kir. Ev berhema bingehîn ji

heyşt cildan pêk tê. Cildê dawîn dîroka Swêdê ya salêñ 1962-2012an daye ber çavan. Çawa li vir jî xuya dibe ev perîyoda nêzî beramberî 50 saliya Kurdên Swêdê dike. Di çend cîhêñ vî cildê dawîn de qala kurdan jî tê kirin. Mirov dikare bêje ku kurd di pêncî saliya xwe de bûn perçeyekî dîroka Swêdê jî. Di cîhekî de tê gotin ku di nav wan komên ku berî salêñ 2000an hatine Swêdê de kurd komeke koçberên Kurdistanê pêk tîne.⁴⁷

Di pirtûkê de dema jîyana muzikê tê kirin di cîhekî de tê gotin ku wek mînak di nav kesên xelata mûzîkê ya bi navê *Grammis* wergirtine hin kes hene ku ji welatên din hatine, di nav wan de hunermendêñ ji Kurdistanê jî hene.⁴⁸ Mijareke gelek baş jî ew e ku dîrokzanan ku ev pirtûk nivîsîne ew xeletî û şaşiyên ku di medya swêdî de kurd kiribûn hedefêñ êrişan serrastkirine û kurd bi rûsipî derbasî dîroka Swêdê kirine. Angorî van dîrokzanan wan hewlidayînêñ ku xwestin nîşan bidin ku tiliya kurdan di bûyera kuştina Olof Palme de heye hin delîlêñ xurt pêşkêş nekirin û di

47 Kjell Östberg & Jenny Andersson, *Sveriges historia (1962-2012)*, 2013, rûp.21.

48 Kjell Östberg & Jenny Andersson, *Sveriges historia*, rûp.341

dawiyê de pûç derketin.⁴⁹ Ev lêkoler herwisa jî li ser bûyera kuştina keça kurd Fadîme Şahîndalê disekinin û dîyar dikan ku kuştinêni bi vî tehrî bi çandêni cihê re nikarin bêni girêdan. Di her civat û çandan de mirov rastî kuştinêni bi vî awayî tê. Lêkoler zêdetir berê xwe didin civat, sazî, raman û dîtinêni hukim-mêr (patriarkalisk).⁵⁰ Vê keça kurd bona ku bîghêje dilketiyê xwe, bona evînê mirin jî da ber çavan. Di dawiyê de bona vî cesaretê xwe li Swêdê wek leheng û qehreman-ekê hate binavkirin.⁵¹ Lêkoler û dîrokzan êdî besa “*dîroka swêdî ya kurdan*” (kurdernas svenska historia) dikan. Îro bi sedan kurd hene ku li ser axa Swêdê çavêni xwe vekirine, hatine dinê, herwisa bi sedan kesan li ser vê axê çavêni xwe dane hev û hatine veşartin.

Goristanêni kurd jî hêdî hêdî li Swêdê pêk têni. Kurd di dawiyê de bûne xweyê du welatan: Kurdistan, Swêdê.

Destêni wan ji herdu welatan jî nabe! Bi hestêni (hîs) du-welatiyê dijîn. Li alîkî wan bi rengê kesk, sor û zer ala Kurdistanê dimilmile, li alîyê din bi rengê şîn û zer ala Swêdê.

Rengê hevbeş ango rengê zer dildariya kurdan a du-welatiyê sembolize dike. Belê bajar û taxêni wan jî dîroka xwe ya kurd dinivîsin.⁵² Kurd ne tenê bûne beşeke dîroka swêdî herwiha bûne beşeke edebîyata vî welatî. Gelek nivîskarêni swêdî lehengêni xwe ji nav koma kurdan hildibêrin.⁵³ Kurdên Swêdê di sala 2065an de wê 100-saliya hatina xwe pîroz bikin. Wê demê dîroka Kurdên Swêdê divê ji nû ve bê nivîsin. Ji kîderê heta kîderê!

49 Kjell Östberg & Jenny Andersson, *Sveriges historia*, rûp.225.

50 Kjell Östberg & Jenny Andersson, *Sveriges historia*, rûp.325.

51 Ola Larsmo, Brian Palmer, *101 Historiska hjältar*, 2013, rûp.83-85.

52 När Sverige blev kurdernas land, *Stockholms Fria Tidning*, 22/2 2014.

53 Rohat Alakom, Di romana swêdî de koçberiya kurdan, *Nûbihar*, nr 144/2018, rûp.6-12.

Gotinêñ çê û neçê

-I-

NİFİR, AZAR, LOME Û ZËF GOTINÊÑ HUNDIR VEHESANDİNÊ Û DIL ËŞANDİNÊ

Nuh Ateş
nuhates@web.de

Pêşgotin:

Di beşa yekêm ya mijara gotinêñ çê û neçê da ezê qala gotinêñ neçê bikim. Gotinêñ ku wekî nifir, azar, lome û zëf têñ binavkirin. Gotinêñ neçê yên ku min di kuriktî û xor tanîya xwe da nîv esrê di ber ve, li gundê Xelika (Karacadag-Kulu-Konya) bihistî û di bîra min da mayî. Ku bû qismet, ez ê di hêjmareke din ya kovarê da jî qala gotinêñ çê bikim.

Ji hêla zimên û nivîsandinê da kêm yan zêde tesîra zaravayê (devoka) Xelika li ser gotinêñ neçê yên ku min li jêr komkirî heye. Ji bo î ve jî, dibe ku ev şor û gotinêñ ku di bîra min da mayî bi yên li gund û bajarokên kurd yên din ên li Anatoliya navîn va ji hen aliyan da hevûdu negrin û ji hev cihê biñ.

Bi min weng tê ku huro (îro) ev şor û gotinêñ neçê êdi li Xelika mîna berê pir nayêñ gotin, kêm têñ bilêvkirin û bihistin. Viqasî ku di

bîra min da maye, berê nifir û azar pirtir ji devî jinan û lome û zëf jî ji devî mîran derdiketin.

Nivisandina gotinêñ çê û neçê jî ji bo ziman, kultûr û civatnasînê gerek e. Ji hêlekê da jî, mijar û naverok çi dibe ma bibe, her nivîseke bi kurdî û bi taybetî jî li ser zargotinêñ kurdî li her cîhûwarêñ kurdnişîn bi serî xwe xîret û liberxwedaneke ji bo parastina çand û zimanê kurdî ye.

Li gor nihêrînêñ hen zaneyêñ mijarê, nifir, azar, lome û zëf jikî ku insan heye henin. Êw ê wan wekî beredaneke (êrişeke) êşandinî û piçûkxistinî bi nav dikine. Meriv dikane gotinêñ neçê mîna lêdan û rexneyêñ tûj jî bihesibîne. Pir caran meriv, gava ku ew ji ber qewimîyêñ nerind xwelî, aciz û sur dibe yan jî neçar dimîne, hêrs û cinêñ wî radibin dest pê gotinêñ neçê dike û pê hundirê xwe vediheşîne. Lê kesên ku dibin armanca nifir, azar, lome û zëfan jî têñ êşandin û

piçûkkirin. Ji ber vê ye ku ew jî pir caran bersiva nifirkar û zêfkaran bi nifir, azar û zêfan didin.

Meriv gotinên neçê carina li rûyê hevûdu û carina jî di pêy hevûdu dibê. Wexta ku ew li rûyê hevûdu têñ gotin, hîngê carcaran ew dibûn/dibin sebeba sûvahatin, heng û şeran jî.

Di hen gotinên neçê da kesen bi manî, yan bi şekil, sima, kar, mesleg, binemalî û teybetiyêñ xwe yên ji piranî û normaliyê cihê têñ êşandin û piçûkkirin. Di armanca (hedefa) zêfêñ ji doxinê berjêr da jî pirtir jin heye.

Gotinên neçê, hûn ê di nivisê da nimûneyan bibînin, li Xelika û cîhûwarêñ din yên Kurdêñ Anatoliya Navîn pir caran bi pêşdank yan navlêkirinan wekî magî/mago, mageyî, magê/mageyê, mak/maka têñ bilêvkirin. Balkeş e, van peşdank û navlêkirinan tenê ji devî mêran derdikevin, jin wana nabêñ. Van pêşdank û navlêkirinan kîngê û ji ku da hatina û ketine nav ziman û zaravêyêñ me û çima jin wan bi lêv nakin?

Bersiva van pirsan bizehmet e. Lê ji gumana ne dûr e ku van pêşdank û navlêkirinan di dem û dewranêñ kevin da ketibin nav zimanê me û

ji dema Împeretoriya Medan da mayîbin. Ü paşê, ji derbasbûna kurdan ya îslamê bi şûnda, evana bi meneyeke neçê hatibin dîtin û mitala kirin. Kî dizane, dibe ku muslimantîya pêşiyêñ kurdan bi mîran destpê kiribe û jin ji paşê da, dereng derbase dînê îslamê bûyîbin. Derberê vê mijarê da, meriv di serdema me da jî raste hen cudahîyêñ din yên di navberê jin û mîran da tê.

Hukimê hen rabûn û rûniştinêñ kurdan yên kevn huro jî li ser jinêñ kurd yên li gundêñ kurdêñ Anatolîyayê ji ya li ser mîran pirtir e. Nimûne, Viqasî ku min hay jê heye, jin naherin mizgeftê (camîyê). Jinêñ dîndar li mala xwe nîmeya xwe dikin. Jin, wexta ku meyitî (ceneze) mirîyan dibin goristanê, mîna mîran bi rû meyît nakevin û naherin goristêñ û li wir teve merasîma binaxkirina mirî ya bi tirkî-erebî, nabin.

Jin li peş mala yê mirî şînê dikin. Dêûdotêñ kesê ku mirî kincê xwe vajo li xwe dikin, dinalin, distrêñ, digirîn, bisk û porê xwe dirûçkînîñ û bi mistan li sing û berêñ xwe dixin. Li şîn û sersaxiyan odayêñ jin û mîran ji hev cihê ne. Li odayêñ mîran şîn tune û gotinêñ sersaxîyê

bi kurdî ne lê tirkî jî ketiye nav. Li odaya mîran Qoran û dûa tenê bi erebî-tirkî têñ xwendin. Lî li odaya jinan erebî û tirkî tune yan jî pirûpir kêm e û xwendina Qoran û duayan bi tirkî-erebî jî tune, hîn ew nebûye edet. Li odaya jinan zimanê serdest kurdî ye û kilamên şînê bi kurdî têñ stran, dêûdot û mermaliyêñ mirî yên din dikevin hembêza hevûdu û bi hev ra digirîn.¹

A

- Axu û Afacan/ Afacan xwaro/xwarâ
- Axu û Afacan vexwaro/vexwarâ
- Ar (Agir) vê malê keve/keto/ketê
- Ar vê mala bavê keve/keto/ketê
- Ar vê canê te keve
- Arî vêketiye/Magê/Magi ar î vêketiye

B

- Bela xwe biwinî
- Berî çavan bigre, rindîyêñ ku min jê ra kirî încar kirin
- Brûsk lêkeve/lêketo/lêketê
- Bi lêh da herî/çûyo/çûyê
- Bi satilcanê bikevî/keto/ketê
- Bi qizilqurtê bikevî/ keto/ketê
- Bi ta bikevî/keto/ketê
- Bi dev û rûyan warî (bihêyî) herdê
- Bi cehenemê ser sû(stûyê) xwe va herî
- Bicehime here ma ez te newînim
- Bicehime here hîn ku min bi te ranekîşandiye
- Bibihecêyî/Tu bibiheceyî
- Bi hecandin/ Vî qezewreşbûyî ez bi hecandim
- Bi xwaşî di tirbê kevî/keto/ketê

¹ Ji bo zêde hayadariya li ser bingeha pêşdank û navlêkirinêñ ku min li jor qalkiri, li jêdera li dawîya nivîse mîze bikin.

- Bizdoneko/Bizdonekê (Magî bizdoneko/Magê bizdonekê)
- Binaro/Binarê (Magî binaro/Magê binarê)
- Bi bedo/Xwelî vê yî bi bed
- Bi eynato/eynatê
- Bi mirûzo
- Bipertili/wîhî ku tu bipertilî
- Bişehîtî/şehîtîyo
- Bê/Vê wijdano
- Bê fedî û heyayo
- Binguh xistin/Ku min bi şelmaqê li binguhê te xist, tû ê di dorûhevra çerx biwî
- Bi gepirê rakişandin/ Ku min yek bi gepirê te rakişand, tu ê bi devûrûyan warî(biheyî) herdê
- Bi çolê da diherê/Magî î bi çolê da diherê(î dîn bûye)
- Bi kuruşekî bi darda ye (cimrî)/Magî î bi kuruşekî bi darda ye
- Bes e te em kerr û lal kirin
- Bes e bêdeng be te em ji heş(hış) bêhna kirin
- Bes e bi terikînê, ci te wêrewêr e

C

- Can jê bikişê/Can jê kişîyo/kışiyê
- Cinê min rameke ku ez rabûm ezê te xişxalî bikim
- Cehenime bibe here me çavêن min te newînin

Ç

- Çavêن te birijin
- Çav birçîyo/ Magî çavbirçîyo
- Çav bi derên/Çavêن te biderên
- Çavpêlo/Çavpêlê/ Magî/Magê çavpêl
- Çavbelo/Çavbelê
- Çavberjêro/Çavberjêrê
- Çavpîso/Çavpîsê
- Çav bi kî/Çav bi kîyo/ Çav bi kîyê

- Çavzoro/Çavzorê /Magî çavzoro/Magê çavzorê
- Çavzero/Çavzerê
- Çokxwaro/Çokxwarê
- Çelnano(Çilnano)/Çelnanê
- Çalxin/Çalxino/Çalxinê
- Çînevîzo/Çînevîzê/Magî çînevîzo/Magê çînevîzê
- Çîn û çortana dermexe
- Çelderewino/Çelderewinê
- Çileko/Çilekê
- Çêhrepîso/Çêhrepîsê
- Çêrîn/ Magî î diçêrê/Ter va î diçêrê!

D

- Dunê (duniyê/dunya) bi ser te da helweşê
- Dernexûn bûyo/bûyê
- Dest û pîyên xwe qe banekî
- Dest û pîyên te bişikên
- Destûpîyên te negirin
- Devsist/Magî/Magê devsist
- Dîniko/Dinikê/Magî dînik/Magê dînik
- Dîn bûye, ji rê vi derketiye
- Di herdî (erdî) reş kevî/ keto/ketê
- Di herdê da herî xwarê
- Di tîrbê da dawestî/dawestê
- Di ber destan keyî/keto/ketê
- Di siwê negihêyî
- Di zar û biwîlan ra hato/hatê
- Di berda bimê/mayo/mayê
- Di tu deran negihêyî/negihêştiyo
- Doxinsisto/Doxinsistê
- Dûlî kereyo/Dûlê kereyê
- Dûlî kuçikayo/Dûlê kuçikayê
- Devjêyo(devjihevo)/Devjêyê

- Derewino/derewinê
- Devpîso/Devpîsê
- Devbikefo/Devbikefê

E

- Emiya(omiya) biwî/ bûyo/bûyê
- Ez hatim, ezê/eza te xişxalî bikim
- Ezê/Eza te bikûjim
- Eza xwe serjêkim/Ku te bi gorê min nekir eza xwe serjêkim
- Eza xwe bi darda kim/Ku te bi ya min nekir eza xwe bi darda kim
- Eşoreto/ Çi te xwe kiriye eşoret
- Ekiso/Magî çî ekis e
- Ezê pê çatî henîyê te va dim

Ê

- Ê ku nehatî serî kesî ware serî te
- Êke/ Magî/Magê êke

F

- Fişqo/Fişqê
- Fesado/Magî fesado
- Fiseko
- Fedî bike/Vê(bê) fedî heyayo/heyayê
- Famkoro/Famkorê

G

- Gawiro/Gawir biwî/ bûyo/bûyê
- Guhbelo/Magî guhbelo
- Gêjo /Magî gêjo/Magê gêjê
- Gayî Xwedêyo
- Gayî cotayo/Magî mîna gayo
- Gakuvî/ Magî gakuvîyo
- Gurîyo/ Magî guriyo

- Guno/ Gundiro
- Gunehkaro
- Gavê lê hatiye kuruş/Magî gavê lê hatiye kuruş

H

- Har bûn/î har bûye
- Harinî/ î harinî bûye
- Hedî xwe bizane
- Heşkêmo/Magî heşkemo/Magê heşkêmê
- Herd (Erd) veqelişe tu têkevî/têkişeyî
- Hesûdo/Hesûdê
- Heramzadeyo
- Heşerî/Magî heşerî bûye herce ku bixesinî
- Hîş be, devî xwe ji xêra ra veke

I

- İşqê çavan birije/rîjîyo/rîjîyê

Î

- Înadkar /bi ïnado/Magî çî bî ïnad e!

J

- Jan di serî keve/keto/ketê
- Jêhrûziqum (Zêhrûziqum) xwaro/xwarê
- Ji vir da herî ji wir da neyî
- Ji niçkava gêr biwî/bûyo
- Ji sisêya heta neha be tu ê berdayî
- Ji destüpîyan da bikevî

K

- Kevir û kûcik bi ser te da biwarin
- Kezev reş biwe/ bûyo/bûyê
- Kul lê were/ hato/hatê

- Kul di bin çeng da hato/hatê
- Kul vêkeve/vêketo/vêketê
- Kulvêketî hundirê min anî xwarâ
- Kul-mitik lê were/lêhato/lêhatê
- Kul di qirikê da hato
- Kulê neçê(pîs) lêwere/lêhato/lêhatê
- Kurm ê ketinê/Magî kurm ê ketinê ï nahewê
- Kurbicino
- Kurfûto/Magî kûrfûto
- Kerî ji kereyo/Kere ji kerayê
- Kerkero wer meke/Kerkerê wer meke
- Kêm biwe/biwî/Kêm bûyo/bûyê
- Kêm bîwî heş bi serê me va nehîstîn
- Kêm biwe here, te ez bi hecandim
- Kêm biwe here ma çavên min te newînin
- Ku min bi te rakişand ez ê te di Fizanê ra derxim
- Kevir û kuçik bi ser te da biwarin
- Kuçiko / Magî mîna kuçikayo
- Kelmîzo/Magî kelmîzo
- Keçelo/Magî serkeçel
- Kokimo
- Kwîr biwî/bûyo/bûyê

L

- Lanet li te we
- Lêh bi malê da hato/hatê
- Lihevketî/Magî lihevketiyo/Magê lihevketiyê
- Lêvsêyo/lêvseyê/Xwelî vê yî lêvsê
- Lur/Magî luro/Magê lurê

M

- Mal mîrat biwe/ bûyo/bûyê
- Mal xeraw biwe/ bûyo/bûyê

- Mal wêran biwe/bûyo/bûyê
- Mal şewitîyo/şewitîyê
- Mal kesik bûyo/bûyê
- Mitikûmerez lêhato/lêhatê
- Magî mîna jinayo
- Magî î bi kurişekî bi darda ye
- Magî bejîyo/Magê bejîyê
- Mehde pîso/pîsê
- Mizêwiro
- Mal neketo/Malneketê

N

- Nefskero/Nefskerê
- Niçkava ger biwî/bûyo/bûyê
- Nanî dixwî heram be

O

- Ornag neçêyo/Xwelî vi ornagê we
- Ocax kwîr bûyo

P

- Parseko/parsekê
- Pîsî bi eko/Magî pîsî bi eko/ Magê pîse bi ekê
- Pozbalcano
- Pozbiçilmo
- Pozkuro/Pozkurê
- Pînco
- Porgijo/porgijê
- Pejmûrde/Magî pejmûrde/Magê pejmûrde

Q

- Qanser lêhato/lêhatê
- Qulqulkî biwî/bûyo/bûyê

- Qet nejinî
- Qet tu rojan nebînî
- Qerepereyî biwî/bûyo
- Qurşun lêketo/lêketê
- Qenere/ Magî qenereyo
- Qot bûyo
- Qizilqurtê bikevî/keto
- Qiran vêketo
- Qunde/ qundeyo/Magî qundeyo
- Qun bi xwelîyo/xwelîyê
- Qun bi eko
- Qun bi pîneyo
- Qurimê kinê/xwelî vi we qurimeke çing didê xwe
- Qelêr (qilêr)/Magê bi qelêr/Magî bi qelêr

R

- Rûh ji bikişe
- Rûswayo (riswa)/ Xwe kiriyê rûswa
- Rezîl û rûswayo/Rezîl û rûswayê

S

- Sû (stû) di bin ya biwe/ bûyo/bûyê
- Sû (Stû) bişikê/şikesto/şikestê
- Serî xwe bixwe/xwaro/xwarê
- Serîyê xwedana xwariyo/xwariyê
- Serseqeto(serîseqeto)/serseqetê
- Serî bi cino/Serî bi cinê
- Serî siviko/Serî sivikê
- Simtirsoneko/simtirsonekê
- Sehtekaro
- Serserî/ Magî serserîyo
- Sêhrbazo/Sêhrbazê
- Sizi (size) lê were/Sizi lêhato/lêhatê

Ş

- Şorsisto/Şorsistê/Xwelî vi we şor çîma sist in
- Şorpiso/Şorpîsê/De hîş be şor çîma pîs in
- Şorê devî xwe bizane
- Şaş bûye/ Magî i şaş bûye/Magê ê şaş bûye
- Şerpeze biwî/ bûyo/bûyê
- Şerpelî biwî/biyo/biyê
- Şerro (Magî şerro/Magê şerrê)
- Şiksizo/Vê(bê)şiko/şikê

T

- Tu royan (rojan) newînî
- Tu di siwê negiheyî
- Têda hato//hatê
- Tu xêran nebînî
- Text û tac wergere/ wergeriyo/wergeriyê/
- Text û tac belav bûyo/bûyê
- Tireko/Tirekê
- Tir e/Tir e pîsî bi mehdeyo (tenê jin dibên)
- Tirê li binguh ketiye/Magî tirê li binguh ketiye
- Turo/Turî ji turayo
- Tevgérneçêyo
- Tevger sisto /Tevgêr sistê
- Tû(tûv), Tû ji te ra
- Tîtikî heniyê/ku min pê tikî hêniyê va da tu ê di dor hevra çerx biwî

U

Û

V

- Vi (Bi) ber dupîya kevî/keto/ketê
- Vi /Bi) ber tomafilê kevî/keto/ketê

- Vireko/Virekê/ Magî vireko/Magê virekê
- Vi (Bi) ber lêh kevî/keto/ketê
- Vê(bê) heşo/heşê
- Vê(bê) fedî û heyayo/heyayê
- Viseko/Visekê

W

- Wêlkanî biwî/ bûyo/bûyê/Magî wêlkanî
- Weledzînayo

X

- Xadim/Xadimo
- Xwelî vi we (be), xwelî vi sêri we (jin dibê)
- Xwelî vê we, tevgêr çîma neçê ye
- Xwelî vi şekilê we
- Xwelî vi çalimê we
- Xwedê bela te bide
- Xwedê xezewê lêkiriye
- Xwe bixwêra bikişinî
- Xwîn verişyo/verişiyê
- Xeniqiyo
- Xwîn di devûbêilan ra hato/hatê
- Xeneqokî bûyo/bûyê
- Xinziro/Magî xinziro
- Xago/Xagê/ Magî xago/Magê xagê
- Xizan/Magî xizano/Magê xizanê
- Xêrnexwazo/Xêrnexwazê

Y

Z

- Zinaqî biwî/bûyo/bûyê
- Zinaqî kirin/Vî kulvîketî ez zinaqî kirim
- Zindiq/Magî zindiqo

- Zînekaro
- Zulimkaro/ Bi zulimo/Zalimo
- Zîyankaro
- Zimandirêjo/Zimandirêjê
- Zalimo/Zalimê

Çend zêfên ji doxînê berjêr

- Ar û vêketiyê/magê ari vê qulê ketiye
- Bê(Vê) aro/ Vê(Bê) arê /Magî bêaro/Magê bêarê
- Bi dêv da ek(gû) kiro/Bi dêv da rîyo (jin dibêñ)
- Bi devî bavê da ek(gû) kiro/rîyo (jin dibêñ)
- Bi dêv da mîz kiro/mîz kirê

(Ji devî mîran)

- Dev bi eko(gûyo) /Dev bi ekê
- Di(Bi) navranê da berdayo/berdayê
- Di qulê nayo/nayê
- Di qulê va radayo/radayê
- Di dayikûmaka nayo/nayê
- Di dêûxweh nayo/nayê
- Di dêûjinê nayo
- Di dêv nayo/ Di dêv kiro
- Di hestîyêñ bavê nayo/nayê
- Di qulûgilika nayo/nayê
- Di devûqula nayo/nayê
- Di qulûqewara nayo/nayê
- Di partelê nayo/nayê
- Di sînseleyê nayo/nayê
- Di gana nayo/nayê
- Di tire nayo/nayê
- Di gornê (tirbê) bavê nayo/nayê
- Di şorê nayo/nayê/Maka şorê guhêmê
- Di qulê çavan nayo/nayê

(Ji devî jinan)

- Ekî(gûyî) min di devî bavê we
- Ekî min bixwe/xwaro/xwarê
- Ekî xwe bixwe/xwaro/xwarê
- Ekî alêmê bixwe/xwaro/xwarê
- Ekî alemê di devî bavê we

(Ji devî mîran)

- Kun bi eko/ekê
- Qul bi xirê
- Kîrî min bixwe/xwaro/xwarê
- Maka qulê gihêmê
- Maka dê gihêmê
- Maka çehrê gihêmê
- Maka ton gihêmê
- Maka gilikê gihêmê
- Maka partalê gihêmê
- Maka heşa gihêmê
- Maka qurimê gihêmê

⁽¹⁾ Dr.Sozdar Mîdî (E. Xelîl)

Wergera ji erebî: Mustefa Reşîd

Bermekiyên kurd di kûraniya dîrokê da

Mog - Mecûs - Bermek:

Lî dora salên 1100î b.z. gelê Mad (pêsiyên gelê kurd) li derdorêن çiyayêن Zagrosan bi cih û war bûbûn. Ji dewleta wan ra, ya wê demê li çiyayêن Zagrosan, Gotiyom (Gotium) dihate gotin; li gor şaxê Gotî / Cütî ji

pêsiyên Kurdan in. Lê di hezarsalê pêşî yê b.z. da, bi navê Mad (Mîdiya) hatin naskirin. Mad bixwe ji yekîtiya şes êlén mezin pêkdihatin, ew jî wek ku Diyakonov dibêje ev in: Boudloï. Arizatoi, Strouknates, Paretaknoi, Boussi û Magoi. Ev nav jî pir dişibihin ew ên ku Herodotes gotine.

Niha ji bo mijara me, ev êla Madan Magoi (Mag, Mog, Mûg) girîng e. Ji ber ku Ayîna Ezdayî (Yezdanî) wê hîngê li welatê Mad serdar bû û pêximber Zerdeşt jê ra Mezda Yesna yanê Ayîna Mezda gotiye. Wek ku di jêderên dîrokî da hatiye gotin, ev êla Magoi pispora kar û barêñ ayînî bûye. Rola wan dişibihe rola êla Lawî ya Îbranî ku ew jî pispora kar û barêñ ayîna Cihûyi bû û pêximber Mûsa jî ji wê êlê ye. Ü herwisa dişibihe rola êla Qureyş ku ew jî pispora kar û barêñ ayînî ye li ba ereban di dema berî İslametiyê da û pêximber Muhemmed ji vê êlê ye. Vê êla Magoi di Zerdeştiyê da jî ev rola xwe parastiye. Dîroknasên Yûnanan (Girekan) ev nav bi awayê Magos / Magûs nivîsandine û ereban jî bi awayê Mecûs gotine. Peywendîya vê peyva Bermek pir bi peyva Mag / Mog yan jî Mecûs ra heye. Şîrovekirina herdiyan jî, ji du

hêlan va, pir li nêzî hev e:

Yekem: Peyva Bermek ji peyva kurdî Bermak hatiye erebkirin. Di vê babetê da peyva BER tê maneya pêwan, oldar, xizmetkarê Xweda û peyva MAK tê maneya Mala Piroz, Mala Resen, Mala Dayîkî. Duwem: Ji parêzvanê perestgeha zerdeşti (mala agir) ra BERMOK dihate gotin; yanê ew oldarê berpirsiyar ji ber perestgehê va. Ev nav di jêderên erebî da bi awayê BERMEK hatiye, jiber ku tîpa (g) di zimanê erebî da tineye. Diyakonov dibêje ku di dema Sasaniyan da ji Magwpati =Mogbedan ra Mobedian dihate gotin. Ev nav bi awayen (Mewbezan) û (Mewbedan) derbasî jêderên erebî büye. Ev Mewabed berpirsiyarên perestgehan (malen agir) bûn û ji serekê herî bilind ra (Mewbed, Mewbedan) dihate gotin. Aşta vi Rêveberê Ayînî di hemû babetên ayînî da aşta here bilind bû û rola wî wek rola Papa li ba Xirîstîyanan bû. Wî çavdêri li dad û yasayê û pékanîna dademendiyê, li pékanîna nimêjê, lidarxistina şahiyan di dema wan da û paraştina agirê pîroz di perestgehan da dikir. Ji mafê wî bû jî ku di roja Newrozê da bersivê ji

padişah bixwaze heger kesekî dozek li dijî wî (li dijî padîşah) rakiribe. Beşekî din ji oldaran hebû ku karê wan ew bû, agirê pîroz di perestgehan da her vêketî bimîne. Ji van kesan ra (Harbed), bi kurdiya niha (arbed) dihate gotin. Yanê ew kesê ku herdem êzing û daran li agir dike da ku her vêketî bimîne. Di pirtûka pîroz Avesta da (Athrapatî) hatiye gotin û maneya (Athrapatî / Harbed / Arbed) her mina hev e. Ev nav di jêderên erebî da bi awayê (Herbez), bi şêweyê gelejimarî (Herabize) hatiye. Ji serekê wan ra (Herbezan / Herbez) dihate gotin. Radeya Herbezan di aşta duwem da piştî ya Mewbedan dihat. Ev peyva (Mog / Mag) di bermaya islâmî kurdî da bi awayê (Şex Mog) heyâ niha maye. Li herêma Efrîn, li rojavayê Kurdiştanê, bi gelemerpi di sibeha roja iniyê da hin kes li ser malan digerîyan, hin sirûdên ayînî digotin û wisa hinek dirav, ard û zeyt dicivandin. Ev hêj jî bi navê (Şexê Mog) tên naskirin. Wisa tê xuyakirin ku ev nav bi encama têkilkirina navê islâmî (Şex) û navê Ezdayî (Mag/Mog) pêkhatiye...

(Çavkanî: Birnebûn, hejmar 67/2017)

Alamanîya/Mainz, çirîya pêşin

Kilama şînê*

Oyy lo Ferat¹ o
Oyy bini qûm e
Oyy bi ser ra dihat o
Ne mîrikê Şereflîyê sibe de
Ji mala xwe derket o
Seet li deh û dudu ya
Li can ê Batîn bû celad o
Oyy Hew² dibê:
 ”teyr im, teyr im, teyrke ker im“
Ez a berve Almaniya şewitî herim
Ez a îza lawikê Batînî xwe bigerim

Oyy lo Ferat o
Oyy bê bini qûm e
Oyy bi sera dihat o
Ne mîrikê Şereflîyê ji sibe de
Ji mala xwe derketo
Li can ê Batînî min bû celad o
Bê lawî lawî Batînî min lawî
Îşlig ê spî çakêtê mayî
Ew çîflig a gî emegê Batîn e
Xwedê te mutetik pê de
 çing satışê di zik de mayî
Bê erê lawo Batînî min lawo
Li ser rîya Qulekê di xew de mayo
Bavê nexweş cîma qe de li xwe nenayo

Oyy bê Batînî min î bi lorik a
Bûk ê min ê hînê biçûke
Hewê bê bûkê qurban bi fediyê
Were kapiya derkeve
Bê apo rabe serê min xeliyê
Oyy lawo lawo Batînî min lawo
Çîma kekê qe de li xwe nenayo

Oyy lo Ferat a
Oyy bê binî qum e
Oyy bi sera dihato
Oyy keç keçê tê me wê navriyê wê navriyê
Ne Vêysel terê çîfligê iş gûcê xwe kiriyê
Ne mîze dike karşı Batînî ramediyê
Oyy heyna bir o

Keçê min bes e; ”ne zemanê xwe ye“
Min xwang gî bi qurbana çavî Emir kir o
Ez çûm herdê temel hundirê min negirt o
Min lê meskir min got: ”kardeş ez herim
 malê xwe ji heqê xwe derêm o“
Min qemîş nekir carekê jê pirs nekir o
Oyy Oyy Oyy kurban!

Berhevkar:
Mehtab İdelî
Zürich

*Keseki ji gundê Celika-Yeşilyurtê bi navê Bahattin Çelik di roja 05.10.2017an de bi ereba xue li ser rîya Kuluyê qezâ trafîkê de dimire. Ev kilama şînê li ser hatijê gotin. Di ereba hemberî wî de jî du kes ji gundê Şereflîyê jîyana xwe ji destididin.

¹ Çemê Feratê

² Hewlik dayîka Bahattîn

Ew bê min nake

Mem Xelîkan

Dema Kewê bavê xwe wenda kir hê danzdeh salî bû. Keça malê, bi tenê wû. Dê û bavê wê, Gozê û Heco di kargehekê de kar dikirin. Kargeha, konfeksiyon û dûrinê. Heco, berpirsiyârê parastinê, Gozê jî li wir karê dûrinê dikir. Hevdu li wir nas kiribûn. Heryek ji wanen, ji gundeki bajarê ku lê dijîn, bûn. Heyî û tuneyîya wanen, Kewa delal tenê bû. Mîna çavêن xwe ew diparastin. Dexwazên wê, yek nedikirin dudi. Dixwastin wê bidin xwendin, ku ew bibe jineka zana.

Mixabin, jîyan li gora xwastina wanen bi rê neçû. Rojekê ji rojêن payîzê, daran pelên xwe weşandibûn. Giya, çêre û hesinayîya derdorêن kolan û kûçeyên bajêr zer û hişk bûyîbûn. Eyamekî xweş hebû. Heco û Goz, wek her roj li kar bûn. Dûv xwarina nîvro Heco hat, ber deriyê kargehê yê derva rûnişt. Ji berîka xwe, cixare û heste biderxist. Cixarek vêxist û kûr kûr kişand. Dûmanê cixarê, li dev û serçavan belav dibû. Hê cixara xwe xelas

nekiri bû, êş kete sîngê wî. Cixare avite erdê, destê xwe da sîngê xwe, xwî lêdiket û verîşıya. Xarva hat û bi dev û rûyan kete erdê. Sekteya (qırız) dil bû. Hînî ciwan bû. Tu nexwaşîyêن wî tunebûn. Mirineke giran û bi şewat bû.

Bi ser wê sekteyê de Heco, Goz û Kewa xwe ya delal bi tenê ci hîşt û çûbû rehmetê. Dina Gozê, bi serê wê de xelîyawû. Lê dizanî tu caran bi ax û nalînan, bi girî û feryadan kesî tu miri venegerandine. Jineka jîr û jêhatî wû. Xwe zû berhev kir. Dizanî qar û barê malê, li ser stû û milêن wê ma bû. Pêşeroja Kewê û xwandina Kewê jî, girêdayîya wê bû. Dixwest ew, li ser lingêن xwe daweste.

Keça xwe, xezala xwe awêni dikir. Kew da pêşberî xwe:

– Keça min, delala min, bavê te bi mirineke bêwext çû ser dilovanîya xwe. Nizanim lezgînîya wî ci bû? Xwedê rehma xwe lê bike. Cihê wî bihuşt be. Dizanim, bavê xwe wendakirin ne tiştekî hesan e. Mixabin, em ci bikin nekin êdî

ew li me venagere. Tu caran miri, venegerine. Ez sozê didim te, eza ji te re him bi dê, him jî bi bav bim. Birîna min û te yek e. Dixwaze ez û tu, du jin, li ser lingên xwe dawestin. Jîyana xwe bidomînin û dexwaza bavê te, bi cih bînin. Pirr dixwast tu bixwînî û bibî jineka zana. Eza, karê xwe bikim. Meaşa bavê te jî heye. Em ê debara xwe baş bikin. Ji bo aborîyê, tu meraq neke. Çavêne te, tenê li ser xwandinê bin keça min! Em ê, wîngê rihê bavê te jî şad bikin.

Kewê, bêdeng û bêes guh dida ser gotinên dayîka xwe. Dema bavê xwe wenda kir, hê nû dest bi dibistana navîn kiribû. Heco, ji wê re formayên dibistanê, çente, pirtûk, pênûs û lénûsk hwd. her tiştek cot bi cot kiribûn. Wê rojê, pirr kêfxwaş bû. Te digot qey dine bûyê ya wî. Kewa wî, xezala wî, dest bi dibistanê dikir. Di nav şagirtan de dibrûsi. Keçke xwînşîrin û kehîl bû. Dev poz biçük, dêlimzirav, mîna bavê xwe, bejndirêj û navzirav bû. Çavêne wê jî, dişopandin ser yên Heco. Mîna Heco, çavkesk wû. Porê wê jî, mîna porê Gozê çequer bû. Heco bi Kewa xwe, şanaz û dilşad bû. Lê felekê Heco, nebaxşande Kewê û Gozê.

Ew rojê şanaz û dilşad bi wanen pirr dîtibûn. Ew zû, him jî pirr zû ji hevdu veqetandibûn.

Dûv Heco ve, Gozê qet tu kêmâyî bi Kewê re nedihîst. Xwe bi wê girêdabû. Xemla wê yê ku pê here dibistanê, kinc, meras hwd. û kincêni li derva li xwe dikirî, ji yên herî baş dikirîn ku ew li nav hevalan fedî neke. Kewê jî, pişta xwe dabû dayîka xwe. Ew nedîşand. Ji gotina dayîka xwe bi der nediket. Li dibistanê jî, şagirteke jîr û jêhatî bû. Di her poleke dixwandî de, tim û tim serkeftî bû. Ev rewşa Kewê, Gozê kêfxwaş dikir, ew li ser lingan digirt û bi jîyanê girêdida.

Sal, bi qar û bar bin jî, zû derbas bûn. Sê salan şuva Kewê, dibistana navîn xilas kir dest bi lîsê kir. Wek hero, sibê zû ji xewê radibûn.

Gozê, xwîrini amade kir. Siftê Kew da berxwe, porê wê şekir. Xezala xwe ya delal, ji bo çûyîna dibistanê xemiland. Hê li ser sıfrê bûn Kewê, destê xwe avite zikê xwe:

– Oy etê! Zikê min, got û li ser kèleka xwe ya rastê gêr bû û bîrva çû.

– Wêê. et bi qurban, ci bû, got. Kew zû hate xwe, rabû.

– Nizanim, heşê min çû.

– Tiştek tune keça min, qey te xwe qefilandîye.

- Na na, ne weng e, etê.
- Netirse, ka serê xwe bide ser jûnî min.
- Etê, derbas bû.
- Dixwazî, huro nere dibistanê.

Li mal, vêsinaya xwe bigire.

- Na na, ez ê baş im. Derbas bû. Em rabin, tu here kare xwe, ez jî herim dibistanê. Merek neke, derbas bû, tiştek nema, Kewê got. Ü herdu, ji mal derketin çûn.

Wê rojê şuva, sivik bin jî ew nobetên Kewê, ji çend mehan carekê pê digirtin. Carcaran, li nobetan çeng û destên wê jî diqerisîn

Carekê dudiya, Gozê ew bire ser bijîkan jî. Wanen jî, pirr guh pêve nekirin. Digotin; dibe ku ji ber stresê û psikolojik be.

Kew, ketibû heyjdeh salîya xwe. Li lîsê, pola sisayan dixwand. Rojekê di polê de, di nava dersê de, nişkava pît gêr bû û serê xwe li masê xist. Dest û diranên xwe diguvaştin hev. Dest, çeng û lingên wê diqerisîn. Kef, bi ser dev û lêvên wê diket. Dicirîfî. Mamoste û hevalan ew li erdê ramedandin. Çenga wê, ji hev kirin û paçekî paqij kirin navbera diranan ku ew zimanê xwe gez neke.

Mamosteyekê, kolonya anî, pê bîhnkirin dida. Li berxwedidan

ku destên wê ji hev bikin. Demekê şuva, Kewê bêhna xwe kûr kûr kişand. Çeng û destên wê, hêdî hêdî ji hev bûn û laşê wê sist bû. Çavêن xwe vekirin, tenê got; xewa minê tê û kire xore xor, kete xewê. Mamostan, ew bi wî halî, kîrin erebekê û birin nexwaşxaneyê. Bijîkan, ji çend tehlîlan şuva navê nexwaşya Kewê lêkirin. Gotin: Ew keps e. (epilepsi). Ji wê re, çend derman nîvisandin. Bijîkan xwastin ku ew, mehekê şuva were venêrînê (qontrol). Mamostan ew birin mal û ci hatiyê serê Kewê yek bi yek ji dayîka wê re kat kirin. Dina Gozê, carek din bi serê Gozê de xelîya. Jîyana xwe, pêşeroja xwe bi Kewa delal ve girêdayî bû. Feleka bêbext, destê xwe ji pîstê wê nedikişand. Nedihîşt ew ber xwe bibînin. Dîsa ewrêñ reş, ser serê wana re çerx dibûn.

Dema bi Kewê ve herdu tenê man, Gozê berê xwe di Kewê alkir û got:

- Kewa min a delal, xezala min, tu qet xwe neêşîne. Xwedê yî mezin e. Derd dane, derman jî dane. Huro, ji bo tenduristîyê zanyarî û zanistî pêşta çûye. Eza te, bijîk bi bijîk biggerînim. Te, ji wê mératê ku serê miriyêñ min xwarî, ji wê kepsê xilas kim.

– Etê, serê min diêşê, xewa minê tê.

– Erê keça min, parîyek nan û kevçiyek dudi şîv bixwe, dermanên xwe vexwe dûva çiqas dixwazî rakeve. Mamostê te got: “Ma Kew, du sê rojan li mal be, neyê dibistanê. Ma ew, vêsinayîya xwe bigire dûva were”. Ez jî, du sê rojan îzina xwe bixwazim.

– Bû, got û tiştek nexwar, ne jî vexwar kete xewê.

Dûv wê rojê, ku navê nexwaşîye jî dane ser Kewê, morala herduyan jî xirab bûyî bû. Kew diçû dibistanê dihat. Lê wek berê ne xenê û xedar wû. Mîna berê, guh bi dersan ve nedikir. Ji bo wê, serkeftî jî nedibû. Navê nexwaşîyê, giran bû. Qet, ji serê Kewê bi dernessiket. Bedena wê li dibistanê bû lê serê wê ne li dibistanê wû. Bi ser dermanan ve navbera nobeta (sekte) dirêj bûyî wû. Sivik bin jî, çend carêن din li dibistanê nobet derbas kirin. Ew sekte ne dirêj bûn. Zû dihate xwe. Lê di nav hevalan de moralê wê xirab dikirin.

Goz ji kar, Kew ji dibistanê vegerîbûn mal. Di maleke, ji du goz û mavêniyekê de rûdiniştin. Derîyê malê hesinî bû û bi boyaxeke şîn boyax kiribûn. Ji malên ku bi

şev bi dizikî (Gecekondu) çêdikirin bû. Li taxeke bajêr ê xewle bûn. Malbicûk be jî, têrî wanen dikir.

Êvar bû, ser sifre rûniştî bûn, şîv dixwarin. Kewê got;

– Dayê, ez ê ji te re tiştekî bejim.

– Bêje, dayîka min.

– Ez, huro dîsa bîrva çûm.

– Wêê, dê û bavê min bi qurban, dîsa?

– Erê.

– Giran wû?

– Na, mîna berê ne giran bû.

– Ji dermanan şuva, tu yê hê rind i.

– Erê. Dayê, ez êdî li nav hevalan ji ber vê rewşa ez têda fedî dikime. Di nav hevalan de, bîrvaçûyîn li min bi qar têye. Ez ê, guhê xwe jî nadime ser mamoste û dersan, mîna berê, serkeftî jî nabime. Eger tu jî bê erê, dixwazime navberê bidim dibistanê.

Gozê, bêdeng guh dida ser Kewê. Siftê, wek erînî bike serê xwe li ba kir. Dûva;

– Erê erê, delala min, te baş fehm dikime. Keça min, te çing xwastiye em wer bikin. Ma tu yê xwaş bî. Îsal navberê bide dibistanê. Here cem bijîjkê xwe were. Biryara te dayî jî, bi wî re parveke. Dermanen vî dayîn te, wek ew dixwaze bi wext

vexwe. Nexwaşîya te derbas bû, tu ya nûva dest bi dibistanê bikî. Tu ya, salek dudiya wenda bikî. Ma tu yê, xwaş bî. Qe ne mirin e!

— Mala te ava, etê! Ji bo ku te ez fehm kirime kêfxwaş bûm. Ez jî mîna te difikirime. Eza li mal jî dersên xwe bişuxulim. Him jî, bi te re karên malê jî bikim. Tu jî xwe pirr diwestînî.

Kew li mal, Goz jî diçû kar û dihat. Çend meh jî weng derbas bûn. Jîyana wanen her roj wekhev monoton bi qar û bar, bi derd û kulên wan ve tev diherikî. Ber êvarê bû, Goz ji kar derketî bû. Li derva, esmanan evrên reş berhev kirîbûn. Têra xwe baran dibarî. Mîna ku ewr daketine erdê û qulbûyî bûn. Gozê sîdanka xwe vekir û bi zorê xwe gihande rawestgeha otobosê. Baran bi hemdî xwe dibarî û bi teqereqa ewran ve tev brûskê vedina. Dema giheste mal, şil-şilkî bûbû. Derê malê ji hev kir;

— Kewê, Kewê got. Tu bersîv negirt. Kete hodê û dît, Kewê dernexûn raketîye. Ser devê wê, tiji kef û xwîn e. Kewê, hêdî hêdî çavêن xwe vedikir, vala vala mês dikir.

— Wêê Kewê, malê min şewitî, dîsa bîrve çûyi?

Kewê, bi zorê lêvên xwe livandin.

— Nizanim, qey dîsa ew mîrata ye.

— Wêê delala min, ez bi gorê, ez te carek din bi tenê bernadim. Eza dest ji kar berdim. Eza wî karî li mal jî bikim. Na na, ez te bi tenê bernadim.

— Na etê, du roj in min derman wenexwarin. Ez, ji bo wê gêr bûm. Tu karê xwe bernede.

— Çima qurban? Çima? Çima te derman berdan.

— Ji min ku eza xelas bûme. Zûva ku min, nobet derbas nekirine.

Bi ser wê de, gozê dest ji kar berda. Ji bo ku Kewê bi tene nehêle. Êdî herdu jî li mal bûn. Demêن wanen ku betal in, hê zêde bûn. Gozê hê zû zû Kew bire bijîk û anî. Dermanêن wê, bi destê xwe û bi wext didan wê. Ji bo debara dinê û tengasîya aborîyê, dest bi karê dirûnê kir. Ji cîran û hevalan re dirûn didirût. Kewê jî alîkarîya wê dikir. Wexta wanen betal zêde bû. Carcaran diçûn navenda bajêr digerîyan. Diçûn sînemayê. Diçûn li perqan rûdiniştin û çay-qehwe vedixwarin. Ew gerana, ji Kewê re baş dibûn. Bêhna wê fireh dibû. Şes mehan, tu nobet derbas nekirin. Nexwaşîya wê, her diçû baş dibû. Morala wê û rewşa wê jî pirr baş xuya dikir.

Li venêrînekê, bijîjk gotibû; “Rewşa Kewê, baş xuya dike. Veng çû, hetanî çend mehan şuba, işalla em ê dev ji dermanan berdinî.” Bi wê gotinê wek mîzgînekê, Goz û Kew kîfxwaş bûn. Bi wê xenê bûn û bi şanazîyekê, ji cem bijîjk derketin derva. Çûn, li resteurantekê zikê xwe têr kirin. Dûv xwarinê ve, çûn li baxçeyê pêşberî resteurantê çay wexwarin. Mîna ku herdu jî, ji nû ve hatibin dinê. Bi omdiyeke mezin, mîna du hevalan jîyan didomandin. Vê xeberê jî ew hê zêde bi jîyanê ve girê dan.

Bi ser wê gotina bijîjk ve, Kewê derman venexwarin. Ji dermanan osan bûbû. Gotina bijîjk, wêrekî dabû wê. Bi xwe û xwe digot; “Gotina bijîjk rast e. Çend meh in, wê mîrata sektê bi min negirt. Êdî, hewcetiya min a dermana nema.”

Dayikâ wê, ya ku emrê xwe û gulîyê xwe yên reş bi wê dayî, hay jê nebû ku ew dermanan venaxê. Bi ser venêrînê de du hefte derbas bûbûn. Dû nîvro wû. Dem, zivistan bû. Eyamî sar bû. Ji berfê, herderek spî dikir. Berfê, erd mîna çarşeveka spî nuximandî bû. Kolan û kûçe cemidî bûn. Meriv bi qar dimeşî. Rojeka wiqas sar bû ku Zivistana Romê ku digotin, ew roja bû.

Gozê:

– Me dirûna çend cîranan xilas kir. Ez herim vana bidim wana, eza perê xwe jî bigirim werim. Em ê so herin navenda bajêr bigerin. Eyamî sar e, te xwastiye, em ê herin sînemayê.

Kewê:

– Baş e, de tu here were.

Gozê:

– De tu jî, dor û paş xwe berhevke, van derana rêske, ez werim em ê şîveka xwe bi ser êr din.

Kewê:

– Bû, tu here.

Kewê mal rês dikir. Hişê xwe diçû. Hode, dor wê re çerx dibû. Gêr bû. Çeng kete hev. Destêr xwe guvaştin. Dest ling û bedena wê mîna berê diquerisîn.

Ji der de Gozê li derê xist û tu bersiv negirt, bi lez deri ji hev kir û kete hundir.

– Kewê, Kewê!

Tu deng ji Kewê derneket. Kete hodê û dît Kewê dernexûn mîna laşekî raketîye. Dev û lêvên wê tijî kef û xwîn in. Serê wê da ser junî xwe û ew li ser piştê ramedand.

– Wêêê, malê min şewitandê çi bû? Kewê, Kewê ez qurban dîsa bîrva çûyi? Çima, ka lê bijîjk gotibû nexwaşîya te derbas bûyê. Ka?

Kew nehate xwe. Gozê mês kir, Kew bêhna xwe nakişîne, destê xwe da ser dilê wê, dil nediat. Meşî, li derîyê cîrana xwe xist û got; were, Kewa min bîrva çû. Lê mîna berê, nehate xwe. Bi cîrana xwe ve herdu, vegeŕin cem Kewê. Cîranê, halê Kewê dît ku ew ne di halekî baş de ye, got; "Tu daweste ez banga ambulansê bikim, em wê rakin nexwaşxanê."

Gozê, serê Kewê virde û wêda çerx dikir û tim digot Kewê, Kewê. Gozê, hay ji xwe nebû. Tê bigota qey xwe wenda kirîye, nedizanî ci dike.

Ambulans, bi sîreneke ku guhêneriya ker bike, li ber servîsa lezgîniyê dawestî. Kew li ser sedyê, bi lez birin hundir. Bijîk û hemşire li serê wê civîyan. Berpirsiyare ambulansê ji bijîk re got; "Dil û pişka wê dawestîyane, ew, arest bûye." Herkesekî karek dikir û li ber xwe didan ku Kewê xilaskin. Yek bi ser sîngê wê de diket, yekî hewa didayê, henan jî tamar ji hev kiribûn û derman didan wê. Mixabin, Kew ji xewa kûr şîyar nedibû. Nehate xwe, venegerî.

Nîv saetê şuva, bijîkek ji hundir bi derket. Gozê serê xwe kirîye navbera desten xwe, henîşkên xwe

dayîne ser junîyê xwe vala vala mês dikir. Dema bijîjk dît, rabû çû ber wî dawestî. "Toxtor beg, Kewa min çawa ye? Li wê, baş binêre, heyî û tuneyîya min tenê Kew e," got. Hemşîrekê, ji bijîjk re wek ku bê; deng neke û mirinê kat neke, birûyê xwe berjor heynan. Dûva bi diskî, ji bijîjk re got; "Wê, hay ji xwe neye. Bi xwe û xwe diaxifê. Em wê, hêdî hêdî xeberdar bikin hê baş bibe." Wer jî kirin. Bijîk ji Gozê re; "Em berxe didin, lê rewşa wê ne baş e." got û vegeŕi hundir.

Du hemşîre, ketin bin çengênen Gozê û ew birin rûniştandin dan. Pirr neçû, bijîk şuva vegeŕi û ji Gozê re got: "Xaltî, tiştekî em bikin nema. Serê te sax be!"

Mîna ku qurşîn berda dilê Gozê, destê xwe avite porê xwe, bi qîrini; wê, mala min şewitî, got û ji pê de gêr bû.

Ronahîyê cihê xwe dabû tarîtiyâ şevê. Eyamî sar bû, li derva sermê dev û pozê meriyan dicemidand. Goz, li derva rûniştibû. Serê wê navbera desten wê de, kûr kûr difikirî. Qet deng nedikir, vala vala dor û paş xwe mês dikir. Kewa xwe ya gozel, wenda kiribû. Bi tenê, bi serê xwe mayî bû. Dina wê, bi serê wê de xelîya bû. Her çiqas, ji wê re

gotibûn; tiştekî tu bikî tune, here mala xwe, sibê were em cinazê te bidin te, bi gura kesî nekir. Tim û tim digot; "Na na, ew bê min nake." Bi xwe û xwe, bi dengekî kes nebihîze tim û tim dubare dikir û digot: "Kewê, te li min ci kir? Te mala min şewitand, eza niha ci xwelîyê bi serê xwe kim? Te ez, sêwî ci hîştim. Eza niha, ji huro bi şuva pişta xwe bi kê dim? Eza xwe bi kê, helpisêrim? Wêê, te mala min şewitand Kewê!..."

Şev nîvê şevê bû. Goz, li wî eyamî sar ku meri dicemidand çend saeta rûnişt. Li navberekê ci hate bîra wê nizanim, ji nişkava rabû çû hundir. Çû, rahîşte sukura bijîjk; "Doxtor beg, li min baş mêze ke. Dizanim Kewa min, berxa min bê min nake. Eza herim mal. Lê hetanî ez hatim li Xezala min baş binêre. Kewa min, bi tenê nehêlin!.." got û bi lez ji nexwaşxanê biderket.

Dora dinê royê, ambulansek hate ber nexwaşxanê, ser sedyê, cinazek hebû. Ew bi çarşeveke kesk nixumandibû. Berpirsiyare ambulansê, ji bijîjk re: "Ew mirî ye! got. Bijîjk, çarşev ji ser wê kişand û serçavê wê vekirin. "Mala minê, ez wê nas dikim, vaya dayîka keça duh mirî ye, dayîka Kewê ye. Xwaska me ew duh berneda." got.

Xortê ku ambulans anî, çend qutîyên dermanan ku hundirê wan vala, dirêjî bijîjk kirin û got: Vana, li kêlaka wê bûn.

Bijîjk:

– Erê, dermanê kepsê ne. Dermanê Kewê ne. Xwe pê jehr daye, xwe kuştî ye.

– Destê wê yê rastê guvaştî ye, guçikê kaxizekê tê de xuya dikê.

Destê Gozê ji hev kirin. Di kaxizê de: "Eza, herime cem delala xwe. Ew bê min nake." nîvisandî bû.

Pîrika Merxûr

Mistoyê Heco

mistoyehoco@hotmail.com

Hebûye tunebûye

Pir pir berê, wexta berx û guran di nav hebûnê de bi hev re divêşîn û ji têrbûnan di hembêza hev de radimedîn û bi dostanî dest li pişta hev dixistin li Axza Çolê gundekî biçûk hebûye. Li wî gundî jî Mistoloyek hebûye. Mistolo lawikekî pir ekis bûye. Delalikê ber dilê dakê xwe bûye. Bi gotina dakê, nola şekiran şîrîn bûye.

Dakê tu carî nedicihiştiye ma gotineke Mistolo lê bibe didu. Ew bi şekir, mûj û müşqiran mezin dikiriye. Dakê Mistolo pir neçê û ekis ho kiriye.

Xwangeke Mistolo jî hebûye. Navê wê Mencê bûye, lê ew ne di xema kesekî de bûye. Mêla dakê tim ê li ser delalikê xwe bûye. Xwang nola sêwiyekê mezin dibûye.

Di meselokên dakê de Mistolo tim î qehreman bûye û diçûye ji dakê xwe re ji pişt Girî Ziyaretê tenekeyek zêr û bûkek dianîye.

Rojek ji rojan Mistoloyê me yê ekis xwanga xwe li dû xwe dixe û herdu xwang û birang xwe didin

rê, ku biçine Girî Ziyaretê. Dûr çûne nêzik vegeŕîne û herdukan şev li ser xwe reş kirine.

Wexta roj çûye ava û dinê kirasê xwe yê reş bi ser xwe ve kiriye, ew ji gund êpî bi dûr ketibûne. Ji westan û birçînan tu hal di wan de nemaye. Ewqas ku di şûna xwe de zemq mane, êdî nedikarîne gavekê jî biavêjin.

Şevê bi reşikahiya xwe re tirseke xof jî kişandiye ser wan û ev tirsa di dilê herdu xwang û birangan de pêl bi pêl bela bûye, mezin bûye.

“Mistolo ez pir tatırsime. Min bihere malê.” gotiye xwangê û ji tırsaran leriziye. Ewqa tırsiye ku reng lê kişiye, spî-çolkî bûye. Xwangê bi çavêş şil dewam kiriye: “Pir birçî me. Ez dakê xwe dixwazime. Min bihere malê...”

Mistolo jî pir ditırsiye. Herduk ketine hembêza hev û bi ser hev de girîne. Çiqas bi ser hev de girîne Xwedê dizane. Wexta aşt bûne mêze kirine ku hinekî wêde, di nav wê tariya xof de çirek vêdikeve. Zûzûka şılıkê çavê xwe ziwa kirine

û berê xwe dane wê çirê. Hatine û li ber malekê dawestîne.

Ev mal mala Pîra Merxûr bûye. Dîwarêñ malê ji paste çîkolate û şîraniyan, teq û deriyêñ wê jî ji lîmonada û lezzoyan bûne. Xwang û birangêñ me yên birçî hema xwe dane ser malê û dest bi ziktîrkirinê kirine. Ji nişkave deriyê malê vebûye. Pîre gotiye, “Kî ye ew? Ka were ber çirê!”

Herdu xwang û birang neçar mane û hatine ber çirê. Pîre cardin gotiye, “Hûn kî ne? Li vê şevê li vir ci digerine?” Mistolo gotiye, “Ez Mistolo me, ev jî Menca xwanga min e. Em kê biçûna pişt Girê Ziyaretê. Me riya xwe winda kir û em ji vir ve derketinî. Em pir birçî bûnî. Me ji birçinan hinek ji pasteya dîwarê mala te xwar. Li me mexe. Dakê me wê sibê hinek paste ji dîwarê te re çêke.”

Pîrê çengê xwe xurandiye û gotiye, “Ew ci şora weng e. Hûn birçibûn û we xwar. Hûn birçî nebûna we jixwe nedixwar. Hûn nola kurikên pir paqil xuya dibin. Ka werin hundir. Derva sar e û hûn jî pir westîne. Vê şevê bibin mîvanêñ min. Him li hundir neviyêñ min jî hene. Werin bi wan re hevaltiyê bikin heta seda.”

Pîrê Mistolo û Mencê bi vê şîklê xapandine û herduk kirine hundir.

Li vê malê Pîra Merxûr bi hersê neviyêñ xwe re dimaye. Neviyêñ wê hersêk jî bi Mencê re hemsal bûne. Hersêk jî keçik bûne û hersêk jî nola pîrê merxûr bûne.

Herpênc kurik bi kîf lîstine. Qirarek şûnva pîrê ji neviyêñ xwe re çav qırpandiye û gotiye, “Berxikêñ min çaxa ramedanê ye. Xewa we nayê? Mîvanêñ me westiya ne. Ma her kes here oda xwe û rakeve.”

Pîrê cihê Mistolo û Mencê li odeya kêleka aşxaneyê çekiriye. Her kes kişiye odeya xwe. Qasek şûnva mîzka Mencê hatiye. Mencê deriyê odøyê vekiriyê lê ji ci re vekiriyê. Pîrê di aşxaneyê de didanêñ xwe çerix dikirine. Mencê cîle vege riye odøyê û hal û hêkata pîrê ji Mistolo re kat kiriye. Mistolo bi çavêñ serê xwe îna nekiriye. Wî jî ji navbera derî re mîz kiriye û wî jî heman tiş dîtiye. Lî nizaniye çîr bike.

Heta Mistolo were ser hişê xwe Mencê jê re gotiye, “Ez herim mayiniyê pîrê egle bikim tu jî di wê navberê de here neviyeke pîrê ûne têxe nav cihê min. Piştî wê Xwedêyî mezin e.” Mistolo bi gura xwangê xwe dike. Mencê derdikeve ji pîrê tasek şîrê kel dixwaze. Heta pîrê şîr

bikelîne Mistolo dihere neviyeke pîrê tîne dixe cihê Mencê. Di wê navberê de Mencê şûna mifteya derî di ber çavê xwe re dike. Mencê şîrî xwe vedixwe û tere rakeve û tê dikeve berlingên Mistolo. Qasek şûnva pîrê tê li dewsa Mencê neviya xwe dixwe.

Mencê Mistolo re dibêje, “Min şûna mifte hevisî. Tu here neviya dinê bîne ez jî heta hîngê mifte ji şûnê rakim. Mencê car din diçe axza dinê. Pîrê Mencê li hemberî xwe dibîne û çav li serî wê gewr dibin, lê bi xwe dikane û dibêje, “Keçika min çi dixwaze dîsa?” Mencê vê carê jî jê hevşikekê dixwaze. Pîrê hinek nanî kew dixe nav rûn û hêkekê bi ser de dişikîne. Heta hîngê Mistolo jî diçe neviya pîrê ya din tîne û dixe cihê Mencê. Mencê hevşika xwe jî dixwe û diçe ramede û tê dîsa dikeve berlingên Mistolo. Pîrê car din tê û bi niyeta Mencê bixwe neviya xwe ya din jî dixwe.

Mencê ji berîka xwe mifte derdixe û dide Mistolo û jê re dibêje, “Heta ez pîrê egle bikim tu him neviya din bîne, him jî xwe

bigihîne derî û deriyê derva ji me re veke.” Mistolo cardin bi gura xwangê xwe dike. Mencê dîsa tere axza dinê. Bi çavpêketina Mencê re pîrê dike dîn bibe, lê dîsa bi xwe dikane. “Keça min dîsa ci dixwaze?” dibêje pîrê. “Xwaska tengî mûj û müşqir hebûna, dakê min tim dide birangî min lê qe nade min.” Pîrê diçe ji kulnê hinek mûj û müşqir derdixe û herdu berikên Mencê pê tijî dike. Mencê cardin diçe rakeve. Pîrê cardin tê Mencê bixwe. Pîrê tê û neviya xwe ya din jî dixwe. Heta hîngê Mistolo û Mencê ji wir direvin, derdikevin derva û teq û deriyên mala pîrê didin ber keviran.

Pîrê bi dengê şikestina camê re vediciniqe. Li der mîze dike, lê ji ci re mîz ke. Mistolo û Mencê li der in.

Mistolo û Mencê ji pîrê xilas bûne. Heta pîrê derkeve derva revîne û ji wir bi dûr ketine. Di rê de mûj û müşqirên pîrê yeko yek diavêtine devê xwe. Pîrê nizaniye li ber hersê neviyên xwe bikeve yan li ber belengaziya xwe bikeve.

Çîroka min çû rast. Min xwar sîniyek mast.

Bîranîyek ji lîseya Cîhanbeylîyê

İbrahim Korkmaz

Cîhanbeylî, li Anatolîya Navîn, qazeke bajarî Konyayê ye. Cîhanbeylî kurdên canbegî demizarandine, Cîhanbeylî bi canbega nav kirine, piranîya xelkê wir kurd in.

Dibistana lîse (*Cîhanbeylî lîsesî*) da, him ji dibistana navîn jî hebu. Vê demê, sala 1973-74an da ez diçûm dibistana navîn, sinifa 3 ya.

Rojekê dersa dîrokê (tarîhi) bu, mamoste bahsa cemîyatên bi zîyan (*zararlı cemiyetler*) dikir, nişkava muavîne mudurê dibistanê, navî vî Yakup Usta bû, bi mamostê va hat ket sinifa me û Yakup Usta bahsa *Kurdistan Tealî Cemîyeti* kir. Muavîn pir xirab avêt lingê kurda.

Em zarokên kurd me pir fedî kir, Me fedîya xwe ra me xwast serê xwe di hundirê sîrake (kürsîye ke), bengzê me avêt, rengê me sor û reş bû, me bi xwe xwe go; acaba em kurd pir xirab in, bavpîrê me xirabî bi devletê kirine û nîvê sinifa me kurd bûn û nîvî ji tirk bûn. Zarokên tirk neçê me mize dikirin. Tiştekî dîn tê bîrya min; çîma pênc mamoste di sinifê da bûn, eger em dijî devletê tiştekî bêjin, ew pênc mamoste, bi şahît û

bi îspat em didan dest polîs. Paşê ji em hewalêن kurd, me fedî kir, em di nav xwe da bi kurdî xwe deng bikin. Hewalekî me hebû, navî vî Alî Kart, me jê ra digot; *Palavraci Alî*. Alî êdî fedî dikir bêje, ez kurd im, digot; esas eslî me ji Selanîkê hatîye û wî deraw dikirin. Me jê ra digot; xarziyê Atatürk.

Hevaled jî sira pêş min rudinişt, me jê ra digot; Bozo, ew kurd bû, paşê vî got, ez tirk im. Rojekê bavê wî li gûnd hatîbû Cîhanbeylîyê, wî bi Bozo ra kurdî deng dikir û min dît. Paşê Bozo hat sinifê, min bi kurdî ji Bozo ra qise (*küfür*) kirin, min xwest kî, Bozo bersiva min bi kurdî bide.

Feket Bozo sor bû, reş bû û xazîye di kirika xwe da dakaltan, serî xwe kir ber xwe, wekî mîsalê Nuh got û peygamber negot û bersiva min neda.

Ji dibistanê zarokên tirk ji me ra digotin; *kiro*, me jî ji wana ra digot; *bödüük* û nav me da tu cara şer çinebû.

Ez salek şunda, çûm dibistana lîse, li bajarî Konyayê. Me xwanda-



vanê li Kurdistanê hatinî Konyayê û unîversîte dixwandin naskir, me ji wan hewalana ji bo mesela *Kurdistan Tealî Cemîyetî* pirskir û hewalan gotin; devleta tirka pir derewa dike, pir lîstik ser kurda çêkrin, pir katlâm hanîn serî kurda û pir kurd kuştin û pir ji nefi kirin, ji me ra gotin.

Çend saleka şunda, ji me ra gazete *Roja Welat*, kovara *Rizgari* û *Özgürlük Yolu* dihatin. Me ev kovarana dixwand û me fam kir ku tirk ji me ra derawa dikin.

Esas bi wesika û bi ıspat me xwandî, ji bo *Kurdistan Tealî Cemîyetî* û bi 18 hejmar kovara *Jin* derketi bû. M. Emin Bozarslan kovara *Jin* ji zimanê osmanî wegerandî zimanê kurdi û tirkî.

Di kovarê da dibêje; endamên *Kurdistan Tealî Cemiyeti*, pişniyarek ji serokê cemiyetê Seyit Abdülka-

dir Bey ra tînin. Di peşniyarê da dibêjin; êdî devleta osmaniyan belav dibe, hemû miletên bindest in ji osmaniyan serî xwe radikin û devleta xwe çêdikin, em kurd çîma ji Stanbulê runiştine? Em

jî herin welatê xwe û xelkê xwe bi rîexistinîki bikin û çîma welatê xwe azad nekin?

Seyit Abdülkadir Bey bersiva xwe da dibêje: Birayêne me yên misilman û tirk dijî kafira ser dikin, weki em jî serê xwe rakin û dijî birayêne xwe yên misilmanen tirk rîexistinê bikin wê demê em birayê xwe paşwa (ji par ra) xençer dikin.

Ewa hişiyarbûn gelê kurd û rîexistina gelê kurd dide dastkandin û tirka ra alikarîyê dikin.

Atatürk devleta tirka xelas kir bi şunda çex kurda bû, pir katlâm hanîn serê kurda û pir kurd jî nefi kirin, muvkafata Seyit Abdülkadir Bey û hevalên wi, mukafata xwe ji meydana Diyarbakirê bi 47 hevalên wî hatin darxistin.


Kopenhag

Dekleresyonâ kurdên êzdî

(1872)

Rohat Alakom

Lêkolîna bi navê *Ezdiyan* û 97 Ferman di sala 2018an de li Swêdê di nav Weşanxaneya APECê de hate weşandin. Pirtûk ji aliyê Amed Tigrîs û Rojîn Zarg de hatiye nivîsin.¹ Wek li vir jî xuya dike navê pirtûkê ji du beşan pêk hatiye: Ezdiyan û 97 Ferman. Peyva Ezdiyan bi wateya warêñ êzdiyan hatiye bikaranîn. Peyva ferman normal tê wateya emir, bi taybetî jî emrên ku ji aliyê padışahan de hatine dayin. Lê belê di rewşa êzdiyan de û di vê pirtûkê de bi wateya emrê kuştinêñ kitlewî hatiye bikaranîn. Di gelek stranêñ kurdî de hawar û gaziya kurdan li dijî fermanan hildikişe erş û ezmanan: “Fermana serê kurdan!”. Her qeza, bela û komkujiyêñ ku hatine serê êzdiyan wek fermanekê hatiye navandin. Çawa em di dîrokê de û di nav rûpelêñ vê pirtûkê de jî dibînin jîmara van fermanêñ ku bona êzdiyan derketine zêde ne: 97 ferman. Di beşeke pirtûkê de ev fermanan yek bi yek hatine rêzkirin. Fermana yekem di sala 638-639an de û ya



dawîn di sala 2014n de pêk hatiye. Ev yek tê wê wateyê ku di nav 1376 salan de êrişen kuştinê li hemberî êzdiyan her berdewam kirine û jîmara wan gihiştiye 97an. Fermana dawîn ango ferмана bi nimra 97 çawa tê zanîn hemû cîhan rakir ser pêyan û nefreteke mezin li hemberî ekstremîstên îslamî peyda kir. Çawa tê zanîn Daîşê (Îşîd) di sala 2014an de êrişke mezin bire ser êzdiyêñ Şengalê, bi hezaran mirov kuştin û bi hezaran keç û jin berhev kirin, di

1 Amed Tigrîs û Rojîn Zarg, *Ezdiyan û 97 Ferman*, 2018, Weşanxaneya Apec.

sûkan de wek dîl (kole) derxistin firotanê. Hemû ev yekan di sala 2014an de qewimîn. Di beşa duwem ya pirtûkê de gelek bi firehî li ser van bûyerên dawîn tê sekinîn. Pirtûk bona kesên bixwazin kurdên êzîdî ji nêzîk ve nas bikin rîbereke kîrhatî ye. Di pirtûkê gelek mijarêن din jî hene li ser wan tê sekinîn. Wek mînak eşîr, dîrok, çand û gelek mijarêن din. Di paşıya bergê pirtûkê de di quncikê nasnameya pirtûkê de em rastî van peyvan tê: “*Qewl, beyt, qesîde, şehda, dua û dîrozgehêñ êzdiyan*”. Mirov têkiliyêن van peyvan bi naveroka pirtûkê re dikare fam bike. Li belê mirov fam nake ev peyvan ji kîderê bi dizîka ve hatine di paşıya bergê pirtûkê de cîh girtine?

Mijara ku li vir ez diwazim li ser bisekinim mijara Dekleresyonâ 1872 e ku kurdiya wê di pirtûka Tigrîs û Zarg de cîh girtiye.² Dewleta Osmanî dema dixwaze qasî 15 hezar êzîdî berhev bike û wan wek leşker bişîne şer, serek, mezin û berpirsên êzidiyan dekleresyonekê amade dikin û li wir sedemên neçûna leşkeriyê rîz dikin. Ev deklerasyona kurdên êzîdî ji 15 xalan pêk tê. Li jîr em hemû teksê dekleresyonê ji nû ve diweşînin

û diwazin bala xwendevanan bikşînin vê çavkaniya dîrokî. Ev çavkaniya nivîskî li hemberî leşkeriyê wek teksteke protestoyê dikare bê hesibîn. Wergera tirkî ya vê dekleresyonê berî çend salan di pirtûkeke li ser kurdan de cîh girt. Nivîskarê pirtûkê İlhamî Yazgan vê dekleresyonê wek bûyereke giring dihesibîne: “*Tevgera Lidijîderketina Wîcdanî û Ezdîti*” (Vicdanî Red Hareketî ve Yezidilik).³ Pêşengên êzdiyan ku binê vê çavkaniyê imze kirine nîşan didin ku çand, bawerî û erf-edetên wan çawa dest nadin ew herin leşkeriyê bikin. Wan kesan giringiya çanda xwe derxistine pêş û li hemberî leşkeriyê mirov dikare bêje ku pê şer dikin. Ji ber vê jî ev dekleresyonâ kurdên êzîdî wek bûyereke *bîtaetiya sîvîl* (serkêşîya bêşer) jî dikare bê nirxandin.

Dekleresyonâ 1872

“Em êzdî ji ber sedemên dînî yên ku me li jîr rîz kirine naxwazin xizmeta artêşa osmanî bikin. Em jî weke suryanî û cuhiyan di şûna ku em leşker bidin artêşê, em dixwazin bacê bidin. Ji derî vê gelek sedem hene ku em leşkeriyê nekin. Em ji wan çend di 15 xalan de, ji we re pêşkêş dikin:

2 Amed Tigrîs û Rojîn Zarg, *Ezdiyan û 97 Ferman*, rûp.200-202.

3 İlhamî Yazgan, *Tarihin Akitûnda Kürtler*, 2007, Zer Yayınevi, rûp.75-84.

Dekleresyon 1872

1. Ne mumkun e ku êzdî di artêşê de wezîfe bigirin.
2. Li gorî ola me ji heft saliyan heta heftê saliyan, ji mezinan ber biçûkan ve li gorî salnama ulyan salê sê car, di dawiya meha nîsanê de du car, di destpêk û dawiya meya îlonê cara sêyem û di dawiya meha cotmehê de ji cara çarem divê em Melekê Tawis ziyaret bikin. Kesî ku van pîrozbahîyan pêk neyîne ne ji me ye.
3. Li gorî salnameya Julyan di navbera 15-20 meha îlonê de ji heft saliyan heta heftê saliyan, ji mezinan heta biçûkan her endamê me divê li Lalişa pîroz turbeya Şêx Adî ziyaret bike. Li gorî ola me kesî ku van berpirsiyariyên xwe yên olî bi cî neyîne, ne ji me ye.
4. Her êzdî, her roj bi derketina rojê û avabûna rojê re dua dike. Ciyan ku misilman, xirîstiyen, cihû yan jî kesek ji oleke din li wir be, êzdî nikarin li wir îbabeta xwe bikin. Heke êzîdiyek li gorî vê şerti helwest negire, kafir e.
5. Li gorê mercên ola êzdî her ferd bira û xuşkeke xwe ya/yê axretê hildibijêre. Xuşk û birayên axretê ji her alî ve alîkariya hev dikan. Her roj hevdu ziyaret dikan. Êzîdiyê ku her roj xuşk an birayê xwe yê axretê nebîne, kafir tê hesibandin.
6. Li gorî dînê me naye qebûlkirin bûyereke ku tê cezakirin; misilmanek dema sibehê zû berî ku dest bi nimêjê bike bêje: ez xwe dispêrim te ji Rebê însanan hemû ji şerê vesveseleciyan, xwe dispêrim Xwedê. Heke ji me kesekî vê bibîhîse di cî de wir terk neke, ew ne ji me ye, bê dîn e.
7. Dema kesekî/kê ji me dimire, divê li cem pîr an şêx hebe û ji mirî re bêje” tu divê bi Melekê Tawis ê pîroz bawer bikî û bimirî. Ji ber ku ew berî her afîrînan hebûye. Misilman, cihû, xirîstiyen yan ji ji oleke din ji te re bêje were ser dînê me, divê tu red bikî û tu bêjî ez bi Melekê Tawis ê pîroz bawer dikim.” Ku ev ji aliyê kesên din ve weke rastiyek neye testîqkirin, kesê mirî bê dîn dibe.
8. Her kesê ji me, her sibeyan divê here ser gora Şêx Adî û ji axa wî ya pîroz perçeyeke bixwe. Nexwe ji dîn derdikeve. Kesê ku bimire û ji vê axa pîroz li cem tune be û berî mirina xwe hinek nexwaribe, ew ne ji me ye.
9. Em di meha berfanbarê (kanûnê) de sê roj rojî digirin, ne li xerîbiyê, divê em li ser axa xwe bigirin. Piştî roja sisêyan pîr an şêx şerabê pêşkêşî her kesî dike û divê her kes vexwe. Heke weha nebe rojiya wî/

- wê qebûl nabe.
10. Heke kesek ji me here welatekî din, li wir ji saleke bêtir bimîne û bi paş ve vegere, êdî nikare bi jina xwe re bimîne. Êdî kes keça xwe nadî wî mirovî. Heke kesekî keça xwe bide wî, ew jî bê dîn tê hesibandin.
 11. Weke me di madeya çaran de dabû diyarkirin, her êzîdiyek xuşk û birayekî xwe yê axretê heye. Ji wan yek dibe bira û ya din jî dibe xuşk. Heke îşlikê bide dirûtin, divê xuşka wi ya axretê cara yekem stûkurka îşlikî wî veke. Kesê ku vê wecîbeyê bi cî neyîne ne ji me ye.
 12. Heke ji me yek îşlikekî nû bide dirûtin an jî bixwaze cilekî nû li xwe bike, divê wan bi ava pîroz a ku di tîrbeya Şêx Adî de ye, bişo. Ew kesê ku cilên xwe bi wê avê neşo ji rîya dîn derdikeve.
 13. Li gorî dînê me cilên rengê şîn ê tarî li xwe kirin heram e. Em weke misilman, cihû, xirîstian û dînê din porê xwe şenakin. Heke em bikin bê dîn dibin.
 14. Ji derî me êzdiyan ew kesen ku tuwalet, hemam an ji tiştên weka wan ku bi hevkarî bi kar tînin, divê em bi kar neyînin. Eqsî wê, em ji dînê xwe re îxanetê dikin.
 15. Di navbera xwarinê dînê me û yên din de ferqên mezin hene.
- Weke nimûne em goşt, kundir, bamya, lahana, xas naxwin. Heta ciyê ku xas tê çandin em nikarin li wir bimînin. Ji ber ev sedemên ku me li jor rîz kirin û yên weke wan, em nikarin xizmeta leşkeriyê bikin û we ji wan tiştan agahdar dikin.
- Nav û şanenavêñ (îmze) kesen ku ev daxuyanî dane, ev in:**
- Mîrê êzdî, mîrê Şêxan Husêñ
Mîrê olî yê devera Şêxan Şêx Nasir
Mixtarê gundê Mam Reşan Murad
Mixtarê gundê Muskan Eyyub
Mixtarê gundê Hatara Husêñ
Mixtarê gundê Beyban Hesen
Mixtarê gundê Huzran Numo
Mixtarê gundê Baqaşra Alî
Mixtarê gundê Başîqa Cemo
Mixtarê gundê Xoşava Ilyas
Mixtarê gundê Girê Pahn Cixd
Mixtarê gundê Kebare Koçek Qaso
Mixtarê gundê Sîna Ebdo
Mixtarê gundê Qesra Izeddîn Xeyro
Mixtarê gundê Kebertu Tahir.
- Ev kesan deklerasyonê dişînin Stanbulê. Demeke bêdengî û aramî dom dike, êzdî bawer dikin ku dewletê daxwazê wan qebûl kiriye. Piştî demeke kurt dewleta osmanî carek din artêşa xwe dişîne ser Şengalê.

Westandim

Xizan Şîlan

arzûyên
li ber bayê felekê ketî
dara bextewariya biharên
pel weşandî
qêrîna gewriya bedenê
şewitî
û stûyê mezlûmên
bi kindira sêdarê ve
dalîqandî
ez westandim
hovitiya
celadên serdeمان
êşkenceya zîndanên rûrêş
xwîna wek çemên melûl
herikînî
û bêhna cendekên ji kolanan
difûre
ez westandim
cehaleta
zimandirêjên xwenenas
axa şaristaniya ku ji kezebê
dinale
sînga berbangên
êş û keseran dikişîne
û rondikên
di korta çavêن dayikan de
cemidînî
ez westandim
zarokên li quncikên tenha
sêwî mayî
xeyalên saf û sefîl ku hatinî dizîn
endîşeyêن dahatûya nedîyar

û bêdengiya
Cîhana ker û kor
ez westandim
agîrpêta
eşqa dilê sipîsar bûyî
qedera
kirasê xerîbiyê li bejna xwe
pêçayî
jana bêxewiya şevistanêن payî
û tirsa ketî zikê tava heyvê
ez westandim
kul û kederên laşê demsalên
bêçare
hêviyên bask şikestî
keştiya giyanê li nav pêlên har
asê mayî
hêrs û nefsa mirovên hesûd
û zilma çaxêن genî
ez westandim
şîrheramên
li baxê hezkirinê kemîn vedanî
xençera di cîgerê wîjdanê re
çûyî xwarê
tenêtiya li nav qelebalixan
dengvedana ramanêن kûr
giraniya barê túrikê pirsên
nependî
û gera li pey bersivêن
di mêtijîye min de diçeliqin
ez westandim

Stockholm

Hevpeyvînek bi Zara Hacî Îwiş ve

Memê Mala Hine



Zara Hacî Îwiş


Foto: M. M. Hine

Çend sal berê li Stenbolê di Weqfa Îsmaîl Beşîkcî de me wek Koma Sînemaya Kurdî her hefte filmên kurdî nîşan didan. Salona nîşandana filmê her hefte tijî dibû. Piştî temâsekirina filman, me li ser filman xeber dide. Wê demê jineke bi navê Sunayê tim dihat film temaşe dikir û bêyî ku xeber bide li şîroveyan guhdarî dikir.

Rojekê min ji Sunayê pirs kir bê ka çîma ew li ser filman fikra xwe nabêje. Wê jî got, *kurmanciya min ne baş e*. Min jî jê pirsî ka xelkê kuderê ye. Wê got, *ez ji Polatliyê me*. Ez şaş mabûm. Min got, ez jî

ji Polatliyê me. Paşê min gundê wê pirs kir. Got, ez ji Mîkâila me. Min jî got ez ji Yuzukbaşiyê me. Vê carê ew şaş ma. Got, diya min ji Yuzukbaşiyê ye. Paşê em hîn bûn ku diya wê Zarê û bavê min meriyê hev in. Min xwest ez diya wê nas bikim. Sunayê got, ew li Foçayê dimîne, lê dema ku hat ez ê xeberê bidim te. Lî li hev nehat û li Stenbolê min Meta Zarê nedît.

Havîna borî li Stenbolê min Suna dît û jê hejmara telefona diya wê xwest. Min got, ez dixwazim bi telefonê bi diya te re hevpeyvînekê çê bikim. Wê jî got, telefon neke,



Zara Hacı İwiş û mîrê xwe Heyder

Foto: M. M. Hine

here ba wê û bavê min. Herdu jî wê gelek kêfxweş bin. Meta Zarê li Foçayê dima. Min jî dawiya havîna borî rêya xwe bi ser Foçayê re xist û bûm mîvanê Meta Zarê û Apê Heyder. Meta Zarê li Foçayê gelek dihat hezkirin. Ew di nav Komeleya **Jinên Aştiyê** yêñ Foçayê de ji bo aştiyê dixebite.

Min bi herduyan re du hevpeyvînên dirêj kirin. Ji ber ku herdu jî kal û pîr bûn, min xwest em bêtir li ser jiyanâ berê ya li gundan xeber bidin û ew tiştên ku êdî hatine jibîrkirin ji wan bibihîsim. Ewil min bi Meta Zarê re xeber da. Min gelek tişt jê pirsîn û wê jî bi kêfxweşî bersiv da. Ji ber ku hevpeyvîna me gelek dirêj bû, min bi naçarî kurt kir.

Meta Zarê, tu dikarî xwe bidî naskirin?

Zara Hacı İwiş: Ez Zara Hacı İwiş im. Navê diya min Bes e. Ez sala 1936'a li Yuzukbaşiyê¹ hatime dinê. Em sê xwîşk û çar bira wûn. Birê min ê heq Hecî Memîş deh û şes salî wû mir. Em li Yuzukbaşiyê gir bûn. Birê min cihê wûn şûnva bavê min, diya mîn û em du keçik hilgirtin birin Polatliyê.

Kîjan salê bû?

Zara Hacı İwiş: Sala 1952'ya wû. Li Polatliyê bavê min dukana manufatura vekir. Ez jî çûm rev Lîla Qirpolî. Lê re Lîla Ehmed digitin. Ez çûm ba wê, min va xeftanana dirû. Min dirûnê li wê hu kir. Paşê ez

¹Gundekî kurdan li Polatliyê ye. 75 kilometre li başûrê Polatliyê ye û ji eşîra Canbegan e.



Zara Hacı İwiş li Focayê bi dayêkên aşîtiyê re.

Foto: M. M. Hine

hatim, bavê min çû Enquerê mi re makîne anî. Ew makîne hîn jî heye. Min dirûn kir, min rind jî dirûn kir. Lê şûnde jî min xeftan hiştin û fîstan li xwe kirin. Paşê min fîstan didirûn. Paşê ez bûm terziciyeka mezin. Min

mialima re didirû, 23'ê nîsanê de li xwe dikirin. Min xeftan, entari, qutik, işlîk didirûn û dikir dukana bavê xwe. Bavê min ew difrotin. Lê ku yekî qumaş anî, min perê xwe bixwe hildigirt. Ez dergistî wûm jî min pir pere berhev kiribû. Heyder pisxaltiyê min e. Tim digotin, ‘Em kê te bi Heyder din’. Hatin ez xwastim û me nişan kir. Çar sal em weyn man. Heyder çû eskerê.



Kîjan salê hûn zewicîn?

Zara Hacı İwiş: 1958'a em zewicîn. Suna min jî 1959'a Xwedê da.

Çar gede me wûn. Min dirûn dikir, Heyder jî ket memuriyetê. Me li Polatliyê xanî çêkirin. Em ê rind bûn. Fiqaretî qet nedihat bîrê



Zara Haci Îwiş bi malbata xwe re.

Foto: M. M. Hine

me. Ê dewletî jî dilê xwe bi me di-ma. Lê şûnde me bar kir Enquerê. Geda xwendin. Sinan, Sevda diçû Enquerê dihat. Sema bû mialim, çû Agiriyê. Me nirî dike newe, me bar kir Enquerê. Sevda ODTU sosyoloji xwend, Sinan jî felsefe xwend.

Em ê rind bûn, lê felek neşa me bir. Sevda 41 salî wû wefat kir. Lê şûnda me bar kir, em hatin Foçayê. Vê Foça jî Sevda rû me da. Sevda got, baba madem hûn kê bar kin, herin Foçayê, ez Foçayê hez dikim. Deh û şes sal in em li vir in. Sevê gedê Sinan em çûn sê sala li Stenbolê man. Paşê em dîsa çûn sê sala li wir man. Min hîngê *Dayikên Şemiyê* dîn. Ez her hefte diçûm hindê wan.

şes sal bûne. Ku ez li Stenbolê wûma ez tim diçûm hindê wan. Ez her hefte diçûm, rind jî wû.

Tu dikarî hinek ji me re qala Şilanê biki?

Zara Hecî Îwiş: Milet xeftan cihişt. Qumaşa xeftanê jî li dukana bavê min pir wûn. Mi go ez vana çê bikim. Min got “*Kültürümüzü canlı bir kadında yürütemem ama bir taş bebekte yürüterüm*” (Ez nikarim çanda xwe li jineke zindî bikim, lê dikarim li bûkeke nezindî bikim). Min girt va bûka çêkir. Mi navê Şilanê lê kir. Zavakî me hat go “Bûkê, heyra-na çavê te, vê bûkê bi min de! Te çi xwest ez bi te dim.” Mi go, na. Ba ev jî torinê mi re bimê.

Çend sal in tu diçî ba Dayikên Şemiyê?

Zara Hacî Îwiş: Riya siftê ve ez diçûm. Nizanim dehûpênc, dehû

Te Şilan 45 sal berê çêkir?

Zara Hacî Îwiş: 45 sala zêdetir e. Sinan diwê ez çûk bûm te Şilan

çêkir. Belkî 50 sal e. Porê min dirêj wû. Min porê xwe jê kir, hunand û min lê kir.

Ew porê te ye. Hîn spî nebûye?

Zarê Hacî Îwîş: (Dikene) Porê min hîngê reş bû.

Dema ku hûn li gund bûn, di dawetan de we kîjan govend digerandin?

Zara Hacî Îwîş: Me baz dida, govend dikişand. Li dola zirnecî jî hewûn. Lê me bixwe jî digot. Me kilam digotin:

*Meyrê rawe siwa ye,
dengê diqa qewe ye...*

Pir wûn, me bîr kir, çû...

Em sê linga pêşde diçûn, sê linga paşde dihatin û me kilama Cemîleyê digot:

*Paş mala Cemîle neqew e
Pêş mala Cemîle neqew e
Xwezgincî kaw e kaw e
Ez mirim tu sebeb e
Way Cemîle Cemîle...*

Gedelixê me rind rawirî. Em feqîr newûn. Pez hewûn, bargîr pir bûn. Berêvarê ez diçûm min bargîr çex dikir. Canîkî me yî reş hewû. Ez

çûm min go ez bînim, min dî gur ew birîndar kiriye. Li nav saza, li Kevirêql² gura xwariye. Bavê min her ro bi taseke *ereb sabunu* ew birîna bişûsta. Birîn xweş wû. Hespê me weyn wû, li gund tenê wû.

Em diçûn Înê Osê. Sê çar mal em diçûn wira. Bîra me hewû. Bir pir kûr wû, av bi kera dikişandin. Bazi ez jî lê siyar diwûm. Pez dihat, digotin oliga tijî kin. Ez li kerê siyar bûma biçûyama, biçûyama, digotin “Êê” heywan hu kiriye demekî hema dadiwestî, çex diwû dihat. Dewle dikişandin, av boş dikirin, dîsa dixistin bîrê. Dewle xwe çerm bû.

Pezê me pir bû, pez dikirin bêriyê, ca siwê ca êvarê pez didotin. Şûna ku lê mexel diwû digotin fêz. Carkê li Înê Osê pez li fêzê rêz bûye heta ber mala me hatiye. Bavê mi hatiye ku gur ketiye nav pez, pez dixwe. Bavê min gotiye “Ca meke ez lê sêr kim, ka va gura dike çi bike.” Wî gotiye qey dike yek xwe re hilgire here. Niriye gur difetisîne dihêle, difetisîne dihêle. Hîngê bang kir haho, haho! Kûçik hatin, gur reviya, lê pez bela bela bû. Mekî pez berhev dikirin. Deh û dû mî miribûn.

² Kevirêql bi saza xwe navdar e. Gelek gundên nêzik berê dihat ji vir qamiş dibirin û xanî çêdikirin. Cihê ku çîroka Qamişê Qul tê de derbas dibe ev der.



Foto: M. M. Hine

Bükikênu Zara Hacî Îwiş bi hunera xwe çekirine.

*Sala ku cara ewil hûn çûn Polatliyê, li
Polatliyê çiqas kurd hebûn?*

Zara Hecî Îwiş: Me kurmanc
dihemcartin. Sih mal hewûn. Mala

Reşîdê Kolê hewû li Sîna³. Gedê
wan paşê şirketa Baysal vekir. Kol jî
xaltiya bavê min e. Meta min Basot
jî dane Reşîd. Mala Osikê Soto
hewû, lê re digotin Osman Alabay⁴.
Ew jî zû wefat kir. Diya Osik Xaltiya
Duduk me re merilixi dikir. Wextê
bavê min û diya min savê kirîna
malê dukanê diçûn Stenbolê, em li

mala Xaltiya Dudikê radiketin.
Rehmetî Osik hîngê diçû ortaokulê.
Osik yekî çekîngen bû. Hîngê em
pir ser hev de diçûn dihatin.

Merîkî Osik li gundê Sîna cara
siftê qamyon anîbû gundê me û
genimê me bar kiribû. Wê çaxê em
gede wûn. Hîngê motor jî tunewû.
Nêzikê em herin bajêr apê min
motor anî. Lê bîçerdover hewû.
Gundiyelekî me bîçerdover kiribû, anî
gund. Milet gî bi ereba bargîra wû.
Erebê ga jî li gundê me pir hindik bû.

³Gündeki kurdan a li Yunaxê ye. Ev gund ji eşira Canbegan e.

⁴Osman Alabay, yek ji nivîskarên kovara Bîrnevبûnê bû. Li ser zargotina kurdên Anatolyayê gelek
berhemêne devki berhev kiribûn.

Li gund we ci penêr çêdikirin?

Zara Hacî Îwiş: Diya min rûn çêdikir, dixist avrijên, paşê jî pendirê yawan jî dixistin posta. Li Denizliyê bi ereba hespa dihatin pendir dikirîn, hêjîr û mûj difrotin. Diya min bi şîlafa berxa maya pendir çêdikir. Şîlaf ez diwêm mîdê berxa ye. Berx şerjê dikirin, şîlafa berxa nedîavêtin pê maya çêdikirin. Hinek jî hêjîr dikirin. Şîlafa berxa dixistin nav kûzekê, pê maya pendir çêdikirin. Paşê bavê min li Akşerê hat diya min re got, "Êndî tu bi şîlafa berxa maya çeneke. Bindire, mi te re şûseke maya anî." Lê şûnda bi wê pendir çêkirin dixistin kûpa. Kûp jî ji Yormali û Emîrdağ û Gunyuzuyê tînan. Bajarê me yê nêzîk ew bû. Kûzê avê jî tînan difrotin.

We li gund çawa nan çêdikir?

Zara Hacî Îwiş: Me li ser sêlê nanê zirav çêdikir. Neh deh ro carkê me nan lêdixist. Carkê diya min got "Lê lê, diwên li Yunaxê şes me carkê nan lêdixin. Paşê gundaiyên me jî mîna yê Yunaxê nan lêxistin.

We di testê de ci dixwar? We çay çêdikir?

Zara Hecî Îwiş: Mistoyê birayê min li Polatliyê çay anîye, em gî li dorê civiyane hev. Mistoyê birayê

min çîkî kofalak bû. Yaziyê xwe jî rind bû. Çay anî, derve cezwe keland, çay avêt û ser jî çîkî por kir. Paşê demlemîş bû. Çay weng dirêj rû kir. Em pê keniyen me got "Tu çîma weyn dikî?" Wî jî go, ev weyn diwe. Paşê bavê min jî çay kirî û lê şûnda me tim qaweltî kir. Çay paşê hat, lê qawe berê hewû. Tawa me hewû, aşê qawe hewû. Me qawe diqewirand û dihêrand. Hîngê ku mîvan hatin me qawe dida.

We qehwe çawa şîrîn dikir? Şekir hebû?

Zara Hecî Îwiş: Erê şekir hewû. Me tim şekir li bajêr tîna.

Dogme hebû?

Zara Hecî Îwiş: Çanaxkî me yê gir hewû. Sifte goşt rîsi dikirin, oko dirêj dirêj dibirîn û xwê dikirin. Lê re rîsi diwên. Didan ser bendekê, hişk dikirin. Diya min ew tîna ser destarê xwê. Xalanê min pê bulxir jî pê çêdikirin. Me ew nedî. Şivanê me xwê pêz ser wî destarî dikir. Diya min kevirê destar û kevirê xwê temîz dikir. Wa risî li ser kevir datîna, bi kevirekî lêdixist û pan dikir, dikir wê çanaxê. Bîberê toz pê wer dikirin. Kîmyon jî pê wer dikirin. Zivistanê diya min ew dogme derdixist dikir ber şîva.

Wekî din tomast hebû. Mastê payîzê dimeyandin, qeymaxê wê digirtin, dixistin nav avrêja. Qeymax weyn top bikirana. Ew jî suzmış diwe. Qum dikirin bin avrêja, weyn qaymax û pendir ziwa dikirin. Ew masta ziwa dibû, digirtin hûrê berxa temîz dikirin, dişûştin, mîna yê sicuxa dikirin. Paşê ew mastê hişk dixistin nav hûra û rind tiji bikirana. Hinek jî reşpeşik bixistana. Paşê dev girê didan û dardixistin. Ew weyn hişk diwû. Paşê ku zemanê xwe hat hûr hûr dibirîn pendir derdixistin. Marîfeta wî dike nekeşte. Keşt xirê tomast kewikî diwe.

We qet şîranî çêdikir?

Zara Hacî Îwiş: Na, qe şîranî tunewû. Me dikirî. Tiriyê me tunewû em corcor⁵ çêkin. Me xoşav çêdikir. Kurmanc bê xoşav nawe. Nivankî ma hatin, mitleqe xoşava xwe çêwe. Ema reçîl û şîraniyê din tunewûn. Sucux, pastirme tiştê weyn jî tim dikirîn.

Dêmek pastirme berê ucuz bûye. Berê mayîne de kırış diwûn, bavê min pastirme dikirî, yekî gir, li kırışê dardixist. Me gede rokî bê dê û bavê xwe em nedîçûn çıkışkî jê nedikir, nedixwar. Me tenê ser sifrê dixwar.

Dema ku tu zarok bûyî li gund barge û qişle hebûn ne wisa?

Zara Hacî Îwiş: Em zivistanê li qişlê diman, biharê, meha nîsanê em dihatin barge. Xaniyê me yê li qişlê pir rind bû. Du qat wû. Bavê min bi xwe çekirin dawû.

Tevna we hebû?

Zara Hacî Îwiş: Teyn hewû. Me xali çênedikir. Basota xwuşka minister çêdikir, cilê hespa çêdikir. Namazlixê filikê çêdikir.

We çito boyax dikir?

Zara Hacî Îwiş: Boyecî dihatin gund. Tema ku payîz bû tê ca bindira boyecî bayn kin. Me rîsê xwe çile dikirin dibirin reng reng, te kijan xwestiye dixistin nav stîla dikelandin û boye dikirin. Paşê ziwa dikirin. Ê bidana, perê xwe hilgirtana. Me bi xwe jî boye nedikir.

Metê, mala te ava. Sohbeteye gelek xweş bû. Tu her hebî.

Zara Hacî Îwiş: Mi jî pir kîf da. Rind bû tu hat me bi zimanê xwe deng kir, me qala zemanê bere kir.

⁵ Di nav Canbegan de ji bo dims, corcor tê gotin.

Helbest

Seyfi Doğan

-1-

tu

wî kalî ku ji jêr da teyâ

nasdikî

wî kalî ku sihê xwe

wek notên kilameke şînê

li ser axê zer dihîlîze

ew kalî ku wek pelekî payîzê ku

li ser pêlên behrê dihejê

ew kalê ku wek kurşunê giran pi rê tere

ew kalê ku li dijî axkêşanîyê li ber xwe dida

ew kalê ku xwe bi cokî xwe da nûskandî

ew kalî ku li wan hersê bûkan temaşe dike

û qewserê ji hundir da dikşîne

ew kalê

serşivan bû

keriyêñ mezman cêrandin

çoyê wî li hewa wek buriskên biharê dihîlist

pezî xwe ne gur ne jî diz nezîkê dibûn

lê ew bi xwe dizekî bi nav û deng bû

ne seat ne jî pusula xwe hebû

li gor rojê gav diavitin

kulavî wî li ser milêñ wî

deşt bi teşt

çîya bi çîya gerîye

kelekêñ xwe li ser erdî hîşk eşîyan

zureûzurêñ guran xêwêñ şevan lê herimandin

di taldî zinaran da ar dada

şirê guhangerm li xurînî vewxar

bîra zarokêñ xwe kir
bi hasretê jina xwe bû
hêstirk ji xwe re dikirin heval û dişlik
dema ku hesret aşt ne dibû
tûtin bi du kaxizan dipêcan
û heya bilurê dikir
te niha naskir?

-2-

ma tu carekê tuyî şîrî dayîkê xwe nekî
tê bi serxoşî heremzadetîyê bibî
tê pê le xalîyê ku destêñ nazli dagirtinî
wek lingşewitîya li nav malan derî bi derî bigerî
û parsîya merhemetîyê bikî
li ser her benîbihilîzî
lé tu li tu deran bi cih nabî
tu normêñ ehlakî û dînî nasnakî
edî tu xulamekî bi hefserî
ê te hertim erîşa kokêñ te bikin
ji bo ku li rêzêñ pêş xuya bikî
tê bi quesmarekî bêderman bî
sewê tê etîk û estetîk
û heqî porsipîyan û rûsipîyan hekat in
cavêñ te yên pêl yên herdem
li benda ismerekê bin

Reşo

-II-

Ecevit Yıldırım

Li ser komkujiya Helepçê re çend
meh derbas bûbûn. Êdî ne medya

û ne jî kesekî din qala komkujiya li
Helepçê nedikir. Ew hovîtiya ku li
wir qewîmîbû hatibû jibîrkirin jî.

Dema havînê bû. Dibistan
ketibûn betlana havînê. Talebe gî
bi hatina betlaneyê pir şâ dibûn. Lê
Reşo nedixwest betlane bibe. Ji ber
ku gava dibistanê resmî diketin
betlaneyê, Reşo mecbûr bû teve
qursa quranê ya li camiyê bibe.

Bavê wî maneyeke pir mezin
li perwerdeya dînî bar dikir. Kom
û komeleya ku ew kara dikir jî
karê xwe bi baweriyeke mezin bi
cîh dianîn. Di demên betlaneyên
dibistanê de her sibehê bi
mînîbusan mal bi mal digerîyan û
talebeyên qursa quranê yek bi yek
bi minibûsê kom dikirin û dibirin
navçeya ku camî lê hebû.

Reşo ji serî de û tu car jî li
camiye germ nebû. Atmosfera li
camiyê jê re wekî dinyayeke xerîb û
ji mentalîta wî pir dûr bû. Rituelên
di camiyê de jê re xof dihatin.

Talebe gî bi hev re, bi xwendina
pirtûkêkê ku ji zimanê wê yek

gotinek jî fam nedikirin mijûl
dibûn.

Gava dema nimêjkirinê dihat,
xoce derbasî pêşiyê dibû û civatê jî
li dû xoce saf digirtin û kiryarên wî
dubare dikirin, nimê dikirin. Aqilê
Reşo nedibirî, ku ewqas însan çîng
bi hev re heman tiştî bikin. Ne
tiştekî xwezayî bu.

Di avûruyê camiyê de ew ji
hevalên xwe yên fûtbolê jî dima.
Welhasil sibehe saet hîn zû bû. Lê
mînîbusa camiyê li ber mala wan
xuya jî kir. Reşo hema qurana xwe
kir destê xwe û li mînîbusa camiyê
ya li ber malê dawestîbû nişt (siwar
bû). Reşo silav li hevalên xwe yên
di mînîbûsê da û heta camiyê
ketin nav sohbet û muhbetê. Piştî
demekê mînîbus gihîşte camiyê.
Talebayan giya bi hev re rêya
avdestxaneyê girtin.

Prosedûr û qaîdeya qursê weng
îcab dikir. Berî derbasbûna hindirê
camiyê avdestgirtin îcab dikir.

Piştî girtina avdestê talebe
derbasî hindirê camiyê bûn û ketin
hindir. Her yekî qurana xwe da ber
xwe û heta ku xoce were xwe pê

egle dikirin. Piştî demekê xoce kete hindir. Silaf li talebeyan kir û got:

– Kurikno! dibistana we ya resmi niha bi şes hefteyan kete betlaneyê. Ew ji bo me derfetekê mezin e. Emê di van şes hefteyan de giraniyê bidin ser xwendina quranê ya bi tecwîdê. Hûnê her sibeh werin û heta êvarê li vir bin. Gerek her yek ji we xwe herî kêm fêrî xwendina quranê ya bi tecwîd bike. Gerek her yek ji we yasînê jî ezbere bike. Ji hêla din ve gerek hûn zanibin; Li Bulxaristanê komûnist zilmê li birayên me yên misilmanên tirk dikan. Qomonîst dixwazin misilmanan asîmile bikin. Dengkirina bi tirkî qedexe dikan, navêngundû bajarên tîrkan têñ bulxarîkirin. Li wan tê ferzkirin kû navêngundû bajarîli xwe bikin. Nimêjkirin, rojîgirtin hatiye qedexekirin, cejna qurbanê û ya remezanê hatine qedexekirin.

Em jî birayên xwe yên misilmanên tirk li Bulxarîstanê naxwazin bi tenêbihêlin. Ji ber wê jî emê roja şemiyê herin zilma komûnistên Bulxarîstanê li bajarê Kolnê protesto bikin. Bila haya wê jê hebe, mîting jî wê bi xwendina qûranê destpê bike. Ezê we di van rojan de test bikim, ki ji we kanibe sûreya Yasînê xweşiktir bixwîne, ewê li meydana Kolnê jî sûreya

yasînê li hember bi hezaran însanan bixwîne.

Xoceyê camiyê gora xwe motîvasyoneke xwes dabû talebeyan. Motivasyona xoce bandor li ser talebeyan kiribû. Her yekî bi deng û awaza xwe qurana li ber xwe dixwedin. Dengê xwendina quranê hindirê camiyê tev dagirtibû. Bi nîvro dema navberdayînê bû. Bi qasî nîv saetê talebeyan di hewsoya camiyê de navber didan. Di navbera nîvro de mijara talebeyan zilma li musilmanen Bulxarîstanê tê kirin bû. Talebeyan di nava hev da deng dikirin. Hema bêje hemûyan kiryarêne dewleta Bulxarîstanê şermezar dikirin. Hellwestêne wekî; tirk û misilmanen li Bulxarîstanê ne bi tenêne û xwedîderketina li wan wekî qaideyekê însanî û ıslamî dihat qebûlkirin.

Her ku qala zilma li tirkêne Bulxarîstanê dihat kirin, komkujiya Helepçe dihate bîra Reşo. Birîna Helepçe hîn teze bû. De tu were wê, wehşeta li Helepcê ne xema tu kesî bû. Ne xoceyê camiyê, ne serokê wê, ne rêvebirekî wê û ne jî yekî ji civatê xêra xudêrokê qala Helepçê nekiribû. Hebû, nebû tim qala Afxanîstan, Fîlîstîn, Îsraîl û niha jî qala tirkêne li Bûlxarîstanê dihat kirin. Halbûkî serokê camiyê

bi xwe jî kurdekî ji Omera bû. Fîrat jî lawkê wî bû. Fîrat talebeyekî jêhatî bû di xwendina quranê de. Quran herî xwesik wî dixwend.

Reşo di fîrsendekê de mijar ji Fîrat re vekir û got:

– Fîrat, va îşî Bulxarîstanê ci ye yaw. Aqilê min vê meselê qet nabire ha!

– Çima?

– Tê gotin ku li Bulxarîstanê zilm li tîrkan tê kîrin. Erê rast e. Lî, çend meha berî niha li Helepçê bombeyên kîmyewî li ser Kurdan hat barandin. Wê çaxê deng ji tu kesî derneket. Ez wê yekê rast û durist nabînim. Tu ci dihizirî ?

– Bi min tiştekî xof di vir de tune ye.

– Madem em misilman in, wê çaxê gerek em ji her kesî re eynê helwestê diyar bikin. Bi min ya ku hatîye serê kurdan ji ya tîrkîn li Bulxarîstanê girantir e.

– Ci eleqeya me bi kurdêni li Helepçê re heye?

– Çing yanî?

– Em tîrk in. Ew jî kurd in.

– Weng nabe Fîrat. Em jî kurd in. Helepçê jî kurd e.

– Na lo, em ne kurd in. Em li Tirkîyê dijîn û em jî tîrk in, tîrk jî tîrk in.

– Ew ci mantiq e Fîrat? Madem

weng e, wê çaxê tîrkîn li Bûlxarîstanê jî Bulxar in!

– Na na, ne weng. Bûlxarîstan kafîr e, komûnist e. Li hember wan kafiran gerek em li birayêñ xwe yên tîrk li Bûlxarîstanê xwedî derkevin.

– Wele Fîrat, madem Helepçê ne ji me ye, ma ci bi me hatîye. Zilma ku li Bûlxarîstanê heye li Tirkîyê jî heye. Ci zilma ku Bûlxarîstan li tîrkan dike, Tirkîyê jî li kurdan dike. Li Tirkîyê jî kurdî qedexe ye, navêñ kurdî qedexe ne, navêñ gundan kirine tîrkî. Mesela navê Gundê we bi kurdî Omara ye, bi tîrkî kirine Tavşançalî. Va ne zilm û neheqi ye ?

– Va tiştêñ ku dibêyî jî aqilê min nabire. Ya ku ez dizanim, em tîrk û misilman in. Bûlxarîstan jî zilmê li birayêñ me yên misilman dike û em jî gerek birayêñ xwe yên li Bulxarîstanê bi tenê nehêlin.

– Yahû tu çîma naxwazî qebûl bikî, zilma li Bûlxarîstanê ku tu qalê dikî li gundê te jî heye. Tu çîma qebûl nakî?

– Reşo min ji te re got, va işana nakevin aqilê min. Dibe ku gundê bavê min gundekî kurdan be, lê gerek tu bizanî diya min jî tîrk e û ez jî xwe wek tirkekî qebûl dikim. Loma ez birayêñ xwe yên tîrk li Bûlxarîstanê bi tenê nahêlim. Eger

tu pir dixwazî, tu jî here ji bo Helepçe tiştekî bike !

– Wele Firat ez vê yekê nikanim qebûl bikim. Tişte ku li vir diqewime ne heq e. Bi vî awayi ez nikanim teve mîtinga li Kolnê bibim. Madem tirkên li Bûlxarîstanê birayêن te ne, kurdên li Helepçe jî birayêن min in. Ez jî bi dilê xwe bi wan re me !

– Tu bi dilê xwe yî ...

Firat berê xwe da camiyê û ji cem Reşo veqetiya. Kes nemabû li hewsoya camiyê. Talebe gî ketin camiyê ku dersa xwe berdewam bikin. Reşo teneke din li bexçeyê camiyê ma û li ser mineqeşeya bi Firat re hizirî. Zilm li kê bê kirin zilm e. Ci kurd be, ci tirk be, ci misilman be û ci jî xristiyan be.

Camî mala xudê ye dihate gotin. Lê di pratîkê de camî ne mala xudê bû, mala Tirkan bû. Zimanê camiyê tirkî û erebî bû, rabûn-rûniştin, dan û standin, ruh û hestên civata camiyê her tişt bi tirkî bû.

Civata camiyê bi piranî tirk bûn. Tirkên li Bulxarîstanê jî perçeyek ji netewa xwe dihesibandin. Va tiştekî xwezayî bû jî. Qet nebe ji bo xatirê kurdên ku dihatin wê camiyê, bi du gotina be jî qala komkujiya Helepçe

gerek bihata kirin, dihizirî Reşo. Lê komkujiya li Helepçe ne xema kesî bû. Ji ber camî camiyeke tirkan bû û civata wê jî hema bêje gîştik tirk bûn. Ma ci bi kurdan hatibû. Ji hendik kurdên heyî jî tu bertek tunebû. Ew jî bi ber bayê tirkan ketibûn û bi yekdengî gotin û helwestêن wan dubare dikirin. Wekî ku her yekî ji wan kevirekî ji ezman li serê wan ketibe, pergela xwe şas kiribûn. Ser de jî xwe ji kurdbûna xwe dûr dimêrandin. Gotina Firat ya ku digo diya min tirk e, gotina bavê wi anî bîra Reşo. Ma wî jî dema komkujiya Helepçe negotibû; Ew ne kurdên heqîqî ne. Kurd civateke entersan bûn. Ji Kurdbûna xwe dûr disekinîn, lê belê tirkan û tirkên li Bûlxarîstanê wekî birayêن xwe dihesibandin. Eşkere bû, ku kesî qîma xwe bi kurdî û kurdbûne nedikir. Ma ewqas insan şas bûn, Reso tenê rast bû, bi xwe û xwe dihizirî Reşo. Belkî jî di gotina bavê wî de rastiye hebû û ew ne kurdên heqîqî bûn! Ci gotibû bavê wî; Kurdên heqîqî Kurdên Dersimê ne!

Pirsa ku Reşo niha lê bigere eşkere bû; Dersim ku der e û kurdên Dersimê kî ne !


Kurtenasandin

Meriv dikane romana Fikret Yıldız, *Li benda keskesorê* wekî romaneye biyografîyayî ji bi nav bike. Di romanê da, rastî û xeyal di zik hev da ne. Bingeha romanê sereke jiyana Osê, bendewarê keskesorê ye. Osî ku nêzika dused salî di ber vê li gunde Mikaîla (Polatlı/Tirkîyê) jiyîye.

Di kurıktîya xwe da, Os qezake piçûk, lê encamgiran derbas dike û lêva wî ya jor didire, êw lêvse dimê. Her tiş bi vê qezayê destpê dike. Carina qeza-belake piçûk jiyana meriva serûbin hev dike û dibe sebeba bûyer û guhêrtinen mezin. Ji avûrûyê lêvseyî da Os pir û pir bi ber xwe dikeve û ji dilketîya xwe Hewê dûr disekine, jê direwe. Ji ber vê serhatiya dramatîk û tengîya jiyana eşiriyê, Os bêzar dibe û direve, serîyê xwe heldine dihere Stembulê.

Rev û rêuwîtiya Osê ya Stembulê ya bi hespê qir û seklawî macereyeke bi serî xwe ye. Li Stembulê, Os dihere medreseyâ Mewlane Xalîd û li wir me-laîyê dihêvise. Li Stembûlê ew Kevork ê ermen yê zêrfroş û keça wî, Asparikê nas dike. Paşê ew pê Asparikê va dizewice û herdu bi hev ra bextiyarîyê tam dîkin. Lê pir najo, Asparik ducanî dibe û gava ku dergûşa wê tê dunyayê, ew û dergûş dimirin.

Ji çûyîna Stembûlê panzdeh salan şûnda, Os vedigere cîh û warê bav û kalan û ba dê û dotêñ xwe. Ew careke



din dizewice, dilketîya xwe, Hewê li xwe mahr dike. Os xêran dike, camîya gund ji nûva dide çekirin û dihere Hec. Li Hecê Os du kole û carîyekî dikire û bi xwe ra tîne gundê xwe. Serpêhatîyê wan bi êş û balkêş in.

Nivîskar, Fikret Yıldız di vê romana xwe da xeyal û rastî bi hostetî bi hev va hunandiye. Wî qehremanên romanê û serpêhatîya wan û qewimîyê wan dem û dewranan, êş û derdêñ giran yên wî zemanî zindî kirine.

Di romanê da, kon û warê kurdêñ Anatoliyayê bi taybetî yên êla Mikailî, rabûn û rûniştinêñ wan yên wê serdemê bi hûrgili û bi zimaneki heriqbar û nêzikî zaravayê Mikaîla hatine nasandin.


“*Li benda keskesorê*” li benda xwendinê ye. Min ew xwend û jê hez kir. Piroz dikim!

Nub Ates

Kitêbên kurdi
yên dersê
ji weşanxaneyê Apecê



Weşanxaneyê APECê
<http://apecpublishing.com>



Şerê li ser caw VIII, 110 x 90 cm, teknika tevlihev a li ser caw ji firca Hasan Hüseyin Deveci

<http://birnebun.eu>